

প্রথম প্রকাশ

নভেম্বর ১৯৫৯

প্রকাশক

শ্রীমহেন্দ্রনাথ দত্ত

শিশু সাহিত্য সংসদ প্রাঃ লিঃ

৩২এ আচার্য প্রফুল্লচন্দ্র রোড, কলিকাতা ৭০০ ০০৯

মুদ্রক

শ্রীঅরুণচন্দ্র মজুমদার

আভা প্রেস

৬বি গুড়িপাড়া রোড, কলিকাতা ৭০০ ০১৫

প্রচ্ছদশিল্পী

শ্রীঅর্ধেন্দু দত্ত

মুখবন্ধ

শেক্সপিয়ারের নাট্যবস্তুকে অপেক্ষাকৃত সহজবোধ্যভাবে সাধারণের কাছে উপস্থাপিত করাই সম্ভবতঃ হুলেখক চার্লস্ ল্যাংঘের উদ্দেশ্য ছিল এবং এ বিষয়ে তাঁর সার্থকতা সম্বন্ধে সন্দেহের কোনো অবকাশই নেই। অবশ্য ক্ষমতার দিক থেকে সূর্যের সঙ্গে প্রদীপের তুলনা অসমঞ্জস হলেও মৌল উদ্দেশ্যের সাযুজ্যই এই গ্রন্থ রচনার ক্ষেত্রে অমুপ্রেরণ। সংস্কৃত ভাষার কঠিন আবরণকে যে রসবস্ত্র আবদ্ধ তাকে মাতৃভাষার সহজতর খাতে প্রবাহিত করে তৃষ্ণার্তের অঞ্জলিপূরণই রচয়িত্রীর বাসনা—সার্থকতা গুণিজননের বিচার্য।

সংস্কৃত নাট্যকাররা অধিকাংশ ক্ষেত্রেই কাহিনীর প্রয়োজনে রামায়ণ-মহাভারতের দ্বারস্থ। প্রাচীন ‘এপিক্’র কাছে পরবর্তী সাহিত্যের এই ঋণ শুধু এদেশেই নয়—যে-কোনো দেশেই স্বাভাবিক দৃষ্টান্ত। অবশ্য প্রতিভা ও ‘স্বকপোলকল্পনা’ যে অবিচ্ছেদ্য, তারও নিদর্শন বিরল নয় সংস্কৃত নাট্য-সাহিত্যের জগতে। ভাস-কালিদাস-শূদ্রক-বিশাখদত্ত প্রমুখ দ্বিপালদের রচনায় মৌলিক কাহিনীরও অভাব নেই। আবার যেখানে প্রচলিত পুরাণ-কথাই উপজীব্যরূপে গৃহীত, সেখানেও প্রয়োগকলা (treatment) নাট্যকারের সম্পূর্ণ নিজস্ব। আলোচ্য গ্রন্থে সন্নিবেশিত হয়েছে—প্রধানতঃ সেই সব কাহিনী যেগুলি নাট্যকারের নিজস্ব কল্পনায় পরিপুষ্ট ও বিশদায়িত। প্রকৃতপক্ষে সংস্কৃত নাটকের সংখ্যা বহু—কাহিনীর বৈচিত্র্যও অপরিমেয়। কিন্তু এই গ্রন্থের পরিসরগত পরিমিতির প্রয়োজনে মাত্র দশটি উল্লেখ্য গল্প স্থান দেওয়া হ’লো। মূলের বাতাবরণ বজায় রাখার তাগিদে ক্ষেত্রবিশেষে কিছু কিছু সংস্কৃত উদ্ধৃতি সংযুক্ত হয়েছে। মোটামুটিভাবে স্বীকৃত কালানুক্রম অনুসারেই রচয়িতারা অগ্রাধিকার পেয়েছেন। ‘ভূমিকা’ অংশে সংশ্লিষ্ট হয়েছে সংস্কৃত নাটকের উৎপত্তি-সংক্রান্ত প্রচলিত মতবাদগুলির সার-সংক্ষেপ। পুনরুক্তি হলেও একথা উল্লেখের প্রয়োজন আছে যে পণ্ডিত-মহলের জন্তে এই গ্রন্থরচনা নয়।

সূচীপত্র

পৃষ্ঠা

ভূমিকা

(১—২৩)

ভাস :

স্বপ্নবাসবদন্তম্	১
অবিমারক	৮
পঞ্চরাত্র	১৭

কালিদাস :

মালবিকাগ্নিমিত্রম্	২৬
বিক্রমোর্বশীয়ম্	৩৬
অভিজ্ঞানশকুন্তলম্	৪৩

শূদ্রক :

মৃচ্ছকটিকম্	৬১
-------------	-----	-----	----

হর্ষ :

রত্নাবলী	৭৯
----------	-----	-----	----

বিশাখদত্ত :

মূদ্রারাক্ষস	৮৬
--------------	-----	-----	----

ভবভূতি :

মালতীমাধব	৯৪
-----------	-----	-----	----

পরিশিষ্ট

...	১০২
-----	-----	-----	-----

ভূমিকা

বাংলাভাষায় ‘নাটক’ বা ইংরাজী ‘ড্রামা’ শব্দের যথার্থ সংস্কৃত প্রতিশব্দ ‘দৃশ্যকাব্য’। সবদেশে ও সবকালেই সাহিত্যের স্বরূপ-নির্ণয়, দোষগুণ-নিরূপণ ও শ্রেণীবিভাজনের দায়িত্ব স্বেচ্ছায় গ্রহণ করেন সাহিত্য-সমালোচকেরা। সংস্কৃত সাহিত্যের ক্ষেত্রেও এর ব্যতিক্রম ঘটেনি। এই সাহিত্য আলোচনাকে কেন্দ্র করে সংস্কৃতে যে সমৃদ্ধ বিভাগটি গড়ে উঠেছে তার নাম ‘অলঙ্কার-শাস্ত্র’ আর যারা এই শাস্ত্রের মৌলিক আলোচনা করে গেছেন তাঁরা ‘আলঙ্কারিক’। ভরত, ভামহ, বামন, আনন্দবর্ধন, মম্বট, বিশ্বনাথ কবিরাজ প্রমুখ আলঙ্কারিকদের রচনা সংস্কৃত সাহিত্য আলোচনার দিগ্‌দর্শন। এঁরা যে শুধু কাব্যের অলঙ্কার-দোষ-গুণ বা কাব্যের প্রাণ হিসাবে রস-রীতি-ধ্বনি ইত্যাদি বিভিন্ন দিক্‌ নির্দেশ করেছেন তাই নয়, কাব্যের বহুধা বিচিত্র প্রকৃতি আলোচনার পর বিভিন্ন শ্রেণীতে বিভাজন ও তাদের স্বরূপনির্ণয়ের মাধ্যমে যথার্থ মূল্যায়নের চেষ্টাও করেছেন। প্রকৃতপক্ষে সংস্কৃত ‘কাব্য’ শব্দটি সাধারণভাবে সাহিত্যের সমার্থবাচক। আলঙ্কারিকরা সংস্কৃত কাব্যকে দু’ভাগে ভাগ করেছেন—দৃশ্য ও শ্রব্য। বলা বাহুল্য, নামকরণ থেকেই এদের পার্থক্য অহুমুখে—আবুস্তি বা পাঠগুণে যে কাব্য উপভোগ করা হয় তা ‘শ্রব্য’, আর যে কাব্য রঙ্গমঞ্চে নট কর্তৃক অভিনয় হেতু দর্শনীয় তা ‘দৃশ্য’।^১ এখন ‘অভিনয়’ কী? শাস্ত্রমতে রামপ্রমুখ নায়কদের অবস্থার অমুকরণই অভিনয়^২। অঙ্গভঙ্গীর সাহায্যে কথোপকথনের দ্বারা বেশভূষা সংগ্রহ করে বা দুঃখ-বেদনা প্রকাশের মাধ্যমে সত্ত্বগুণের উদ্বেক করে এই অভিনয় করা হ’তো।^৩

দৃশ্যকাব্যের প্রধান বিভাগ দু’টি—রূপক ও উপরূপক। লক্ষণের ভিন্নতার জন্য রূপকের দশটি ও উপরূপকের আঠারোটি উপবিভাগ স্বীকার করা হয়েছে। অলঙ্কার-শাস্ত্রের পরিভাষায় ‘নাটক’ দৃশ্যকাব্যের রূপক শাখারই

১ সাহিত্যদর্পণ—বিশ্বনাথ কবিরাজ—৬২৭৫

২ ঐ

৩ ঐ

একটি উপশাখামাত্র।^৪ কিন্তু যেহেতু ‘নাটক’ শব্দটি ও তার ব্যঞ্জনার সঙ্গে আমরা মোটামুটিভাবে পরিচিত সেহেতু এই গ্রন্থের প্রায় সর্বত্র ‘ড্রামা’ বা ‘দৃশ্যকাব্য’ বোঝাতে সাধারণভাবে এই শব্দটিই ব্যবহার করা হচ্ছে। এবার অলঙ্কার-শাস্ত্রে নাটকের বিষয়বস্তু ও গঠনপদ্ধতি সম্বন্ধে কি বলা হয়েছে দেখা যাক। কোনো বিখ্যাত বৃত্তান্তকে অবলম্বন করে গড়ে উঠবে নাট্যকাহিনী। নাটকের নায়ক হবেন ধীরোদাত্ত, গুণবান রাজা বা উচ্চবংশীয় কোনো বীরপুরুষ। দৃশ্যকাব্যে নায়ক-নায়িকা ছাড়াও উল্লেখ্য চরিত্র হিসাবে নায়িকার সখীরা (শকুন্তলা নাটকে অননুয়া-প্রিয়ংবদা, ‘রত্নাবলী’তে সুসংগতা ইত্যাদি), রাজার পার্শ্বচর বিদূষক (বসন্তক, মাধবক), এমন কি কোনো কোনো নাটকে খলনায়কের (মুচ্ছকটিকে শকার) উপস্থিতি লক্ষণীয়। অনেক নাটকে আবার মূলকাহিনীর পাশাপাশি একটি উপকাহিনীও নাট্যরসকে ঘনীভূত করার পথে সহায়তা করেছে।^৫ ‘শৃঙ্গার’ বা ‘বীর’ কোনো একটি রসের প্রাধান্য থাকলেও অগ্ৰাণ্য রসও অপ্রধানভাবে থাকতে পারে। অঙ্কসংখ্যা হবে পাঁচ থেকে দশ। মুখ-প্রতিমুখ-গর্ভ-বিমর্ষ-নির্বহণ নামে পাঁচটি নাটকীয় অঙ্ক থাকবে—এক কথায় এগুলিকে বলা হয় ‘পঞ্চসন্ধি’। এগুলি আসলে নাটকীয় কথাবস্তু তথা প্লটের অগ্রগতির পথে পাঁচটি স্তর। মুখসন্ধিতে যে কাহিনীর উন্মোচন, প্রতিমুখ ও গর্ভসন্ধিতে তা আরও বিকশিত। তারপর যেখানে আপাতসমাপ্তির সম্ভাবনা দেখা দিলেও ঘটনার গতি সহসা পরিবর্তিত হয়ে জটিলতর আকার ধারণ করে তখনই বিমর্ষ-সন্ধি আর নির্বহণ-সন্ধিতে সব জটিলতার অবসানে নাট্যকারের অভীষ্ট পরিসমাপ্তি সাধিত হয়। শকুন্তলা নাটকে দৃশ্যস্তরের আশ্রমে আগমন, শকুন্তলার সঙ্গে সাক্ষাতে প্রেমের বীজ বপনের দ্বারা প্লটের প্রাথমিক স্তরবিগ্ৰাস—পরে নানা ঘটনার মাধ্যমে সখীদের সহায়তায় এই আকর্ষণ আরও বিকশিত; ৩য় অঙ্কে শকুন্তলাকে দৃশ্যস্তরের গান্ধর্বরীতিতে বিবাহের দ্বারা গর্ভসন্ধি পূর্ণিফুটিত। কিন্তু ৪র্থ অঙ্কে দুর্বাসার অভিশাপ ঘটনার গতিকে পরিবর্তিত করে দিল—মিলনের পথে দেখা দিল অন্তরায়। অবশেষে বিচ্ছেদ-দহনে পরিশুদ্ধির পর সপ্তমাঙ্কে রাজা

৪ রূপক—নাটক, প্রকরণ, ভান, ব্যায়োগ ইত্যাদি। উপরূপক—নাটিকা, সট্টক ইত্যাদি।

—সাহিত্য দর্পণ—বিখনাথ কবিরাজ।

৫ যেমন ‘মালতী-মাধব’—মকরন্দ-মদয়ন্তিকা—ভবভূতি।

দৃশ্যস্তের সঙ্গে সপুত্র শকুন্তলার বাঞ্ছিত মিলন সম্ভব হলো—এখানেই নির্বহণ-সন্ধি ।

সংস্কৃত নাটকে হত্যা, মৃত্যু, যুদ্ধ, দূরাহ্বান বা কোনো অশ্লীল ব্যাপার নিষিদ্ধ ; সাধারণতঃ এখানে ট্রাজেডিও অল্পপস্থিত । [অবশ্য নাট্যকার ভাস অনেক ক্ষেত্রে এই নিয়ম লঙ্ঘন করেছেন—যথাস্থানে তা আলোচিত হবে ।] আরম্ভে নান্দীপ্লোকের মাধ্যমে দেব-ব্রাহ্মণ-রাজার স্তুতিকথন ও আশীর্বাদ প্রার্থনার পর সূত্রধার নটীর সঙ্গে কথোপকথনের সাহায্যে নাট্যবস্তু উপস্থাপিত করেন । যেমন শকুন্তলা নাটকের ‘প্রস্তাবনা’তে দেখি—সূত্রধার এসে পত্নী নটীকে বলছেন—‘এই বিদগ্ধ দর্শকমণ্ডলীর সামনে কালিদাস-বিরচিত শকুন্তলা নাটকের অভিনয় হবে । তার আগে তুমি একটি গান গাও ।’ নটীর গান শুনে সূত্রধার মুগ্ধ ও তন্ময় হয়ে আছেন । এমন সময়ে নটী নাটকের কথা মনে করিয়ে দেওয়ায় সূত্রধার বললেন—‘মনোহারী এই সঙ্গীত আমার চিত্তকে দূরে টেনে নিয়ে গিয়েছিল, যেমন করে রাজা হৃষীক্স বেগে ধাবমান মৃগকে অহুসরণ করে আশ্রমের দিকে আকৃষ্ট হয়ে আসছেন ।’^৬ এরপরই সূত্রধারের বর্ণনা অহুসারে দৃশ্যস্তের মধ্যে আগমন ঘটল ।

ভাষার ক্ষেত্রে দেখা যায় নায়ক ও অগ্রাণু প্রধান পুরুষ-চরিত্রের ব্যবহৃত ভাষা সংস্কৃত হলেও সাধারণতঃ নারীদের ও নিম্নস্তরের পুরুষচরিত্রদের কথোপকথনের মাধ্যম প্রাকৃত । প্লোকগুলির যোগসূত্র অবশ্য গাঢ় । সাধারণতঃ নারী ও নিম্নস্তরের পুরুষচরিত্রের মুখে প্রাকৃতভাষা ব্যবহৃত হয়েছে । নাটকের শেষে থাকে স্বস্তিবাচন যার আলঙ্কারিক পরিভাষা ‘ভরতবাক্য’ । সংক্ষেপে এইগুলিই সংস্কৃত নাটক রচনার তত্ত্বগত দিক্ । এই বৈশিষ্ট্যগুলিই প্রমাণ করে যে সংস্কৃত নাট্যরচনা ছিল যথেষ্ট নিয়মবদ্ধ ও পরিশীলিত ।

সংস্কৃত নাটকের উৎপত্তি

যে-কোনো সার্থক শিল্পকৃষ্টির মূলে থাকে এক প্রাথমিক সূচনার ইতিহাস, যা বিকাশের ধারা বেয়ে স্বপরিণতির পথে পৌঁছাতে সমর্থ । কিন্তু সংস্কৃত নাট্যরচনার উৎস খুঁজতে গিয়ে উৎসাহীদের হতাশ হতে হয় এই কারণে যে সবচেয়ে পুরাতন নাটক হিসাবে পরিচিত অশ্বঘোষ বা ভাসের রচনাও এত

সুগঠিত ও পরিণত আঙ্গিকবিশিষ্ট যে এই সমস্ত রচনা নাটকের সূচনা হতে পারে না। তবে কোথায় সংস্কৃত নাটকের উৎপত্তি? ভারতের ‘নাট্যশাস্ত্রে’ এই প্রশ্নকে বলা হয়েছে যে, দেবাসুর-যুদ্ধে জয়ী হয়ে দেবতারা এক বিজয়োৎসব করেন; উৎসবে ঐ যুদ্ধের অনুকরণ করা হয়। এই অনুকরণ দেখে সকলেই আনন্দিত হন, আর এর থেকেই নাট্যের উৎপত্তি। ক্রমে ইন্দ্রের অনুরোধে স্বয়ং ব্রহ্মা ঋগ্বেদ থেকে কথোপকথন, সাম থেকে সঙ্গীত, যজুস্ থেকে অভিনয় আর অথর্ববেদ থেকে রস ও অনুভূতি গ্রহণ করে নটরাজের তাণ্ডব ও পার্বতীর লাস্যনৃত্যের সমবায়ে গঠন করলেন এই নাট্যবেদ বা পঞ্চমবেদ যাতে ব্রাহ্মণ-ক্ষত্রিয়-বৈশ্য-শূদ্রের সমান অধিকার স্বীকৃত হ’লো। পরে মহর্ষি ভারত ‘নাট্যশাস্ত্র’ প্রণয়ন করে পৃথিবীতে জনগণের শিক্ষার্থে এই নাট্যকলা প্রচার করেন। অতএব শাস্ত্র অনুসারে নাট্যের উৎপত্তি দেবলোকে।^৭ বলা বাহুল্য, যুক্তিশীল মন এই দৈব উৎপত্তির মতবাদে সায় দেয় না; এইজন্মে আধুনিক যুগে প্রাচ্য ও পাশ্চাত্য পণ্ডিতেরা বিচার ও বিশ্লেষণের সাহায্যে নিজ নিজ দৃষ্টিভঙ্গি অনুসারে এই সম্পর্কে বুদ্ধিগ্রাহ্য সিদ্ধান্তে উপনীত হওয়ার চেষ্টা করেছেন। নানা মূনির নানা মত সত্ত্বেও এই জাতীয় কয়েকটি সিদ্ধান্তের কথা এখানে আলোচনা করা যাক।

সংস্কৃত নাটকের উৎস-সন্ধানে যাত্রা করে দেখা যাচ্ছে প্রাচীনতম রচনা ঋগ্বেদে এমন কতগুলি সূক্ত (মন্ত্রসমষ্টি) আছে যেগুলিকে বলা চলে সংবাদসূক্ত (dialogue hymn)^৮। যম-যমী, পুরুষবা-উর্বশী, পণি-সরমা ইত্যাদি সূক্তগুলি পারস্পরিক সংলাপের আকারে পরিবেশিত। নাটকেও সংলাপেরই প্রাধান্য; অতএব এই সূক্তগুলিতে নাট্যসাহিত্যের বীজ নিহিত—এমন কথা মনে করা নিশ্চয় অগ্রায় নয়। মনীষী কীথ^৯ ও তাঁর অনুসরণে হার্টেল (Hertel) এই মতবাদে বিশ্বাসী। আবার অনেকে মনে করেন যে বৈদিক কর্মকাণ্ডে অর্থাৎ যাগযজ্ঞ-প্রধান ক্রিয়াকলাপে অনেক সময় নাচগান ও অভিনয়মূলক অনুষ্ঠান হ’তো। যেমন সোমযাগে কলহ ও যুদ্ধের অভিনয় করে বিক্রেতার কাছ থেকে ক্রেতা বলপূর্বক সোমলতা সংগ্রহের পর যজ্ঞ নিষ্পন্ন করতেন।

৭ নাট্যশাস্ত্র—ভরত, ১, ১, ৭৫

৮ ঋ. সং ১০-১০, ২৫, ১০৮

৯ Sanskrit Drama—Keith, p. 15

মহাব্রত^{১০} যাগে অহুষ্ঠিত একথণ্ড চর্মের অধিকার নিয়ে বৈশ্ব ও শূজের ছন্দ বিবাদ ও পরে বৈশ্বের জয়লাভ—ইত্যাদি ব্যাপারগুলিও ধর্মাহুষ্ঠানের অভিনয়-মূলক অঙ্গ। কিন্তু এই আহুষ্ঠানিক বিষয়গুলিকে (Ritual Drama) নাটকের উৎস বলে স্বীকার করে নিতে অনেকেই অক্ষম। তাঁরা বলেন, মাহুষ্ণের জীবনের স্বাভাবিক রসাহুভূতির ফলেই নাটকের জন্ম। অতএব ধর্মকে এর মধ্যে টেনে আনা যুক্তিযুক্ত হবে না। অধ্যাপক হিলব্রান্ট, স্টেনকোনো প্রমুখ পণ্ডিতেরা নাটকের উৎপত্তির ক্ষেত্রে শুধুমাত্র এই ধর্মীয় আহুষ্ঠানের প্রাধাত্তের কথা অস্বীকার করেছেন। পুতুলনাচ^{১১}, ছান্নানৃত্য^{১২}—এগুলিকেও অনেকে নাটকের আদিক্রপ হিসাবে নির্দেশ করেছেন। তাঁরা মনে করেন, নাটকে স্বজ্ঞধারের উপস্থিতি তো পুতুলনাচের স্বজ্ঞধারণের অমুবর্তন। বেবর (Weber) প্রমুখ পণ্ডিতেরা আবার সংস্কৃত নাট্যসাহিত্যের ওপর গ্রীক প্রভাব প্রমাণিত করার চেষ্টা করেছেন। তাঁদের মতে আলেকজান্ডারের ভারত আক্রমণের পর ভারত গ্রীক-সান্নিধ্য লাভ করে। পশ্চিম ভারতে যে গ্রীক উপনিবেশ গড়ে ওঠে সেখানেই প্রথম নাটকের অভিনয় হয়। এই ভাবে গ্রীক নাটকের প্রভাবেই গড়ে ওঠে সংস্কৃত নাটক। উজ্জয়িনী ও আলেকজান্দ্রিয়ার মধ্যে যোগস্বজ্ঞও প্রমাণিত। সংস্কৃত নাটকে ব্যবহৃত ‘যবনিকা’, ‘যবনী’ ইত্যাদি শব্দের প্রয়োগ, আংটি-সংগমমণিজাতীয় অভিজ্ঞানের ব্যবহার, আখ্যানগত সাদৃশ্য—যেমন অজ্ঞাতপরিচয় যুবতীর প্রতি নায়কের আকর্ষণ, নায়িকার ছন্দপরিচয়ে অবস্থান, অবশেষে বহু বাধাবিপত্তির পর বাঞ্জিত মিলন—ইত্যাদি ঘটনাগুলি এঁদের মতে গ্রীক প্রভাবের ছোতক। কিন্তু এখানে মনে রাখা দরকার যে ‘যবন’ শব্দটি শুধু ‘গ্রীক’ অর্থ বোঝাতেই নয়, সেকালে গ্রীস অধিকৃত পারশ্ব-ব্যাক্ট্রিয়া-সিরিয়া প্রভৃতি দেশের অধিবাসী সম্বন্ধেও প্রযুক্ত হ’তো। দ্বিতীয়তঃ, তখনকার গ্রীসীয় নাটকের অভিনয়ে যবনিকার ব্যবহার ছিল বলে কোথাও উল্লেখ নেই। প্রসিদ্ধ প্রাচ্যবিজ্ঞাবিদ সিলভা-লেভি বলেন, সম্ভবতঃ পারশ্ব থেকে আনীত পরদা ‘যবনিকা’ আখ্যা পেয়েছিল। আবার গ্রীক নাটকের স্থান-কাল-ঘটনাগত ঐক্যের ব্যাপারটিও সংস্কৃত নাটকে অমুসৃত হয়নি। নায়কদের স্বর্গমর্ত্য

১০. শ, সং—৩.৪, ৫, পঞ্চ-বিং ব্রাহ্মণ—৫৫-১৪

১১, ১২ Pischel, Lüders

অবাধ-গতি, দু'টি ঘটনার ভিতর দীর্ঘ সময়ের ব্যবধান অ্যারিস্টটেলীয় ত্রিমুখী ঐক্যনীতির বিপরীত। তাছাড়া, সাদৃশ্য থাকলেই অম্লকরণ মনে করা চলে না। প্রকৃতপক্ষে গ্রীক-প্রসঙ্গ আলোচনায় মূল বক্তব্য থেকে সরে আসা হয়েছে। প্রশ্নটি আসলে প্রভাব-সংক্রান্ত নয়, প্রশ্নটি উপস্থিতির। গ্রীক নাটক দেখে এসে এদেশের কবি নাটক রচনা করতে শিখলেন—এ কেবল অহুমান ও কল্পনা; যুক্তি এর মধ্যে বিশেষ কিছু নেই। যারা বেদ-উপনিষদের মত জ্ঞানগর্ভ গ্রন্থ, ব্যাকরণ-ছন্দ-জ্যোতিষ-অঙ্গকারের মত বিভিন্ন শাস্ত্র ও কাব্য-রচনায় অসামান্য প্রতিভার পরিচয় দিলেন, তাঁরা শুধু নাটক-রচনার জগ্ৰেই পাশ্চাত্যের দ্বারস্থ হবেন—এমন সিদ্ধান্ত একদেশদর্শিতার নামাস্তর নয় কি ?

বস্তুতঃ খৃঃ পূঃ দ্বিতীয় শতকের আগেও যে নট এবং নাট্যের অস্তিত্ব ছিল তার প্রমাণ পাণিনি-পতঞ্জলি প্রমুখ বৈয়াকরণরা। খৃঃ পূঃ চতুর্থ শতকে পাণিনি নটশূত্র অর্থে ‘শৈলালিন্’ শব্দের উল্লেখ করেছেন। খৃঃ পূঃ দ্বিতীয় শতকে পতঞ্জলির ‘কংসং ঘাতয়তি’, ‘বলিং বন্ধয়তি’ ইত্যাদি প্রয়োগ পৌরাণিক কৃষ্ণ-কাহিনীর অভিনয় এবং ‘নটশূ গাথাং শৃণোতি’, ‘গ্রন্থিকশূ শৃণোতি’ ইত্যাদি প্রয়োগ নটকর্মের অস্তিত্বের পরিচয় বহন করে। পতঞ্জলির দৃষ্টান্ত থেকে বর্তমান দশকের বিবুধ সমালোচক যে মত প্রকাশ করলেন তা হচ্ছে দৃশ্য-কাব্য প্রয়োগের রীতি ছিল তিনটি—নৃত্যাভিনয়, পুতুলনাচ ও কথকতা। শোভনিকেরা যথাযথ বেশভূষা করে পৌরাণিক কাহিনীর নৃত্যাভিনয় দেখাতেন, পুতুল প্রদর্শনী বা চিত্রের মাধ্যমে এই ঘটনাস্তলিই সাধারণে প্রদর্শিত হ'তো, আর গ্রন্থিকেরা কাহিনী পাঠ করে শোনাতে।^{১৩}

নাট্যসাহিত্যের বিকাশের ক্ষেত্রে রামায়ণ-মহাভারতের প্রভাব অপরিণীম। নাটকের কাহিনীর জগ্ৰে প্রায় সমস্ত নাট্যকারই এই দু'খানি গ্রন্থের আশ্রয় নিয়েছেন। ভাস-কালিদাস-ভবভূতি-রাজশেখর প্রমুখ নাট্যজগতের দিক্‌পালরা কথাবস্তু চয়নে এই গ্রন্থ দু'খানিকে এড়িয়ে যেতে পারেন নি। ‘নট’ শব্দটির উপস্থিতি মহাভারতে দেখা যায়; অবশ্য অভিনেতা অর্থেই এই শব্দের প্রয়োগ কি না এ বিষয়ে সকলে একমত নয়। ‘গীতা’ বা মহাভারতের প্রসিদ্ধ অংশটি কথোপকথন-জাতীয়—অজুন ও শ্রীকৃষ্ণের প্রস্নোত্তর। বস্তুতঃ

সমগ্র মহাভারতটিই স্মৃতির বক্তব্যরূপে বিদ্যুত। বাঙ্গালীর পরিচালনায় রামায়ণ গান করেছিলেন ‘লবকুশ’; নাটকীয় পাত্রপাত্রীকেও বলা হ’তো ‘কুশীলব’। অবশ্য নাটকের অস্তিত্ব সম্বন্ধে মূল রামায়ণ-মহাভারতে কোনো সুস্পষ্ট প্রমাণ পাওয়া যায় না।

বাহ্য প্রমাণ যাই থাক, নাটকগুলির আভ্যন্তর বিশ্লেষণ সংস্কৃত নাটকের প্রকৃতি নির্ণয়ে সহায়তা করবে। প্রকৃতই রাজসভার পৃষ্ঠপোষিত সংস্কৃত কাব্যের (Court Poetry) বহু লক্ষণই নাটকে বিদ্যমান। সেই কৃত্রিম প্রকাশভঙ্গী, সেই বর্ণনাবাহুল্য, সেই ছন্দো-বন্ধন, অলঙ্কার-প্রয়োগ ও অলঙ্কার-শাস্ত্রের বিধান অনুসারে শৃঙ্গারাদি রসসৃষ্টি। সেই রকমই রাজা বা উচ্চবংশীয় নায়ক-নায়িকার প্রাধাণ্য। বৈশিষ্ট্য শুধু কাহিনীর কিছু নাটকীয় গতি, কখনও বা সংঘাত এবং বিদূষক-জাতীয় চরিত্রের হাস্যরস-সৃষ্টির মাধ্যমে নাটকীয় অবকাশ (dramatic relief) ইত্যাদি। অর্থাৎ দৃশ্যকাব্য শুধু কাব্য নয়, কাব্য এবং আরও বেশী কিছু। আলোচিত মতগুলির বিশেষ একটিকেই এর উৎপত্তির কারণ হিসাবে নির্দেশ করা চলে না। সংক্ষেপে বলতে গেলে, বেদে যা ছিল বীজাকারে, রামায়ণ-মহাভারতের রসধারায়, গ্রীকসংযোগের অনুকূল বায়ুস্পর্শে, সর্বোপরি ভারতীয় প্রতিভা-স্বর্ধের আলোকে সেই নাট্যমহীকৃৎসের বিকাশ। ভারতীয় নাট্যশাস্ত্রের মতবাদের অলৌকিকঐচ্ছিক বাদ দিলে এই মত বহুলাংশে গ্রহণযোগ্য। নাট্যরস ও কাব্যধর্ম—এই দু’য়ের স্রষ্টা সমন্বয়ে সংস্কৃত দৃশ্যকাব্য সার্থক শিল্পে উদ্ভার্ণ।

২

এই সাহিত্যকর্মের প্রাচীনত্ব সম্বন্ধে আলোকপাত করতে গেলে নাট্য-কারদের কালানুক্রমিক আলোচনার প্রয়োজন আছে। কিন্তু সংস্কৃত সাহিত্যের যে-কোনো শাখায়ই রচয়িতাদের প্রকৃত সময়-নির্ণয় দুঃসাধ্য; কারণ খুব কমক্ষেত্রেই তাঁরা নিজেদের জীবন ও সময় সম্বন্ধে উল্লেখযোগ্য বিবরণ বা স্পষ্ট ইঙ্গিত দিয়েছেন। তাছাড়া অনেক সময়ই উদ্ধার-করা পুঁথি-গুলির প্রথম ও শেষ অংশ হয় ছিন্ন, নয় কীটদষ্ট অবস্থায় পাওয়া গেছে।

অতএব বেশীর ভাগ ক্ষেত্রেই সম্ভব হয় অল্পমান, নয়তো প্রচলিত কিংবদন্তীগুলি ।
তবুও পণ্ডিতবর্গ নানা যুক্তি-প্রমাণের উপর নির্ভর করে সত্যে উপনীত হতে
চেষ্টা করেছেন ।

অশ্বঘোষ : অশ্বঘোষের লেখা ‘সারিপুত্রপ্রকরণ’ই প্রাপ্ত সংস্কৃত নাটক-
গুলির মধ্যে প্রাচীনত্বের দাবী রাখে । কিন্তু এর পরিণত রীতি প্রমাণ করে যে
এই নাটকটিই প্রথম নাটক নয় ; নিশ্চয় অশ্বঘোষেরও পূর্বসূরি ছিলেন—কিন্তু
বহু সংস্কৃত গ্রন্থের মতো তাঁদের রচনা হয় লুপ্ত নয়তো আজও অনাবিস্কৃত ।
লক্ষণীয়, খৃষ্টীয় ১ম শতকে কুষাণ রাজত্বের সময় এই বৌদ্ধ নাটকের রচনা,
যখন ভারত গ্রীক-সংস্কৃতির ঘনিষ্ঠ সংস্পর্শে এসেছিল । এই নাটকের লুপ্ত
পুঁথি ১৯১১ খৃষ্টাব্দে মধ্য এশিয়া থেকে উদ্ধার করা হয়েছে । উদ্ধারকর্তা
প্রাচ্যতত্ত্ববিদ Lüders । নাটকটি নয় অঙ্কে বিভক্ত—‘সারিপুত্র’ ও
‘মৌদগল্যায়ন’ নামে দুই খুবক ব্রাহ্মণের বুদ্ধের কাছে দীক্ষাগ্রহণের বিষয়টিই
নাটকের প্রতিপাদ্য । এই পাণ্ডুলিপির সঙ্গে যে আরও নাটকের পাণ্ডুলিপি
ছিল তারও প্রমাণ আছে—কিন্তু খুবই শোচনীয় অবস্থার জন্ত পাঠ উদ্ধার
সম্ভব হয়নি । ‘বুদ্ধচরিত’, ‘সৌন্দর্যানন্দ’ ইত্যাদি কাব্যগুলি নাট্যকার
অশ্বঘোষের কবিত্বাতিকে সুপ্রতিষ্ঠিত করেছে । তাঁর কিংবদন্তীমূলক জীবনী
থেকে জানা যায়—সুবর্ণাঙ্গীর পুত্র ব্রাহ্মণ অশ্বঘোষ পরে বৌদ্ধধর্ম গ্রহণ করেন
ও বৌদ্ধধর্ম প্রচারের কাজে নিজেকে নিযুক্ত করেন । পাণ্ডিত্য ও ধর্মনিষ্ঠার
জন্তে তাঁকে ‘মহাকবি’, ‘আচার্য’, ‘ভদ্রস্ত’ ইত্যাদি উপাধি দেওয়া হয় । পরে
তিনি কুষাণরাজ কনিষ্কের পোষকতা লাভ করে কবি হিসাবে নিজেকে
সুপ্রতিষ্ঠিত করেন । সংস্কৃত নাট্যসাহিত্যের ইতিহাস তাঁকে দিয়েই শুরু ।

অশ্বঘোষের নয়-অঙ্কবিশিষ্ট এই নাটকে গদ্য ও পদ্য দু’য়েরই মিশ্রণ আছে ।
বুদ্ধ সারিপুত্র, মৌদগল্যায়ন ইত্যাদি মুখ্য চরিত্রের ভাষা সংস্কৃত হলেও বিদূষকের
ভাষা প্রাকৃত । অতএব দেখা যাচ্ছে, ভরতের নাট্যাঙ্গ অল্পসারে পরবর্তী
সংস্কৃত নাটকেও যেমন এখানেও তেমনি অত্যাগ্র রীতিপদ্ধতি প্রায় সবই পালিত
হয়েছে, এমন কি গদ্য-পদ্যের ও সংস্কৃত প্রাকৃতের মিশ্রণও আছে । শুধু তাই
নয়, বিদূষকের উপস্থিতি অশ্বঘোষের নাটকেই লক্ষ্য করা যাচ্ছে ।

ভাস—ভাস একজন নাট্যকার, যিনি শুধুমাত্র নামেই পরিচিত ছিলেন
বিংশ শতকের প্রথম দশক পর্যন্ত । কালিদাস পূর্বসূরি হিসাবে সৌমিল

ও কবিপুত্র নামে নাট্যকারের সঙ্গে ভাসেরও নামোল্লেখ করেছেন তাঁর ‘মালবিকাগ্নিমিত্র’ নাটকে।^{১৪}

এছাড়া বাণভট্ট^{১৫} প্রমুখ আরও একাধিক সুপ্রতিষ্ঠিত কবিও ভাসের কবি-প্রতিভার প্রশংসা করেছেন। রাজশেখর^{১৬} বলেছেন, ‘ভাসের আর সব নাটক সমালোচনার অগ্নিপরীক্ষায় ভস্মীভূত হলেও স্বপ্নবাসবদন্তম্ নাটকটি অক্ষতই থেকে গেল।’ কিন্তু পণ্ডিত টি. গণপতি শাস্ত্রী দক্ষিণ ভারতে কতকগুলি পাণ্ডুলিপি উদ্ধার করে ১৯১০-১১ সালে ত্রিবাঙ্গাম থেকে ভাসের ‘নাটক চক্র’ বলে প্রকাশ করার পূর্ব পর্যন্ত তাঁর রচনা সম্বন্ধে আমরা অন্ধকারে ছিলাম। যে তেরটি নাটক তিনি এইভাবে আবিষ্কার করেন তার কতকগুলির কাহিনী মহাভারত থেকে নেওয়া (মধ্যমব্যায়োগ, পঞ্চরাত্র, দূতবাক্য, দূতঘটোৎকচ, কর্ণভার, উরুভঙ্গ), আবার কতকগুলির বিষয়বস্তু রামায়ণ থেকে সংগৃহীত (প্রতিমা-নাটক, অভিষেক নাটক)। এ ছাড়া হরিবংশ (বালচরিত) ও শুণাঢ্যের বৃহৎকথাকে অবলম্বন করে, আর নিজের কল্পিত কাহিনী দিয়ে (স্বপ্নবাসবদন্তা, প্রতিজ্ঞাযোগক্ষরায়ণ, অবিমারক, চারুদত্ত) একাধিক নাটক রচিত। গণপতি শাস্ত্রী দাবী করেন, এই তেরটি নাটকই ভাসরচিত নাটক-চক্রের অন্তর্গত। কিন্তু তাঁর বক্তব্যের প্রামাণিকতা সম্বন্ধে গবেষকদের মধ্যে যথেষ্ট মতবিরোধ দেখা দেয়। বহু দেশীয় ও পাশ্চাত্য পণ্ডিত^{১৭} শাস্ত্রীজীর দাবীকে নস্যাৎ করে দিলেন; কারণ পাণ্ডুলিপিতে কোথাও ভাসের নাম বা সন তারিখের পরিচয় নেই। তাছাড়া ভাসের নামে যে সমস্ত শ্লোক ‘সংগ্রহ গ্রন্থ’গুলিতে স্থান পেয়েছে সেগুলির অস্তিত্ব আবিষ্কৃত নাটকগুলিতে অনুপস্থিত। কিন্তু যেহেতু এঁদের যুক্তি নিতান্তই নেতিবাচক এবং আর কোনো পাণ্ডুলিপি উদ্ধার সম্ভব হয়নি যেগুলি ভাসের রচনা বলে সকলের স্বীকৃতি পেতে পারে—

১৪ প্রথিতযশসঃ ভাসসৌমিল্লকবিপুত্রাদীনাম্.....মা. মি. (১)

১৫ সুত্রধারকৃত্যারম্ভেনাটকৈর্বহুভূমিকৈঃ।

সপতাকৈর্ধশো লেভে ভাসো দেবকুলৈরিব॥

—হর্ষচরিত

১৬ ভাসনাটকচক্রেহপি ছৈকৈঃ ক্ষিপ্তে পরীক্ষিতুম্।

স্বপ্নবাসবদন্তস্ত দাহকোহভূম্ন পাবকঃ।

১৭ কাণে, বার্গেট, পিসারোডি।

সেহেতু শাস্ত্রীজীর মতের উল্লেখ্য দিকগুলিকেই আপাততঃ তুলে ধরা হচ্ছে। অবশ্য কীথ, টমাস, পরাঙ্গপে প্রমুখ বহু প্রাচ্যবিজ্ঞাবিদ শাস্ত্রীজীর মতের সমর্থন করেছেন। গণপতি শাস্ত্রীর প্রধান বক্তব্য হ'লো, উদ্ধার-করা তেরটি নাটক একই হাতের কাজ। কেননা (ক) এমন অনেক শ্লোক বা বাক্যাংশ আছে যা একাধিক নাটকেই স্থান পেয়েছে।^{১৮} (খ) প্রারম্ভিক নান্দীশ্লোক ও নাট্যাঙ্গিক ভরতবাক্য^{১৯} অনেক ক্ষেত্রে একই রকম। (গ) কালিদাস ও পরবর্তী যুগে যেখানে নান্দীশ্লোক পাঠের পর 'নান্দ্যন্তে সূত্রধারঃ' বলা হয় সেখানে এই নাটকগুলি শুরুই হচ্ছে 'নান্দ্যন্তে ততঃ প্রবিশতি সূত্রধারঃ' এই বক্তব্য দিয়ে। (ঘ) অত্যাশ্চর্য নাটকে প্রথমাংশের নাম 'প্রস্তাবনা', কিন্তু ভাস সর্বত্র ব্যবহার করেছেন 'স্থাপনা' শব্দটি। (ঙ) ভাষাগত সাদৃশ্যও লক্ষণীয়। অনেকস্থলেই অপাণিনীয় প্রয়োগ দেখা যায়। চরিত্রসৃষ্টিতেও মিল আছে, একাধিক নাটকে একই চরিত্রের উপস্থিতি, যেমন যোগন্ধরায়ণ। (চ) একাধিক ক্ষেত্রে ভরতীয় নাট্যশাস্ত্রের রীতি লঙ্ঘন করে দূরাহ্বান, বধ, যুদ্ধ ইত্যাদি মঞ্চের ওপর প্রদর্শিত হয়েছে।^{২০}

এই সমস্ত যুক্তি ও প্রমাণ থেকে এই তথ্যে উপনীত হওয়া যায় যে এই নাটকগুলি একই ব্যক্তির লেখা এবং তাঁর ভাস নামে যশস্বী কবি হতে বাধা নেই, যেহেতু রচনাগুলি তাঁর খ্যাতিরই অমূরূপ। অবশ্য অনেকে মনে করেন, উপরোক্ত বৈশিষ্ট্যগুলি দক্ষিণ ভারতীয় নাট্যরীতির প্রভাবে জাত।

শুধু কালিদাস উল্লেখ করেছেন বলে নয়, ভাসের রচনামূলক ও ভাষাও কালিদাস-পূর্বযুগের স্বাক্ষর বহন করছে। আবার অশ্বঘোষের 'বুদ্ধচরিতে'র প্রভাব ভাসের প্রতিজ্ঞাযোগন্ধরায়ণের ওপর অনেকে লক্ষ্য করেছেন। অতএব তিনি অশ্বঘোষের পরবর্তী। অবশ্য ভিণ্টারনিংসের^{২১} মতে ভাস অশ্বঘোষের চেয়ে কালিদাসের বেশী কাছাকাছি। তাঁর সময়সংক্রান্ত বিতর্কের মধ্যে না গিয়ে মোটামুটিভাবে তাঁকে অশ্বঘোষ ও কালিদাসের মধ্যে স্থান দেওয়া যেতে পারে। কিন্তু এত আলোচনা সত্ত্বেও ভাস-সমস্যার স্পষ্ট সমাধান হয়েছে একথা বলা

১৮ লিপ্যন্তর তমোহানি বর্ষভীষাঙ্কনং নভঃ (১ম অঙ্ক—বালচরিত, চারুদত্ত)

১৯ স্বপ্ননাটক, বালচরিত, দূতবাক্য।

২০ উল্লঙ্ঘ্য, অতিবেক নাটক।

২১ Winternitz, Some Problems of Indian Literature, pp. 123-24

চলে না। তবে পণ্ডিতেরা যাই বলুন, তাঁর খ্যাতি যে শুধু কালিদাস-বাণভট্টের উক্তিতেই সীমাবদ্ধ ছিল তা নয়, তাঁর সুনাম যে দণ্ডীকে অতিক্রম করে জয়দেবের কাল পর্যন্ত বিস্তৃত ছিল, তার প্রমাণ এঁদের সপ্রশংস উক্তি। ২২ প্রকাশিত নাটকগুলিও তাঁর সৃষ্টির সঙ্গে সামঞ্জস্যপূর্ণ।

কালিদাস : এবার আসা যাক সংস্কৃত সাহিত্যাকাশের সূর্য কালিদাসের প্রসঙ্গে। ‘কুমারসম্ভব’-‘রঘুবংশ’ মহাকাব্যদ্বয়, মেঘদূত-শতসংহার ধরনের গীতিকাব্যগুলি বাদ দিলেও ‘অভিজ্ঞানশকুন্তলম্’ ‘মালবিকাগ্নিমিত্রম্’, বিক্রমো-বশীষম্—এই তিনখানি দৃশ্যকাব্যের জন্মেই তিনি অমরত্বের দাবী করতে পারেন। এগুলির মধ্যে শ্রেষ্ঠ নিঃসন্দেহে শকুন্তলা নাটক। গ্যোটের সপ্রশংস উক্তি^{২৩} ও তাকে অবলম্বন করে রবীন্দ্রনাথের সূচিস্থিত মূল্যায়ন সাহিত্যরসিক মাত্রেই স্ববিদিত। পাশ্চাত্য ও আধুনিক সমালোচকদের উচ্চপ্রশংসা বাদ দিলেও প্রাচীন বিদ্বজ্জনদের কাছেও এই নাটকের সমাদর ছিল অপরিসীম। উচ্চকণ্ঠেই তারা ঘোষণা করেছেন, ‘কালিদাসের সর্বশ্ব এই অভিজ্ঞান শকুন্তলা’।^{২৪} তাঁরা আরও বলেছেন, কাব্যের মধ্যে শ্রেষ্ঠ নাটক, নাটকের মধ্যে শ্রেষ্ঠ শকুন্তলা, আবার এই নাটকের মধ্যেও উত্তম অংশ চতুর্থ অঙ্কটি যেখানে শকুন্তলা বিদায় নিচ্ছেন আশ্রমজীবন থেকে। কিন্তু প্রাচী-প্রতীচী নির্বিশেষে সকলেরই কালিদাস সম্বন্ধে কেন এই স্তুতিভাষণ? বস্তুত তাঁর কাব্যসৃষ্টির চমৎকৃতির জন্মেই। যথাস্থানে যথাযথ উপমা প্রয়োগ (‘উপমা কালিদাসস্ত’), প্রকৃতির সঙ্গে একাত্মতা, সৌন্দর্যপ্রীতি, মানবিকতা-বোধ ইত্যাদি দিকগুলিকে আলাদাভাবে তুলে ধরে কালিদাসের প্রকৃত মূল্যায়ন সম্ভব নয়। যে কখনও তৃষ্ণা নিবারণের জন্ত জলপান করেনি তাকে কি ‘হাইড্রোজেন-অক্সিজেন’ নামে দু’টি গ্যাসের মিলনে জলের সৃষ্টি হয় এই জাতীয় বিশ্লেষণধর্মী জ্ঞান দান করে জলের স্বরূপ বোঝান সম্ভব? তেমনি কালিদাসের সাহিত্যের সঙ্গে পরিচয় ব্যতীত শুধুমাত্র কাব্যগুণের বিশ্লেষণের মাধ্যমে সামগ্রিক রস গ্রহণের আশা দুর্ভাষা।

২২ ভাসো হাসঃ—গ্রীঃ ১৩ শতকের কবি জয়দেবের প্রসন্নরাঘব।

২৩ প্রাচীন সাহিত্য—রবীন্দ্রনাথ—শকুন্তলা। কেহ যদি তরুণ বৎসরের ফুল ও পরিণত বৎসরের ফল, কেহ যদি স্বর্গ ও মর্ত একত্রে দেখিতে চায় তবে তাহা শকুন্তলায় পাইবে।”

২৪ কালিদাসস্ত সর্বশ্বমভিজ্ঞানশকুন্তলম্।

ধাত্রী এসে এই অবস্থা থেকে তাঁদের উদ্ধার করে। সাদরে দু'জনকে নিয়ে যাওয়া হলো। শয়নগৃহে—যেখানে রচিত হয়েছে বাসর শয্যা। এক সংগে দু'জনে হেঁটে চললেন কয়েক পা—অতএব বিবাহের সপ্তপদী অনুষ্ঠান তো এখানেই সারা! রাজদম্পতীর অগোচরে ধাত্রী ও সখীর সহায়তায় রাজকন্যা লাভ করলেন আকাজিক প্রিয়সঙ্গ।—কিন্তু ‘শ্রেয়াংসি বহুবিস্তানি’। অল্পকাল পরেই রাজার কানে এলো নানা রকম কানাঘুসা—কন্যাস্তম্ভপুরের পবিত্রতা নাকি কোনো অবাস্তিত অতিথির আগমনে নষ্ট হতে বসেছে—ফলে পাহারার ব্যবস্থা খুবই কড়াকড়ি করা হলো। আবিমারক তো কোনো মতে পালিয়ে বাঁচলেন—রাজকন্যার অবস্থা হয়ে উঠলো খুবই শোচনীয়।

দিন যায়। প্রিয়া-বিচ্ছেদে আবিমারক খুবই কাতর হয়ে পড়েন—কুরংগীহীন জীবন তাঁর কাছে অর্থহীন—অবশেষে পর্বতশিখর থেকে ঝাঁপ দিয়ে প্রাণত্যাগ করাই স্থির করেন। নগরোপাস্তুর পর্বতে এসে স্নান করে ইষ্টমন্ত্র জপ করতে করতে প্রস্তুত হচ্ছেন আসন্ন চরম মুহূর্তটির জন্তে—এমন সময় আকাশপথে বিচরণশীল এক বিদ্যাধর দম্পতী বিশ্বামের প্রয়োজনে সেখানে উপস্থিত। চমকিত আবিমারক পরিচয় জিজ্ঞাসা করে জানতে পারলেন ইনি মেঘনাদ নামে বিদ্যাধর, সংগে পত্নী সৌদামিনী। ওদের গন্তব্য মলয় পর্বত কারণ সেখানে আজ বিদ্যাধরদের উৎসব। এবার আবিমারকের আত্মপরিচয় দানের পালা। মৃত্যুর পূর্বে মিথ্যাভাষণ অনুচিত—অতএব বাধ্য হয়েই সত্য পরিচয় প্রকাশ করেন—‘সৌবীর রাজপুত্রোহবিমারকো নামাস্মি।’ বিদ্যাধর—‘এখানে একাকী আগমনের হেতু কি?’ আবিমারক নিরুত্তর। বিদ্যাধর তখন দৈবী ক্ষমতায় সহজেই জানতে পারলেন সব ঘটনা। সহানুভূতি জাগে তাঁর অন্তরে। সাহায্যের ইচ্ছায় আবিমারককে একটি অংগুরীয়ক দান করে তিনি বললেন—‘এইটি দক্ষিণ হস্তের অনামিকায় ধারণ করলে অদৃশ্য হওয়া যাবে, আবার বাম করে অর্পণ করলে পূর্বরূপ ফিরে আসবে।’ আর দিলেন একটি উজ্জ্বল দৈব

খড়া! অবিমারক আন্তরিক কৃতজ্ঞতায় বিদায় জানালেন সেই বিদ্যাধরদম্পতীকে। আপাততঃ তাঁর প্রাণত্যাগের স্বপক্ষে কোনো যুক্তি নেই কারণ এই মায়া-অংগুরীয়কের সাহায্যে তিনি সহজেই কুরংগীর কাছে উপস্থিত হতে পারবেন। বিদূষকও তাঁকে খুঁজতে খুঁজতে সেই স্থানে এসে পৌঁছেচে—অবিমারক সখার কাছে সমস্ত ঘটনা বিবৃত করেন। এবার মায়া-অংগুরীয়কের বাস্তব প্রয়োগ—এটি পরে অবিমারক নিজেই শুধু অদৃশ্য হলেন না, হস্ত স্পর্শে বিদূষককেও অদৃশ্য করে নিয়ে রওনা দিলেন রাজপুরীর উদ্দেশ্যে। এতদিন রাত্রির অন্ধকারেও যেখানে প্রবেশ দুঃসাধ্য ছিল সেখানে দিবালোকে সখাসহ নিঃশঙ্কচিত্তে ঢুকে পড়লেন—অংগুরীয়কের এমনই প্রভাব!

বর্ষা সমাগত। এ সময় সুখী-মানুষের মনই উতলা হয়ে পড়ে, বিরহক্লিষ্টা রাজকন্যার কথা তো বলাই বাহুল্য! অতি করুণ তাঁর অবস্থা; পরিজনেরা বকুল-কদম্ব-কেয়া বর্ষার নানা ফুল এনে তাঁর মনোরঞ্জন চেষ্টা করে—অংগে দেয় কালাগুরু ও চন্দনের প্রলেপ—কিন্তু তাঁর বিরহতাপের লাঘব হয়না বিন্দুমাত্রও। ঘনমেঘে নববর্ষণের সংকেত—রাজকন্যার মনে জাগে এই নব বর্ষার ধারাজলে স্নানের অভিলাষ। নলিনিকা গেল স্নানের উপকরণ আনতে। একাকিনী রাজকন্যা মর্মপীড়ায় ব্যাকুলা—দয়িতের চিন্তায় বিবশা। হঠাৎ শোনা যায় মেঘের ঘনঘোর গর্জন—ভীত, চমকিত হয়ে চীৎকার করে ওঠেন তিনি—‘পরিত্রায়স্ব, পরিত্রায়স্ব মাম্’—রক্ষা কর, রক্ষা কর আমাকে। আত্মপ্রকাশের এই সুযোগের অবহেলা করলেন না অবিমারক—বাম করে অংগুরীয়ক ধারণ করে শরীররূপ ফিরে পেয়েই গাঢ় আলিঙ্গনে আবদ্ধ করলেন রাজকন্যাকে। সব জ্বালা যেন মুহূর্তেই জুড়িয়ে গেল। ইতিমধ্যে নলিনিকা প্রত্যাগতা—রুদ্ধ ছয়ার খুলে দিল বিদূষক। স্তম্ভিত নলিনিকা—কি করে এই সুরক্ষিত ভবনে এঁদের আগমন সম্ভব হলো? সব বৃত্তান্ত শোনার আশায় সে

বিদুষককে ধরে নিয়ে চললো সখীদের মহলে। কুরংগীর কাছে একা অবিমারক। বাইরে নববর্ষণ স্নাতা পৃথিবী—গৃহাভ্যন্তরে বাঞ্ছিত প্রিয়মিলন লাভ করে থাণ্ডা রাজকন্যা।

বৈরন্তী নগরীর এই রাজপরিবার মহাসমস্তার সম্মুখীন। বাল্যে রাজকন্যা সৌবীররাজকুমারের উদ্দেশ্যে বাগ্‌দত্তা হয়েছিলেন—কিন্তু বেশ কিছুদিন ধরে এঁদের কোন খোঁজ না পাওয়ায় কাশীর রাজ-পুত্রকেই কুরংগীর পাত্র হিসাবে নির্বাচন করতে বাধ্য হয়েছেন রাজা ও রাণী। পাত্র জয়বর্মাসহ অন্তঃপুরাধ্যক্ষ ভূতিক কাশী থেকে ফিরে এসেছেন—এবার বিবাহ-পর্ব সমাধা হবে। রাজ্ঞীকেও বাধ্য হয়েই জয়বর্মাকে জামাতারূপে মেনে নিতে হয়েছে—কারণ কতদিন আর অপেক্ষা করা চলে নিরুদ্দিষ্ট সৌবীররাজ পরিবারের আশায়? বিষণ্ণ মনে ধাত্রী চিন্তা করে—‘কি করা যায় এখন’? এই সংকট মুহূর্তে নলিনিকা এসে রাজ্ঞীকে জানায়—‘সৌবীররাজ্যের মন্ত্রীরা কাছ থেকে দূত এসেছে—সে বলছে—আমাদের রাজা তোমাদের নগরেই স্ত্রীপুত্রসহ গোপনে বাস করছেন—এই তথ্য গুপ্তচর বহকটে সংগ্রহ করেছে।’ মহারাজ কুস্তিভোজ বাল্যসখা সৌবীররাজের সংবাদ শোনারাত্রি বেরিয়ে পড়লেন তাঁর সন্ধানে। সৌবীররাজেরও প্রয়োজন ফুরিয়েছে আত্মগোপনের—তিনিও সহজেই মিলিত হলেন কুস্তিভোজের সংগে! সকলেই উৎসুক আগ্রহে জানতে চায়—‘কি কারণে সপরিবারে তাঁর এই আত্মগোপন?’ বিবৃত করে চলেন সৌবীররাজ—‘চণ্ডভার্গব নামে এক কোপনস্বভাব ঋষির শিষ্য বাঘের হাতে নিহত হয়—ঠিক সেই সময় আমি যুগয়ার উদ্দেশ্যে সেখানে উপস্থিত ছিলাম। কুপিত ঋষি আমাকেই মনে করলেন হত্যাকারী। বক্তব্য না শুনেই আমাকে অগ্নায়ভাবে ভৎসনা করে চলেন। শেষে আমিও বলে ফেলেছি—‘কিছু না শুনেই বিনাদোষে আমাকে তিরস্কার করছেন—আপনি কি ব্রহ্মর্ষি, না চণ্ডাল!’ প্রত্যুত্তর শোনারাত্রি ক্ষিপ্ত হয়ে ঋষি আমাকে অভিশাপ দিলেন—‘কি! ঋষিভ্রেষ্ট

আমাকে তুমি চণ্ডাল বলার স্পর্ধা কর ? তুমিও সপুত্রপরিবার চণ্ডালত্ব প্রাপ্ত হও ।’—অনেক অনুনয়ের পর তাঁর রোষ শাস্ত হলে তিনি পাপের তীব্রতা কিছু হ্রাস করে বললেন—‘একবছর গোপনে সপরিবারে চণ্ডালরূপে বাস করতে পারলেই শাপ-মুক্তি ঘটবে ।’ অতএব এইভাবে এক বছর কাটানোর পর আজ আমি শাপমুক্ত । কুন্তিভোজ সাগ্রহে জিজ্ঞাসা করেন—‘আপনার পুত্র বিষ্ণুসেন কিভাবে ‘অবিমারক’ নামের অধিকারী হলো ?’ অমাত্য ভূতিকেই এই প্রশ্নের উত্তর দিয়ে দিলেন—‘এক সময় এক প্রচণ্ড বলশালী অশুর সৌবীররাজ্য ধ্বংসের উদ্দেশ্যে আক্রমণ করে—সকলেই যখন আসন্ন বিনাশের সম্ভাবনায় সন্ত্রস্ত, তখন কুমার স্বয়ং এগিয়ে গেলেন তার দিকে ! অশুরটি তাঁকে উপহাস ক’রে তাঁর প্রতি অবজ্ঞা প্রদর্শন করতে থাকে—কিন্তু অসাধারণ বিক্রমে তরুণ বিষ্ণুসেনের হাতেই তার পঞ্চত্ব প্রাপ্তি ঘটল । এই অশুর বা ‘অবি’কে নিধনের জগ্নেই তার নাম হ’লো ‘অবি-মারক’ ।’

কিন্তু বর্তমানে রাজকুমারকে কোথাও দেখা যাচ্ছে না কেন ? কি হ’লো তাঁর !—পিতা—পিতৃবন্ধু—সকলেই উদ্বিগ্ন । সব রহস্যের উপর যবনিকাপাতের প্রয়োজনেই বুঝি আবির্ভাব ঘটে দেবর্ষি নারদের । যথারীতি পাণ্ডার্থ্য প্রদানের পর কুন্তিভোজ তাঁকে জিজ্ঞাসা করেন—‘কি কারণে সৌবীর রাজকুমারের এই অদর্শন ? নারদ জানালেন—‘বিবাহের কারণে ।’

কুন্তিভোজ—কোথায় আছেন কুমার ?

নারদ—বৈরস্তুীনগরে ।

কুন্তিভোজ—কার জামাতা হলেন ?

নারদ—কুন্তিভোজের ।

—এবার সকলের চমকিত হওয়ার পালা । সব বিস্ময়ের কুহেলিকা অপসারিত করে আনুপূর্বিক সমস্ত ব্যাপার বিবৃত করলেন নারদ ।—ভার্যাসহ কুমারকে অন্তঃপুর থেকে নিয়ে আসার আদেশ দেওয়া হলো ।

এখন জয়বর্মা-সংক্রান্ত সমস্যার কি হবে ! এখানেও সমাধান দিলেন দেবর্ষি নারদ । পুত্রের সঙ্গে সমাগতা কাশীরাজ মহির্ষী সুদর্শনাকে তিনি বললেন—“অগ্নির অংশে তোমার প্রথমে একটি পুত্র জন্মায় । তোমারই ভগিনী সৌবীররাজের পত্নী স্মৃতেতনার প্রসবকালেই সন্তান মারা গেলে তুমি তাকে সেই পুত্র দান করেছিলে ; ‘বিষ্ণুসেন’ বা ‘অবিমারক’ তোমার সেই প্রথমজাত সন্তান । অতএব কুন্তি-ভোজের কন্যা কুরংগী এখন তোমার দ্বিতীয় পুত্র জয়বর্মার শ্রদ্ধেয় । জ্যেষ্ঠা ভ্রাতৃবধূ—এই সম্পর্ক আর অস্বীকার করার উপায় নেই ।” এবার নববধূবেশে রাজকন্যা কুরংগী ও অবিমারক সলজ্জভাবে প্রবেশ করেন—হর্ষোৎফুল্ল অন্তরে সকলেই আশীর্বাদ জানালেন নবদম্পতীকে । তাঁরাও দেবর্ষির আজ্ঞাক্রমে গুরুজনদের অভিবাদন করলেন—সকলের চক্ষুই বাষ্পাকুল—ঘটলো মিলনমধুর সমাপন ।

পঞ্চরাত্র

বিরাট যজ্ঞের আয়োজন করেছেন কুরুরাজ দুর্যোধন। পাণ্ডবেরা বনবাসে থাকায় রাজ্য এখন তাঁর কাছে নিষ্কণ্টক—অতএব আড়ম্বরপূর্ণ যজ্ঞীয় অনুষ্ঠানের মাধ্যমে স্বীয় নিন্দার মূলোৎপাটনই তাঁর লক্ষ্য। এই উপলক্ষে শ্রেষ্ঠ ব্রাহ্মণেরা খ্যাতনামা রাজগৃহবর্গ সকলেই তাঁর রাজধানী হস্তিনাপুরে সমবেত হয়েছেন—চারিদিকে ‘দীয়তাং ভূজ্যতাম্’ রব। রাজকীয় সমারোহের সংগেই যজ্ঞ নিষ্পন্ন হলো। কিন্তু শেষে ঘটে গেল এক অঘটন—যজ্ঞ সমাপনের পর যজ্ঞাগ্নিরক্ষক ব্রাহ্মণ বালকের অনবধানতায় বেদির সম্মুখস্থ যূপকাষ্ঠে আগুন ধরে গেল—ক্রমশ শিখা পরিব্যাপ্ত হয়ে পড়ে—ঘৃত বহনের কাষ্ঠযান, যজ্ঞের বহিঃগৃহ সব গ্রাস করে পার্শ্বস্থ বনভূমির দিকে অগ্রসর হতে থাকে। পুষ্পময় বৃক্ষগুলি দগ্ধকাষ্ঠে পরিণত হয়। অবশেষে তীরের তৃণভূমি সম্পূর্ণ দহনের পর নদীতে এসে ইন্ধনের অভাবে শান্তিলাভ করে সেই সর্বগ্রাসী জ্বালা। এই অগ্নিদাহের ঘটনা কি আসন্ন যুদ্ধাগ্নিরই ইংগিত?

ভীষ্ম দ্রোণ কর্ণ শকুনি ও সমবেত রাজমণ্ডলীসহ প্রবেশ করেন দুর্যোধন। যজ্ঞের সাক্ষ্যে তাঁর আত্মবিশ্বাস ফিরে এসেছে—তিনি আজ সকলের প্রশংসাধন। হৃষ্টমনে তিনি গুরুজনদের অভিবাদন ও রাজগৃহবৃন্দকে অভিনন্দন জানান। কিন্তু একমাত্র বিরাটরাজ অনুপস্থিত কেন? তাঁর রাজ্যে কি কোনো বিশৃঙ্খলা দেখা দিয়েছে; কিংবা তিনি পাণ্ডবদের পক্ষপাতী বলে? যা হোক, দূত ফিরে এলেই সমস্ত ব্যাপার জানা যাবে। যজ্ঞান্তে গুরুদক্ষিণাদান যজ্ঞমানের পক্ষে অবশ্য করণীয়—অতএব গুরু দ্রোণকে তাঁর ইচ্ছানুযায়ী দক্ষিণা গ্রহণের জন্তে দুর্যোধন অনুরোধ করেন। দ্রোণ কিন্তু সহজে তাঁর ইচ্ছা প্রকাশ করতে চাননা—অশ্রুতে তাঁর দৃষ্টি রুদ্ধ। বুদ্ধ আচার্যের অন্তরে কাদের জন্তে দুঃখ জমা হয়ে আছে? প্রিয় পাণ্ডবদের বনবাস-

জনিত হ্রবস্থার জন্মেই কি? কিন্তু গুরুকে যদি সন্তুষ্ট না করা যায় তাহলে তো এই যজ্ঞই নিফল! গুরুর অশ্রু প্রক্ষালনের জন্মে জল আনতে আদেশ দেন ত্র্যোধন—কিন্তু দ্রোণ বলেন উদ্দেশ্য সিদ্ধ হলেই তাঁর তৃপ্ত দূর হবে—অতএব সেই জল হাতে নিয়েই গুরুর বাঞ্ছা-পূরণের প্রতিজ্ঞা করেন রাজা। পীড়াপীড়িতে বাধ্য হয়েই দ্রোণ প্রকাশ করেন তাঁর বাসনার কথা—

যেথা গতিঃ কাপি নিরাশ্রয়াশং সংবৎসরৈর্দ্বাদশভিন্ন দৃষ্টা।

তং পাণ্ডবাণাং কুরু সংবিভাগমেযা চ ভিক্ষা মম দক্ষিণা চ ॥

‘বিগত দ্বাদশবৎসর যাদের কোনো সন্ধান পাওয়া যায়নি সেই নিরাশ্রয় পাণ্ডবদের রাজ্যের ভাগ দাও—ভিক্ষাই বল বা দক্ষিণাই বল—এইটিই আমার আন্তরিক কামনা।’ শকুনি সবেগে এগিয়ে এলেন এই প্রস্তাবে—‘এই প্রার্থনা তো ধর্মের ছলে ত্র্যোধনের প্রতি বঞ্চনা’—শকুনির এই উক্তি দ্রোণকে উত্তেজিত করে তোলে। তিনি বলেন—‘ভ্রাতাদের পৈতৃক রাজ্য ফিরিয়ে দিতে বলা যদি বঞ্চনা করা হয় তাহলে তারা শক্তি প্রয়োগে প্রাপ্য আদায় করুক—এইটাই কি কাম্য?’ উত্তেজনা বৃদ্ধি পেলে কার্যসিদ্ধিতে বিশ্ব ঘটীর আশঙ্কায় এগিয়ে আসেন কুরুপিতামহ ভীষ্ম—পাণ্ডবদের অধিকারের যথার্থ্য সম্বন্ধে সচেতন করে দিলেন ত্র্যোধনকে; দ্রোণকেও অনুরোধ করেন শান্তভাবে অভীষ্ট লক্ষ্যে উপনীত হওয়ার চেষ্টা করতে। ক্রোধ পরিহার করে দ্রোণ এখন কিছুটা শান্তভাবেই ত্র্যোধনকে আবার প্রতিজ্ঞা রক্ষার কথা স্মরণ করিয়ে দিলেন। উপায়ান্তর না দেখে চঞ্চলমতি ত্র্যোধন বলেন—‘বেশ, মাতুলের অনুমোদন লাভ করলেই আমি আমার প্রতিজ্ঞা পালন করব।’ শিশুবৎসল গুরু পাণ্ডবদের জন্মে বাধ্য হয়েই শঠ শকুনিরই শরণ নিলেন—তাকে সন্তুষ্ট করার জন্মে একথাও বললেন—‘বার্দ্ধক্যজনিত আমার ক্রোধ ক্ষমা কর’। এমনকি শকুনিকে আলিঙ্গন করে তাকে শান্ত করতে চাইলেন—কিন্তু কঠিন শকুনির মন এত সহজে গলার নয়—তাই ত্র্যোধন যখন

জিজ্ঞাসা করলেন—‘পাণ্ডবদের রাজ্যার্থদান বিষয়ে আপনার মত কি?’ কঠোর কণ্ঠে শকুনি উত্তর দিলেন—‘দেবনা, একথাই নিশ্চিত।’ কণ্ঠের কাছে পরামর্শ চাইতে তিনি বিষয়টি এড়িয়ে গেলেন। অগত্যা ত্র্যযোধন মাতুলকেই বললেন—‘পাণ্ডবদের প্রদানের জন্তে এমন স্থান চিন্তা করুন যেখানে কোনো শত্রু উৎপন্ন হয়না, উপরন্তু বলবান্ শত্রু বর্তমান।’ কিন্তু শকুনি জানেন অজুনের চেয়ে শক্তিশালী হওয়া কারও পক্ষে সম্ভব নয়, আবার ধর্মপরায়ণ যুধিষ্ঠিরের প্রভাবে উষর মরুভূমিও উর্বরতা লাভ করবে। কিন্তু জন-সমক্ষে গুরুহস্তে জল দান করে যে প্রতিজ্ঞা তিনি করেছেন তা’ কৌরব বংশের মর্যাদার কথা ভেবে ত্র্যযোধনকে অবশ্যই রক্ষা করতে হবে—তাই শকুনিকে ভাবতে হয় এমন এক শর্তের কথা যাতে সাপও মরে লাঠিও না ভাঙে, প্রতিজ্ঞাও রক্ষিত হয় অথচ রাজ্যও দিতে না হয়। অবশেষে তিনি ঘোষণা করেন—‘পঞ্চরাত্রের মধ্যে পাণ্ডবদের সংবাদ এনে দিলে রাজ্যার্থ দেওয়া যাবে।’ এই উক্তিভেদে দ্রোণ হতাশ হয়ে পড়েন কারণ বিগত দ্বাদশ বৎসর ধরেই ত্র্যযোধনের চরেরা চেষ্টা করে চলেছে পাণ্ডবদের সন্ধান পাওয়ার। পাশাখেলায় পরাজয়ের আরেকটি শর্ত ছিল যে অজ্ঞাতবাস কালের মধ্যে সন্ধান পাওয়া গেলে বনবাসের কাল আবার দীর্ঘায়িত হবে। অতএব ক্ষুব্ধচিত্তে দ্রোণ বলেন ‘বরং স্পষ্ট করেই বল যে দক্ষিণা দান সম্ভব হলো না।’ ব্যাপারটি সম্বন্ধে কোনো সিদ্ধান্তে আসার আগেই বিরাট রাজ্য থেকে দূত উপস্থিত। সে জানায় বিরাটেশ্বরের শ্যালক কীচক প্রমুখ শত ভ্রাতা কোনো এক অজ্ঞাত আততায়ীর দ্বারা বিনাঅস্ত্রে গুধুমাত্র বাহুবলেই নিহত হয়েছেন। এই দুঃখজনক ঘটনাই বিরাট-রাজের ত্র্যযোধনের যজ্ঞে অনুপস্থিতির কারণ। প্রাজ্ঞ কুরুবৃদ্ধ ভীষ্ম সহজেই অনুমান করতে পারেন কে এই নিধনপর্বের নায়ক। ভীম-কর্মা ভীমসেন ছাড়া কার পক্ষে আর এই দুঃসাধ্য কাজ সম্পন্ন করা সম্ভব হতে পারে? দ্রোণকে এ বিষয়ে সচেতন করে দিলে ভীষ্মের

ইংগিতে তিনি পঞ্চরাত্রের শর্তে রাজী হয়ে যান, তাঁদের আশা বিরাট নগরে গেলে হয়তো বা পাণ্ডবদের হৃদিস মিলতেও পারে। কিন্তু সেখানে যাওয়ার জন্তে একটা অজুহাতের প্রয়োজন—কি করা যায়! ভীষ্ম উপায় স্থির করেন; তিনি বলেন—‘বিরাটরাজ আমাদের প্রতি শত্রু ভাবাপন্ন বলেই যজ্ঞে উপস্থিত হয় নি; অতএব তাকে শাস্তি দানের জন্তে তার গোধন অপহরণের উদ্দেশ্যে যাত্রা করা যাক।’ যুদ্ধের আহ্বান এলে ক্ষত্রিয়দের নিঃশব্দ থাকা চলে না—অতএব শকুনিকে সেনাপতি করে ভীষ্ম দ্রোণ কর্ণ দুর্যোধন সহ কৌরব-বাহিনী অগ্রসর হলো বিরাট রাজ্যের দিকে।

বিরাট নগর এখন আনন্দ উৎসবের আয়োজনে মত্ত—বিরাটেশ্বরের জন্মদিন—গোপালকদের পক্ষ থেকে তাঁকে উপহার দেওয়া হবে বিশাল গোবাহিনী—সেগুলি সুসজ্জিত করে উদ্ভানের দিকে আনা হচ্ছে তাই গোপালক বালিকারা নৃত্যগীতে তাদের আনন্দ প্রকাশ করে চলে। হঠাৎ একটি দাঁড়কাক কর্কশ রবে ডেকে উঠল কেন? বয়োবৃদ্ধ গোপালক কোনো এক অজ্ঞাত অমঙ্গলের আশঙ্কায় ত্রস্ত হয়ে ওঠে। কিছুক্ষণ পরেই শোনা যায় ছন্দুভি নিনাদ—দারুণ ধূলি ঢেকে ফেলেছে সূর্যের আলো। কারা যেন রথে চড়ে এসে দস্যুর মত গোপপল্লী আক্রমণ করে বসেছে। ভট এসে জানায় ধৃতরাষ্ট্রের পুত্রেরা নিষ্ঠুরভাবে গোধন অপহরণ করে নিয়ে যাচ্ছে। অবিলম্বে কাঞ্চকীয় এই সংবাদ উৎসবমুখর অন্তঃপুরে মহারাজের কাছে পৌঁছে দেয়—আকস্মিক বিপদে সবাই স্তব্ধ। বিচলিত বিরাটরাজ গাভীরক্ষায় অসমর্থ, নিজ ক্ষত্রিয়ত্বকে ধিক্কার দিয়ে রথ প্রস্তুত করতে বলেন। কিন্তু তাঁর প্রতি কৌরবদের কেন এই আক্রমণ? রাজসভায় এসে ডেকে পাঠালেন তাঁর কাছে আশ্রয়গ্রহণকারী ভগবান নামে ব্রাহ্মণকে—হস্তিনাপুর এঁর বাসভূমি। অতএব কৌরবদের চরিত্র সম্বন্ধে তাঁর কিছু জ্ঞান থাকা স্বাভাবিক। কিন্তু ধৃতরাষ্ট্র পুত্রদের আক্রমণের সংবাদে ভগবান এত কুণ্ঠা বোধ করছেন

কেন? তাঁর সামনেই বিরাটরাজ বলেন—বিনাযুদ্ধে এই অগ্নায় আক্রমণ সহ্য করা সম্ভব হবে না। একমাত্র ক্ষমাশীল যুধিষ্ঠির ছাড়া কোরবদের অপরাধ আর কারও কাছে ক্ষমার অযোগ্য। যুধিষ্ঠিরের ক্ষমাশীলতার প্রশংসা এই ব্রাহ্মণকে কেন যেন আনন্দিত করে তোলে। বিরাটরাজ যুদ্ধযাত্রার জন্তে নিজ রথ আনয়নের আজ্ঞা দিলেন—কিন্তু সারথি এসে জানায় রাজার ব্যবহৃত রথটিই নিয়ে রাজকুমার উত্তর কোরবদের বাধা দিতে চলে গেছেন। কিন্তু সারথি তো এখানে উপস্থিত! তাহলে কে চালিয়ে নিয়ে গেল কুমারের রথ? দূত নিবেদন করে রাজকুমারীর নৃত্যশিক্ষক স্ত্রী-বেশী বৃহন্নলাকেই কুমার সারথি রূপে গ্রহণ করেছেন—এই সংবাদ স্বভাবতঃই কুমারের নিরাপত্তা সম্বন্ধে রাজাকে চিন্তিত করে তোলে—কিন্তু ভগবান্ তাঁকে আশ্বাস দিতে থাকেন। এই সময় ভট এসে জানায়—‘কুমার পরাজিত হয়ে রথসহ শ্মশানের দিকে পলায়ন করেছেন।’ এই সংবাদে ভগবান যেন কি চিন্তা করে আশান্বিত হয়ে রাজাকে বলেন—‘রথ শ্মশানে যাওয়ায় একথাই স্মৃতিত হচ্ছে যে ধৃতরাষ্ট্রের পুত্ররা যেখানে আছে সেইস্থান শীঘ্রই শ্মশানে পরিণত হবে।’ বলাবাহুল্য ব্রাহ্মণ ভগবানের এই নির্বেদ রাজা বিরাটের বিরক্তি উৎপাদন করে—তিনি তো বলেই বসেন—‘ভগবন্, অকালে স্বস্থবাক্যং মন্যমুৎপাদয়তি।’ ‘দুঃসময়ে এইরকম নিশ্চিন্ত কথাবার্তা ক্রোধই জন্মায়।’ এই মুহূর্তেই ভট এসে জানায়—শ্মশানে স্বল্পসময় বিশ্রাম করে ফিরে এসে কুমারের রথ যুদ্ধের গতি সম্পূর্ণ পরিবর্তিত করে দিয়েছে। শত শত শরাঘাতে কোরব পক্ষ প্রায় বিধ্বস্ত—রথী মহারথীরা পলায়িত—কুমারের রথ থেকে নিষ্কিপ্ত শরপ্রবাহে যেন নদীর সৃষ্টি হয়েছে! রাজা পুত্রের কৃতিত্বে পুলকিত, গৌরবান্বিত। ‘এখনও শুধু অর্জুনপুত্র বালক অভিমন্যু একা যুদ্ধ করছেন’—একথা শুনে যখন ভগবান্ বললেন—‘তাহলে অগ্নি সারথি প্রেরণ করুন, কারণ পাণ্ডব ও যাদব—এই দুই বংশের তেজাগ্নি স্বরূপ অভিমন্যুকে দেখে বৃহন্নলা অভিভূত হয়ে

পড়বেন—তখন বিরাটরাজ ক্ষুব্ধভাবে বলে ওঠেন—‘ভীষ্ম দ্রোণ কর্ণ জয়দ্রথের মত বীরদের পর্যুদস্ত করে দিয়েছেন তিনি কি শুধুমাত্র অভিমন্যুর পিতৃপরিচয়ের ভয়েই তাকে পরাজিত করতে অসমর্থ হবেন?’ কিন্তু সত্যিই কুমার উত্তরই কী এই বীরশ্রেষ্ঠদের রণবিমুখ করতে সমর্থ হয়েছিলেন? কে এই সারথি বৃহন্নলা? শ্মশান থেকে রথ প্রত্যাগত হতেই বা যুদ্ধের গতি পরিবর্তিত হলো কেন? কিভাবে সম্ভব হলো এই শত শত শরবর্ষণ? ভবিষ্যৎ সম্বন্ধে যিনি নিশ্চিত সেই ব্রাহ্মণ ভগবান্‌ই বা কে? অবশ্যই যথাকালে এই রহস্যের যবনিকা উন্মোচিত হবে।

কৌরবদের গোত্রহণের সমুচিত শিক্ষা দিয়ে ফিরে আসে কুমারের রথ। তখনই কুমার রাজসমীপে উপস্থিত হতে পারলেন না—কারণ তিনি যুদ্ধের বিবরণ ও সৈন্যদের কৃতিত্বের কথা লিপিবদ্ধ করতে ব্যস্ত থাকেন। রাজার আস্থানে শুধু বৃহন্নলাই রাজসভায় আসেন—দূর থেকে ভগবান্‌কে দেখেই শ্রদ্ধার সংগে তিনি ভাবেন—যৌবন বর্তমান থাকা সত্ত্বেও সন্ন্যাসব্রতধারী এই রাজা রাজ্যহীন হলেও ত্রিহীন নয়, রাজদণ্ডধারণের পরিবর্তে ইনি সন্ন্যাসীর ত্রিদণ্ড ধারণ করেছেন। রাজা বিরাটের আদেশে বৃহন্নলা রণবৃত্তান্ত বর্ণনা করতে উদ্যত হতেই ভট প্রবেশ করে এক আনন্দ সংবাদ নিয়ে—‘সুভদ্রানন্দন অভিমন্যু বন্দী হয়েছেন।’ বৃহন্নলা বিস্মিত—অতুলনীয় বীরত্বের অধিকারী এই বালককে কে বন্দী করতে সক্ষম! ভট জানায়, ‘রাজার নবনিযুক্ত পাচকই অমানুষিক শক্তিতে অভিমন্যুর রথ স্তব্ধ করে দিয়ে তাকে শুধুমাত্র বাহুবলেই বন্দী করে এনেছেন।’ কী যেন চিন্তা করে বৃহন্নলা আশ্বস্ত হলেন। কারণ বৃহন্নলার বাণের আঘাতে কৌরবরথীরা যখন বিক্ষিপ্ত—ছিন্নভিন্ন—তখন কিশোর অভিমন্যু একাই নির্ভীকভাবে যুদ্ধ চালিয়ে যাচ্ছিলেন। সসম্মানে অভিমন্যুকে রাজসভায় আনার জন্তে আদেশ দিলেন রাজা। সুভদ্রানন্দন অভিমন্যু অবশ্যই আদরের পাত্র কারণ পাণ্ডবজায়া দ্রৌপদীর পিতা ক্রপ্‌দের সংগে বিরাটের আত্মীয়তা আছে। আবার

কন্যার পিতা হিসাবে সম্ভাব্য জামাতা-তুল্য তরুণ অভিমন্যুকে অবহেলা করা চলে না। তাছাড়া পাণ্ডবদের প্রতি শ্রদ্ধাশীল বিরাট-রাজ অর্জুনপুত্র অতিথি অভিমন্যুর প্রতি যথাযোগ্য সমাদর প্রদর্শন করতে বাধ্য। অতএব অভিমন্যুকে সভায় উপস্থিত করার জন্তে বৃহন্নলাই প্রেরিত হলেন। প্রথমে সেই পাচক-বেশধারী বলবান্ ব্যক্তি ও পরে অভিমন্যুসহ বৃহন্নলা প্রবেশ করে। অভিমন্যুর অন্তরে প্রশ্ন—বিশালবক্ষ-ক্ষীণকটি-বৃষস্কন্ধ কে এই পুরুষ যিনি কোনো ক্লেশ না দিয়েই রথ থেকে আমাকে একহাতে তুলে এনেছেন? আবার বৃহন্নলাও তাঁর মনে এই চিন্তা জাগায়—উমা বেশাশ্রিত শঙ্করের মত নারীবেশধারী এই ব্যক্তিই বা কে? বৃহন্নলা তাঁকে নাম ধরে সম্বোধন করে মাতার ও মাতুল কৃষ্ণের কুশল জিজ্ঞাসা করায় এই নীচপদে নিযুক্ত কর্মীদের ধৃষ্টতায় অভিমন্যু বিস্মিত—বিরক্ত। বিজ্রপের সংগেই তিনি বলেন—‘আপনি যেন পিতৃশ্ললভ ভংগীতে আমার মাতার ও মাতুলের সংবাদ জিজ্ঞাসা করছেন? নাকি বিরাট নগরে বন্দীদের সংগে এই রকম অপমানজনক ব্যবহার করাই রীতি!’ বালকের এই ক্রোধ অনেকের কাছেই কৌতুকাবহ। বৃহন্নলা ভংসনার সুরে বলেন—‘পরাজয়বরণ করে পিতা এবং মাতুল বংশের সম্মান তুমি উপযুক্ত ভাবেই রক্ষা করেছ।’ এই অভিযোগ খণ্ডনের জন্ত অভিমন্যুর উত্তর—‘আত্মস্তুতি না করেও একথা বলা যেতে পারে যে নিহত সৈনিকদের দেহে বিদ্রশরে লেখা নামই আমার সপক্ষে প্রমাণ। তবে যিনি রথ থেকে আমাকে তুলে আনেন তিনি অস্ত্রহীন ছিলেন বলে ক্ষত্রিয়ের ধর্ম অনুসারে সেই ব্যক্তিকে আঘাত করা সম্ভব হয়নি।’ একথাও সে স্মরণ করিয়ে দেয়, ‘আমাকে যেমন বিনা অস্ত্রে বাহুবলে বন্দী করে আনা হয়েছে মধ্যমতাত ভীমও তেমনি আমাকে বাহুবলেই মুক্ত করে নিয়ে যাবেন।’ বালকের এই আত্মবিশ্বাস ও বীরত্বপূর্ণ উক্তিতে ভগবান, বৃহন্নলা, ভীমকায় পাচক সকলেই সন্তুষ্ট হলেন—রাজা বিরাটও মুগ্ধ। এবার কুমার উত্তর সভায়

উপস্থিত হলেন—সমস্ত রহস্যের জাল ছিন্ন করে তিনি বিরাট-রাজকে জানালেন—‘এখন পূজ্যতমের পূজা করা উচিত।’—‘কিন্তু কে এই পূজ্যতম?’—‘কেন, এই যুদ্ধে যাঁর সমস্ত কৃতিত্বই প্রাপ্য, সেই মহামাণ্ডব ধনঞ্জয়ের? তিনিই তো শ্মশান থেকে গাণ্ডীব ধনু এনে বারিবর্ষণের মত শরবর্ষণে শত্রুপক্ষকে ছত্রভঙ্গ করে দিয়েছেন। তাঁর হাতে জ্যাঘাতের চিহ্ন দ্বাদশ বৎসর অব্যবহৃত হলেও এখনও বিद्यমান।’ কিন্তু বৃহন্নলা পরিচয় অস্বীকারের চেষ্টায় বলেন—‘আসলে ও গুলি বলয়ের ঘর্ষণের দাগ।’—এবার সবসমস্তার সমাধান করে দিয়ে ব্রাহ্মণ ভগবান্ জানালেন—‘আর আত্মগোপনের প্রয়োজন নেই, কারণ অজ্ঞাতবাসের কাল পূর্ণ।’ সকলেই এখন নিঃসন্দেহ যে—এই ব্রাহ্মণ বেশধারীই যুধিষ্ঠির, বৃহন্নলা ছদ্মবেশী অর্জুন ও ভীম-বলশালী পাচকই ভীমসেন—এঁদের প্রকৃত পরিচয় পেয়ে অভিমন্যু সসম্মানে প্রণাম জানালেন। বিরাটেশ্বরও বলেন—‘সত্যপ্রতিজ্ঞ বীরপাণ্ডবদের বাসহেতু আমার বংশ ধনু।’ তিনি যুদ্ধে কৃতিত্বের জন্মে অর্জুনের উদ্দেশে উত্তরাকে দান করেন—কিন্তু অর্জুন-পুত্র অভিমন্যুর সংগে বিবাহের জন্মেই উত্তরাকে মনোনীত করেন। আজই প্রশস্ত তিথি। অতএব কুরু বৃদ্ধ ভীষ্মের অনুমতি গ্রহণের জন্মে কুমার উত্তর কোরব শিবিরে যাত্রা করেন।

অভিমন্যুর বন্দী হওয়ার সংবাদ এসে পৌঁছায় কোরব শিবিরে। ভীষ্ম, দ্রোণ সকলেই ক্ষুব্ধ উদ্ভিগ্ন। দুর্ব্যোধন যে-কোনো মূল্যেই তাকে মুক্ত করে আনতে বদ্ধ পরিকর—কর্ণ তো অভিমন্যুকে রক্ষা করতে অসমর্থ হওয়ায় ধনুর্বাণ ত্যাগ করে বনগমনই শ্রেয় বলে মনে করেন। শকুনি অবশ্য নিরুদ্বেগ! তাঁর মতে পাণ্ডবপুত্রের মুক্তির ব্যবস্থা পাণ্ডবেরাই করতে পারবে, অতএব চিন্তার বিশেষ কোনো কারণ নেই। কিন্তু কে এই সিংহ-শিশুকে জালে আবদ্ধ করল? সারথি অভিমন্যুর বীরত্বের বর্ণনা করে জানায়—এক অমিত বলশালী পুরুষ কর্তৃক অভিমন্যু ধৃত হয়েছেন—শুধুমাত্র তাঁর বাহুর ভরেই অশ্বগুলি

গতিহীন ও রথ নিষ্কম্প হয়ে পড়ে।’ ভীষ্ম দ্রোণের কাছে আর এই পুরুষের পরিচয় গোপন থাকে না—মহাবলী ভীমসেন ছাড়া এমন মহামায়া শক্তিদর আর কে হতে পারে! শকুনি অবশ্য এই যুদ্ধে পরাজয়ের ব্যাপারে পাণ্ডবদের হস্তক্ষেপের সম্ভাবনা হেসে উড়িয়ে দিতে চান—কিন্তু দ্রোণ ও ভীষ্ম ধনুকের টঙ্কার—অবিরাম শরবর্ষণ—ভীষ্মের রথের শিরোদেশে লগ্ন প্রণামসূচক তীরে মুদ্রিতনাম ইত্যাদি প্রমাণ থেকে নিঃসন্দেহ হয়েছেন যে বিরাট পক্ষে যোদ্ধা আর কেউই নয়—স্বয়ং গাণ্ডীবধন্য অর্জুন। শকুনি এখনও চেষ্টা করে চলেছেন ব্যাপারটি মিথ্যা প্রতিপন্ন করতে এই অজুহাতে যে অর্জুন নামে অণু কোনো সৈনিকের নিক্ষিপ্ত বাণ হতে পারে—কারণ পাণ্ডবদের অস্তিত্ব একবার প্রমাণিত হয়ে গেলে প্রতিজ্ঞা অনুসারে অর্ধরাজ্য দান করতে হবে, যেহেতু পঞ্চরাত্র শেষ হওয়ার আগেই তাঁদের সন্ধান পাওয়া গেছে। কিন্তু শকুনির এই প্রয়াস বেশীক্ষণ কার্যকরী হলো না—কুমার উত্তর দ্বারে উপস্থিত। যথাযথ অভিবাদনের পর যুধিষ্ঠিরের পক্ষ থেকে তিনি জানতে চান—‘উত্তরা ও অভিমন্যুর বিবাহ কোথায় অনুষ্ঠিত হবে—হস্তিনাপুরে অথবা বিরাট নগরে?’ অনুষ্ঠান বিরাট নগরেই সম্পন্ন হবে—এ কথাই স্বীকৃত হয়। পাণ্ডবদের অস্তিত্ব সম্বন্ধে আর সন্দেহের অবকাশ থাকে না। দ্রোণের অভীষ্ট সংবাদ-প্রাপ্তি ঘটেছে—অতএব তিনি দুর্যোধনকে তার প্রতিজ্ঞার কথা মনে করিয়ে দেন—“ইত্যর্থং বয়মানীতাঃ পঞ্চরাত্রোহপি বর্ততে, ধর্মেণাবর্জিতা ভিক্ষা ধর্মেণৈব প্রদীয়তাম্।”

যে উদ্দেশ্যে আমাদের এখানে আগমন তা এখন সিদ্ধ হয়েছে—“পঞ্চরাত্র পূর্ণ হওয়ারও দেরী আছে; অতএব ধর্মপালনের জন্তে যে ভিক্ষাদানের প্রতিজ্ঞা করেছিলে তা’ ধর্মরক্ষার্থেই প্রদান কর।’ সুতরাং সত্যরক্ষার্থে দুর্যোধন পাণ্ডবদের জন্তে অর্ধরাজ্য ছেড়ে দিতে বাধ্য হলেন—কারণ ‘মৃত্যুহপি হি নরাঃ সর্বে সত্যে তিষ্ঠন্তি তিষ্ঠতি।’ সত্যরক্ষা করতে পারলে মৃত্যুর পরেও মানুষ অমরতা লাভ করে।

মালবিকাগ্নিমিত্রম্

বিদিশাধিপতি অগ্নিমিত্র শৌর্যে ও পরাক্রমে ইন্দ্রতুল্য ; আবার নায়ক রূপেও তিনি বিদগ্ধ ! অন্তঃপুরে তাঁর একাধিক মহিষী—প্রধানা রাজ্ঞী ধারিণী, একদিন এক চিত্রফলকে অঙ্কিত ধারিণীর জনৈক। পার্শ্বচারিণীর ছবি তাঁকে আকৃষ্ট করে—কে এই অপরাধী ! যৌবন যার অঙ্গে সবে বাঁশীতে সুর তুলেছে—অথচ কৈশোরের পবিত্রতা যাকে দিয়েছে অনন্ত বৈশিষ্ট্য । কামদেবের আসন যেন সবে পাতা হচ্ছে সলাজ বন্ধিম কটাক্ষে ক্ষুরিত অধরে, বরতনুর লাস্যময় ভঙ্গিমায় ! মোহিত হলেন রাজা ; নবমধুলোভী মধুকর সরস মধুপানের আশায় লুক্ক হয়ে উঠলেন । কিন্তু এই পটে লিখা ছবির স্বরূপ পরিচয় কি ?

অনুসন্ধিৎসু অগ্নিমিত্র শুধুমাত্র এইটুকুই জানতে পারলেন যে রাণী ধারিণীর ভ্রাতা সীমান্তের দুর্গরক্ষক বীরসেন এই বালিকাকে ধারিণীর আশ্রয়ে প্রেরণ করেছেন । রাজ্ঞী একে নৃত্যগীতাদি কলা-বিদ্যায় সুনিপুণা করে তোলার দায়িত্ব অর্পণ করেছেন নাট্যাচার্য গণদাসের উপর । রাজপুরীতে আর এক নাট্যগুরু আছেন—হরদত্ত । রাজবয়স্ক বিদুষককে অগ্নিমিত্র তাঁর চিন্তাচঞ্চল্যের কথা জানালেন । বিদুষক রাজার মালবিকা দর্শনের অভিলাষ পূরণের জন্তে আশ্রয় নিল এক কোশলের । দুই নাট্যাচার্যের মধ্যে শ্রেষ্ঠত্বের অধিকার নিয়ে গুরু হলো বিবাদ । রাজ্ঞী ধারিণীর সঙ্গে সর্বদা বিচরণ করতেন এক বৌদ্ধ পরিত্রাজিকা—নাম পণ্ডিত কৌশিকী ; রাজদম্পতির অত্যন্ত সম্মানীয়া তিনি । তাঁর পূর্ব-পরিচয় এখনও অজ্ঞাত । এই পরিত্রাজিকার পরামর্শ অনুসারেই স্থির হলো যে এক নৃত্যসভার আয়োজন

করে শিষ্যদের অভিনয়ের উৎকর্ষ অমুযায়ী নির্ধারিত হবে আচার্যদের শ্রেষ্ঠত্ব। সকলেই সম্মত হলেন।

যথাসময়ে শুরু হলো প্রতিযোগিতা। রাজা অগ্নিমিত্র, রাজ্ঞী ধারিণী, পণ্ডিত কৌশিকী ও বিদূষক—সকলেই দর্শক-মণ্ডপে উপবিষ্ট। প্রতীক্ষার উৎকণ্ঠায় রাজার প্রতিটি মুহূর্ত কাটে। বেজে উঠলো—
মধুর মৃদঙ্গ মুরজ মুরলী। যবনিকা হলো অপসৃত। ধীরপদবিক্ষেপে আচার্য গণদাসের পশ্চাদবর্তিনী মালবিকা প্রবেশ করেন মঞ্চে। রাজার প্রতিটি ইন্দ্রিয় ব্যগ্র! চিত্রে অঙ্কিতা মালবিকার চেয়ে সহস্রগুণে গরীয়সী শরীরিণী মালবিকা। আভরণের বাহুল্য না থাকায় প্রতিটি অঙ্গবৈশিষ্ট্যই সুপরিষ্কৃত। যথার্থ নৃত্যোপযোগী অঙ্গসংস্থান—ক্ষীণকটি, গুরুনিতম্ব—সুডোল বাহুবল্লরী—পীনবন্ধ ; —লাবণ্যের যেন প্রতিমূর্তি। অভিবাদনাস্তে মালবিকা শুরু করে শাস্ত্রীয় অভিনয় ছলিক, সঙ্গে সঙ্গীত—

হৃদয় রে তোর কেন আর আশ

দুর্লভ প্রিয় তরে

বাম আঁখি কেন ফুঁরে বার বার

বৃথা এ কামনা লয়ে।

কতকাল পরে প্রিয়দরশনে

জীবন ধন্য মানি,

তুমাতুরা আমি, অন্তরতম

তোমারেই শুধু জানি।

অগ্নিমিত্রের উদ্দেশ্যেই যেন তাঁর এই প্রেম নিবেদন। অতুলনীয় কুশলতার সঙ্গে মালবিকা নাট্যরস সৃষ্টি করেন। গণদাসের শ্রেষ্ঠত্ব সম্বন্ধে সকলেই নিঃসন্দেহ। নৃত্য সমাপ্ত—কিন্তু এখনই কি মালবিকা বিদায় নিয়ে চলে যাবেন অগ্নিমিত্রের দৃষ্টির অন্তরালে? এগিয়ে এলো বিদূষক—অভিনীত নাট্যকলা সম্বন্ধে প্রশ্নের ছলে বিদায়-

মুহূর্তটিকে বিলম্বিত করে তোলে। অতৃপ্ত নয়নে রাজা পান করে চলেম মালবিকার রূপসুধা! কিন্তু তৃষ্ণা তাঁর মেটে না—রাজ্যীর আহ্বানে চলে যেতে হলো অন্তঃপুরে।

মালবিকাই রাজার একমাত্র আরাধ্যা—আকুল হৃদয়ে তিনি মালবিকাকে কামনা করে চলেছেন।—

সর্বান্তঃপুরবণিতাব্যাপারং প্রতি নিবৃত্তহৃদয়স্ব।

সা বামলোচনা মে স্নেহশৈকায়নীভূতা ॥

বিদূষকসহ অন্তঃপুরস্থ প্রমোদ উদ্ভানে আসেন তিনি অন্তরের কাতরতা ভুলতে। অপূর্ব শোভা উদ্ভানের। বসন্তের সৌন্দর্যলক্ষ্মী যেন রাজাকে বিমোহিত করার জগ্গেই এমন নয়নাভিরাম রূপ ধারণ করেছেন—অশোকের উজ্জ্বল রক্তিম। যেন তাঁর অধরশোভা—কুরুবকের বর্ণাঢ্য সমারোহ যেন কপোলতলে পত্রলেখা। তিলফুলের উপর উপবিষ্ট ভ্রমর যেন রমণীকুলের ললাটে তিলকসজ্জার গর্বকে খর্ব করেছে। শ্রবণকে আনন্দ দিচ্ছে কোকিলের কুহস্বর, আর স্পর্শসুখ বিধান করে চলেছে যুগ্ম মলয় পবন। মুগ্ধ হলেন রাজা।

মালবিকাও এসেছেন সেই উদ্ভানে—উদ্দেশ্য দেবী ধারিণীর প্রিয় রক্তাশোক বৃক্ষটিকে দোহদ দান। সুন্দরী যুবতীর পদাঘাতে অশোক বৃক্ষে দেখা দেয় মুকুল—এই ছিল প্রচলিত ধারণা। দেবী স্বয়ং অসুস্থ হওয়ায় তাঁর আদেশে মালবিকার উপরই এ দায়িত্ব অর্পিত হয়েছে। অন্তরাল থেকে মালবিকার আগমন লক্ষ্য করে বিদূষক রাজাকে জানালো সে কথা। মালবিকা অবশ্য রাজা ও রাজবয়স্কের উপস্থিতি সম্বন্ধে সম্পূর্ণ অজ্ঞ। রাজাকে সেই নৃত্যসভায় দেখার পর থেকে মালবিকাও অনগ্রহৃদয়া। সখী বকুলাবলিকার অপেক্ষায় উপবেশন করেন শিলাতলে। দুর্ভাগিনী মালবিকা নিজের দুঃসাধ্য আকাঙ্ক্ষার জগ্গ নিজেকেই ভৎসনা করেন।

হিঅঅ ! গিরবলম্বণাদো অদিভূমিলজ্জিণেণো

মনোরহাদো বিরম, কিং মং আআসিঅ ।

‘হে হৃদয় তোমার এই মনোরথ দূর কর—এ শুধু সুউচ্চ স্থান লজ্জনের ইচ্ছা তাই নয়—এই অভিলাষ সম্পূর্ণ অবলম্বনহীন।’ মালবিকার এই বিলাপ রাজাকে উৎফুল্ল করে তোলে। সখী বকুলাবলিকা এসে মালবিকাকে মনোরম সজ্জায় সজ্জিত করে। অন্তরাল থেকে সে ভুবনমোহনরূপ দেখে রাজা মোহাবিষ্ট, এদিকে সহচরী নিপুণিকার সঙ্গে রাজার অগতমা মহিষী ইরাবতী আসছেন প্রমোদ কাননে। প্রথমে তিনি ছিলেন রাজ্যী ধারিণীর সখীমাত্র, পরে রাজানুগ্রহে—মহিষীর মর্যাদা লাভ করেন। মালবিকাদর্শনের পূর্ব পর্যন্ত তিনিই ছিলেন রাজার প্রিয়তমা। মদস্থলিত চরণে তিনি রাজার অন্বেষণ করেন প্রমোদবিলাসের ইচ্ছায়। সহসা তাঁর দৃষ্টি পড়ে বকুলাবলিকার দ্বারা সুসজ্জিতা মালবিকার দিকে—অন্তরে অনুভব করেন সহস্র বৃশ্চিকদংশন। দেবীর নূপুর মালবিকার পায়ে অশোকবৃক্ষে দোহদের প্রয়োজনে। কিন্তু তাঁর চমক চূড়ান্ত পর্যায়ে পৌঁছতে তখনও বাকী।

বকুলাবলিকা ধীরে ধীরে রাজার প্রসঙ্গ উত্থাপন করে কৌশলে জেনে নেয় মালবিকার অন্তরের কথা। দূতীরূপে রাজার প্রণয়-বার্তাও জ্ঞাপন করে সলজ্জা মালবিকাকে। তারপর অশোকপল্লবের কর্ণভূষায় শোভিতা হয়ে মালবিকা রক্তাশোকে পদাঘাতে দোহদ দান করেন। সুন্দরীর পদাঘাত রাজার অন্তরকে কামনাতুর করে তোলে—স-বিদূষক তিনি আবির্ভূত হন মালবিকার সম্মুখে। পরিহাসচ্ছলে বিদূষক বলে—‘রাজার প্রিয় এই অশোক বৃক্ষে তুমি কিনা বাঁ পায়ে আঘাত করলে?’ সরলা মালবিকা এই অভিযোগের পর রাজাকে সম্মুখে দেখে সন্ত্রস্ত। রাজা ছুহাতে ধরে তুললেন প্রণতা মালবিকাকে—প্রশ্ন করলেন—অশোকবৃক্ষে দোহদদানের পরিশ্রমে তোমার কোমলপদে কোন আঘাত লাগেনি তো? সচকিতা মালবিকা

স্থানত্যাগের জন্য ব্যাকুল হয়ে উঠলেন—কিন্তু তাঁর বিদায় নেওয়ার আগেই রাজা ব্যক্ত করেন তাঁর অভীক্ষা। আর তো সম্ভব নয় ধৈর্য রক্ষা। অনন্তচিন্ত এই প্রেমিককে তোমার স্পর্শামৃত দানে ধন্য কর। ‘স্পর্শামৃতেন পূরয় দোহদমস্তাপ্যানন্তরুচে’। অন্তরাল থেকে সমস্ত ব্যাপারই প্রত্যক্ষ করছিলেন ইরাবতী। আর নিজেকে সংযত করতে পারলেন না তিনি! সহসা আত্মপ্রকাশ করে বলে উঠলেন ‘রাজ-প্রার্থনা যখন, পূরণ করা উচিত বৈকি, আর অশোকবৃক্ষে ফুল যদি নাও ফোটে, রাজার বাঞ্ছাপূরণেই ইষ্টসিদ্ধি অবশ্যসম্ভাবী’ সকলেই চমকিত! বকুলাবলিকা ও মালবিকা ত্বরিতগতিতে প্রস্থান করলেন। হতবুদ্ধি রাজা বিদূষককে প্রশ্ন করেন—‘এখন কি কর্তব্য’? ‘কি আবার, পৃষ্ঠপ্রদর্শন’—বিদূষকের সহজ পরামর্শ। কিন্তু রাজাকে সে সুযোগ না দিয়েই আক্রমণের ভঙ্গিতে এগিয়ে আসেন রাণী ইরাবতী। বাক্যবাণে জর্জরিত করে চলেন অগ্নিমিত্রকে, নিরুপায় রাজা আত্মপক্ষ সমর্থনের সুযোগটুকুও পাচ্ছেন না। অবশেষে ক্রুদ্ধা ইরাবতী আহতা ফণিনীর মতই রাজার সমস্ত অনুনয় আগ্রহ করে দর্পভরে স্থলিতবসনে নিজ্রাস্ত হলেন। ইরাবতীর এই উগ্র অহমিকা, এমন কি রাজাকেও উপেক্ষা করার স্পর্ধা, মালবিকার প্রতি রাজার আকর্ষণকে আরও তীব্র করে তুললো।

অচিরে ইরাবতী সমস্ত ব্যাপারটি দেবী ধারিণীর কাছে নিবেদন করলেন। তখন রাজ্ঞীর নির্দেশে বকুলবালিকাসহ মালবিকাকে বন্দী করে রাখা হলো পাতালকক্ষে। দ্বাররক্ষিণীর কাছে তাঁর নাগমুদ্রা চিহ্নিত অংগুরীয়ক প্রদর্শন ব্যতীত মালবিকাকে মুক্ত করা চলবে না—এই ছিল তাঁর আদেশ। মালবিকা-বিহনে রাজার অবস্থা হয়ে উঠলো খুবই শোচনীয়। অবশেষে বিদূষক এক উপায় স্থির করে ফেলে।

রাজা এসেছেন রাজ্ঞী ধারিণীর কুশলবার্তা জানার জন্তে—তখন

সহসা বিদূষক প্রবেশ করল, মুখে কাতর আত্ননাদ—‘রক্ষা করুন, রক্ষা করুন আমাকে সর্প দংশন করেছে, দেবী দর্শনে আসার জন্ত উপহারের উদ্দেশে উঠানে পুষ্প সংগ্রহের সময়ই এই দুর্ঘটনা ঘটে গেল।’ স্বভাবতই বিদূষকের প্রতি রাজ্ঞীর সহানুভূতির উদ্রেক হলো। বিদূষকের অবস্থা ক্রমশ অবনতির পথে চলেছে দেখে তাকে বিখ্যাত বিষবৈদ্যের কাছে পাঠানো হলো। কিছুক্ষণ পরে প্রতীহারী এসে জানায়—‘বৈদ্য বিষ দূর করার জন্তে নাগমুদ্রা প্রার্থনা করেছেন।’ কিন্তু কোথায় পাওয়া যাবে এই মুদ্রা? অবশেষে নিরুপায় হয়েই রাণী বললেন—‘আমার এই অঙ্গুরীয়কে সর্পমুদ্রা খচিত আছে—এইটি নিয়েই প্রয়োজন সিদ্ধ কর।’ রাজার ইঙ্গিতে অল্পক্ষণ পরে প্রতীহারী ফিরে এসে ধারিণীকে অঙ্গুরীয়কটি প্রত্যর্পণ করে জানালো—‘উদ্দেশ্য সিদ্ধ, বিদূষক আরোগ্যের পথে।’ রাজা বুঝলেন বিদূষকের পরিকল্পনা অনুসারে স-সখী মালবিকা মুক্ত। মিলনোৎসুক রাজা কিছুক্ষণ পরেই উপস্থিত হলেন সেই সমুদ্র-গৃহে, যেখানে বকুলাবলিকাকে সঙ্গে নিয়ে মালবিকা প্রতীক্ষারত।

সমুদ্রগৃহ—সরোবরের মধ্যস্থানে নির্মিত শান্ত-শীতল প্রমোদকক্ষ—
ভিত্তিগাত্রে অঙ্কিত রাজা অগ্নিমিত্রের প্রেমবিলাসের চিত্র। সেই চিত্র দেখে মালবিকার চিত্ত উন্মনা। পার্শ্বে অঙ্কিত যে জ্যৈষ্ঠীর প্রতি রাজা একাগ্রলোচন—কে সেই নারী? প্রশ্নের উত্তরে বকুলাবলিকা বলে ইনিই রাজার প্রিয়তমা মহিষী ইরাবতী, স্বভাবতই অপর নারীর প্রতি নায়কের আসক্তি দেখে নায়িকা-স্মলভ প্রেমকোপ সূচিত হলো মালবিকার অন্তরে—তিনি স্থান ত্যাগ করে চলে যেতে উদ্যত। হতেই আত্মপ্রকাশ করলেন রাজা, সঙ্গে বিদূষক। মালবিকার অবস্থা ‘ন যযৌ ন তস্থৌ’। বকুলাবলিকা ও বিদূষক অন্তরালে গেলেন—রাজার সম্মুখে বিহ্বলা মালবিকা একা। এতদিনে বৃষ্টি পূর্ণ হলো রাজার মনোরথ !

ঠিক সেই সময়েই ইরাবতী আসছিলেন সমুদ্রগৃহের দিকে, উদ্দেশ্য ভিত্তিগাত্রে অঙ্কিত রাজার চিত্রে প্রণাম করে রাজাকে অবহেলা করার পূর্ব অপরাধের স্বালন। দ্বারে প্রহরারত বিদূষক নিদ্রামগ্ন ; তাঁর নিদ্রাপ্রলাপ—‘মালবিকা ইরাবতীকে অতিক্রম করিও।’ কুপিত করে তোলে ইরাবতী ও তাঁর সখীকে। সখী নিপুণিকা ভয় দেখানোর জন্মে বিদূষকেরই বংশদণ্ডটি নিষ্ক্ষেপ করে তাঁর ওপর—চমকিত বিদূষক আত্ননাদ করে ওঠে। ‘অবিহা, অবিহা, দব্বীকরো মে উপরিপরিপড়িতো।’—হায় হায়! সাপ কামড়ালো আমাকে। সচকিত হয়ে রাজা ছুটে আসেন—সর্প যদি রাজাকেও দংশন করে—এই আশঙ্কায় তাকে বাধা দেবার জন্মে ত্রস্তা মালবিকাও এগিয়ে আসেন ; বকুলাবলিকা তাঁদের অনুসরণ করে। বিদূষক এখন তাঁর ভ্রম বুঝতে পেরে আশ্বস্ত হয়ে বলে—ও এটা আমারই লাঠি—আমি ভাবলাম, বুঝি মালবিকাকে মুক্ত করার প্রয়োজনে কেতকীর কাঁটায় আঙ্গুলে ক্ষত সৃষ্টি করে, রাজ্ঞীকে মিথ্যা সর্প দংশনের কথা বলে নাগমুদ্রা গ্রহণ করার অপরাধেই এই পরিণাম ঘটল।

সমস্ত গোপনতারই তখন অবসান হয়েছে। ইরাবতী সহসা রাজার সামনে এসে বিজ্রপের সুরে বলে ওঠেন—‘অবি নিবিগ্ধম-পোরহো দিবাসক্ষেদো মিহ্ণস্ব’ ?—দিনের বেলায় অভিসার সার্থক হলো তো ? সকলে স্তম্ভিত। রাজা ইরাবতীকে তুষ্ট করার চেষ্টা করেন—কিন্তু বুথা প্রয়াস। মালবিকা ভীৰু কপোতীর মতই ভয়ত্রস্তা, রাজা কিংকর্তব্যবিমূঢ়। সমস্ত পরিবেশটিতে যেন বজ্রপতনের বিহ্বলতা। সহসা প্রতিহারী এসে জানায় ক্রীড়ারতা রাজকন্যা বসুলক্ষ্মী একটি পিজল বানরের তাড়নায় ভীত হয়ে অশুস্থ হয়ে পড়েছেন। রাজার সহর অন্তঃপুরে আসা প্রয়োজন। তখনকার মত সঙ্কটমুক্ত হলেন রাজা, ইরাবতীও বিদূষকসহ ব্যস্তভাবে রওনা দিলেন রাজ্ঞীর প্রাসাদকক্ষের দিকে। অজানিত লাঞ্ছনার আশঙ্কায়

ভয়কম্পিত চিত্তে মালবিকা অপেক্ষা করতে থাকেন। কয়েক মুহূর্ত গেল কেটে—শোনা গেল আনন্দকলরব, মালবিকার দোহদ দানের ফল ফলেছে—অশোকবৃক্ষ মঞ্জরিত। অতএব প্রতিশ্রুতিবদ্ধ রাজ্ঞী নিশ্চয় মালবিকার বাঞ্ছা পূর্ণ করবেন। আশা-নিরাশার দোলায় দোলে মন।

অবশেষে দেখা গেল একদিন মালবিকাকে বস্ত্রালঙ্কারে সুসজ্জিত করে দেবী ধারিণী পণ্ডিত-কৌশিকী ও অগ্ন্যাত্ম পরিজনসহ সেই প্রমোদ-উদ্যানেই এসেছেন—রাজাকেও জানিয়েছেন আমন্ত্রণ। কী তাঁর উদ্দেশ্য? সকলেই কৌতূহলী। রাজা এলেন বিদূষকসহ। ঋতু বসন্ত এখন পরিণতির পথে; কাননভূমিতে তাই শুরু হয়েছে ফুলের সমারোহ—শুধু অকালকুসুমের শোভায় নয়নাভিরাম রূপ ধারণ করেছে রাজ্ঞীর প্রিয় রক্তাশোক বৃক্ষটি। সর্বোপরি সুশোভিতা মালবিকার বনলক্ষ্মীর মতই অপূর্ব সৌন্দর্য রাজার নয়নে মোহজাল বিস্তার করে। মিলনের কামনা তাঁকে ব্যাকুল করে তোলে, কিন্তু ধারিণীর উপস্থিতির বাধা রজনীতে চক্রবাকের মতই তাঁর বিরহ-যন্ত্রণাকে আরও দ্বিগুণিত করে তোলে। ইতিপূর্বে সংবাদ এসেছে—শত্রু বিদর্ভরাজ পরাজিত—ঐ বংশেরই এক রাজকুমার মাধবসেন, যিনি অগ্নিমিত্রের অন্ত্রগত ছিলেন ব'লে বন্দী হয়েছিলেন; তিনি মুক্ত, উপরন্তু পরাজিত রাজ্য থেকে বহু ধনরত্নসহ সংগীতশিল্পনিপুণা ছ'টি কন্যাও এসেছে উপহারস্বরূপ। রাজার সম্মুখে তাঁদের আনা হলো। মালবিকাকে দেখে তারা যুগপৎ হর্ষ ও বিস্ময়ে অভিভূত হয়ে পড়ে। সম্মুখে ফিরে পেয়ে অভিবাদন জানায় তারা মালবিকাকে। তাদের সসম্মম ভাব লক্ষ্য করে রাজা প্রশ্ন করেন—কে এই কন্যা? বালিকাদ্বয় জানাল, ইনিই বিদর্ভরাজ্যের অগ্ন্যাত্ম উত্তরাধিকারী মাধবসেনের ভগিনী রাজকন্যা মালবিকা। মাধবসেন জ্ঞাতি শত্রুর দ্বারা বন্দী হলে মন্ত্রী স্মৃতি ও তাঁর ভগিনী পণ্ডিত-কৌশিকী অগ্নিমিত্রের সঙ্গে বিবাহদানের উদ্দেশ্যে এঁকে বিদিশায় আনছিলেন। কিন্তু তারপর কী হলো? রাজা ও

সমবেত সকলেই উৎসুক হয়ে ওঠেন। এগিয়ে আসেন পরিব্রাজিকা বেশধারিণী পণ্ডিত-কৌশিকী। তাঁর পরিচয়ও প্রকাশিত হয়ে পড়ল— ইনিই মন্ত্রী স্মৃতির ভগিনী। তিনিই বিবৃত করেন ঘটনার বাকী অংশটুকু। মালবিকাসহ বিদিশাভিমুখে আগমনকালে পথে তাঁরা দস্যুদল কর্তৃক আক্রান্ত হন। মালবিকাকে রক্ষার প্রয়াসে প্রাণদান করেন স্মৃতি। মালবিকা হন অপহৃত। জ্ঞান ফিরে পেয়ে পণ্ডিত-কৌশিকী মৃত ভ্রাতার সংকারের পর মালবিকার সন্ধানে যাত্রা করেন। বিদিশায় এসে তিনি বৌদ্ধ ভিক্ষুগীর বেশ ধারণ করেন—রাজ-অন্তঃপুরে এসে দেখা পেলেন মালবিকার—জানতে পারলেন, সীমান্ত দুর্গের সেনাপতি রাজ্ঞী ধারিণীর ভ্রাতা বীরসেন দস্যুদলের কবল থেকে মালবিকাকে মুক্ত করে ভগিনীর পরিচারিকারূপে প্রেরণ করেন বিদিশায়, মালবিকার প্রকৃত পরিচয় অজ্ঞাতই থেকে যায়। কিন্তু পণ্ডিত-কৌশিকী সমস্ত ঘটনা এতদিন গোপন রেখেছিলেন কেন? রাজ্ঞীর প্রশ্নের উত্তরে তিনি জানালেন—মালবিকার পিতার জীবদ্দশায় জনৈক সন্ন্যাসী বলেছিলেন—‘বৎসরমাত্রমিয়ং প্রেয়্যভাবমহুভূয় ততঃ সদৃশভর্তৃগামিনী ভবিষ্যতি’—‘এক বৎসরের দাস্ত্রবৃত্তির পর এই বালিকা যোগ্য পতি লাভ করবে।’ সেই সময় এখন অতিক্রান্ত। হৃৎখের অমানিশা অবসিত, সৌভাগ্যের সূর্য পূর্বাচলে। তাঁদের জন্ম অপেক্ষা করছিল আরও আনন্দ-সংবাদ—কধুকীর আনৌত পত্র পাঠ করে রাজা জানালেন—পুত্র বসুমিত্র যুদ্ধে শত্রুরাজগণকে পরাজিত করে যজ্ঞীয় অশ্বকে নিরাপদে ফিরিয়ে এনেছেন, যজ্ঞের আয়োজন এখন সম্পূর্ণ। অনতিবিলম্বে সপরিবারে, রাজা অগ্নিমিত্রের যাওয়ার প্রয়োজন—ঐ সংবাদ পাঠিয়েছেন পুষ্পমিত্র—যিনি সৈন্যবাহিনীর ভারপ্রাপ্ত অধ্যক্ষ এবং অগ্নিমিত্রের পিতা। পুত্র বসুমিত্রের বিজয়বার্তায় রাজ্ঞী হৃষ্টচিত্তে স্বামীকে বলেন—‘ইমং অজ্ঞউত্তো পিঅণিবেদণাণুরুবং পরিতোসি অংগ পড়ীচ্ছহু’—‘যে প্রিয় সংবাদ জানালেন তার উপযুক্ত পারিতোষিক গ্রহণ করুন’, এই বলে অবগুষ্ঠিত।

মালবিকাকে সমর্পণ করেন অগ্নিমিত্রের হস্তে। নায়ক-নায়িকার
সুপ্রতীক্ষিত মিলন এতদিনে সাধিত হলো—নেমে এল
নাটকের যবনিকা। দেবী ধারিণী যেন সেই সমুদ্রগামিনী বিশাল
শ্রোতস্বিনী, যে ক্ষুদ্র নদীগুলিকে নিজের সঙ্গে মিশিয়ে মিলিয়ে দেয়
সাগরে। অন্তরিতামপি জলং সমুদ্রগাঃ প্রাপয়ন্ত্যদধি।

বিক্রমোর্বশীয়ম্

রাজা পুরুরবা সূর্যোপস্থান থেকে ফিরে আসছিলেন সূর্যবন্দনা সেরে—হঠাৎ শুনতে পেলেন নারীকণ্ঠের মিলিত ক্রন্দনধ্বনি। সযত্ন অনুসন্ধানের পর জানলেন—অপ্সরা উর্বশী যখন কৈলাস পর্বত থেকে দেবপূজা সেরে ফিরছিলেন তখন ‘কেশি’ নামে এক দৈত্য সখী চিত্রলেখাসহ তাঁকে হরণ করেছে—তাই রম্ভা প্রমুখ সখীদের এই বিলাপ। তৎক্ষণাৎ পুরুরবা ধনুর্বাণ ধারণ করে দৈত্যরাজের অনুসরণে যাত্রা করলেন। অপ্সরারাও এখন আশ্বস্ত, কারণ রাজা পুরুরবার বীরত্ব সুবিদিত। তাঁর শৌর্যের জন্তু স্বয়ং দেবরাজ ইন্দ্রও তাঁকে এক সময় দৈত্যদের বিরুদ্ধে দেবসেনার নেতৃত্ব দিতে বাধ্য হয়েছিলেন। উদ্বিগ্নচিত্তে সবাই পুরুরবার প্রত্যাগমনের প্রতীক্ষায় মুহূর্ত গুনে চলে...। স্বল্প পরেই তিনি ফিরে এলেন—সঙ্গে ভীতিবিহ্বলা উর্বশী ও সখী চিত্রলেখা! পুরুরবার অসাধারণ বাহুবলেই সম্ভব হলো কেশির নিধন ও উর্বশীর পুনরুদ্ধার। অসামান্য রূপযৌবনবতী অপ্সরার কৃতজ্ঞ-দৃষ্টি রাজাকে স্পর্শ করে যায়—রাজার অন্তরও সেই অতুলনীয় লাবণ্য-শোভায় বিমুগ্ধ—প্রথম দর্শনেই প্রেম! পুরুরবার কাছে দেবরাজ ইন্দ্রের অভিনন্দন বহন করে আনেন গন্ধর্ব চিত্ররথ। তাঁর অভিনন্দনের উত্তরে পুরুরবা বলেন—‘ইন্দ্রের প্রভাবের ফলেই এই দুর্লভ কর্তব্য সাধন করা সম্ভব হয়েছে।’ লক্ষণীয় পুরুরবার বিনয়প্রকাশ—‘অনুৎসেকঃ খলু বিক্রমালঙ্কারঃ’—নতুনতাই তো শৌর্যের ভূষণ।

উর্বশীর কিন্তু আর সময় বাকি নেই—তাকে এবার ফিরে যেতে হবে স্বস্থানে—স্বর্গলোকে। সখীর মাধ্যমে রাজাকে বিদায় সম্ভাষণ জানিয়ে যাত্রা করেন উর্বশী—কিন্তু মন তো সরে না! ‘যেতে যেতে চায় না যেতে, ফিরে ফিরে চায়।’ ছলনার আশ্রয় নিয়ে রাজার দিকে

বারবার ফিরে তাকাচ্ছেন তিনি—লতায় যেন জড়িয়ে গেল মুক্তাহারটি—ছাড়িয়ে নেওয়ার অবকাশে রাজার সঙ্গে আরেকবার দৃষ্টি-বিনিময় হয়—প্রেমিকের চক্ষু সহজেই পড়ে নিতে পারে প্রেমের ভাষা! ছুঁজনের মনের বাসনা আর ছুঁজনের কাছে গোপন থাকে না—‘উঠিল ফুটিয়া নীরব নয়নে’!

উর্বশীর বিদায়ের পর পুরুষের অবস্থা অত্যন্ত করুণ—রাজকার্যের প্রতি তাঁর বিতৃষ্ণা—উদ্ভ্রান্তের মতই তিনি সেই নন্দনবাসিনীর জঙ্ঘা হা-হতাশ করে চলেন। এই অবস্থা দেখে বিদূষক তাঁকে নিয়ে আসেন প্রাসাদ-সংলগ্ন প্রমোদোত্তানে—লতামণ্ডপস্থ প্রস্তরাসনে ছুঁজনে উপবেশন করেন। ঋতুরাজ বসন্তের আবির্ভাবে উত্তানের শোভা অতি অপরূপ! কিন্তু প্রকৃতির এই সৌন্দর্য উর্বশী বিহনে রাজার মনকে আরও আকুল করে তোলে! ওদিকে উর্বশীর কাছেও স্বর্গস্থ তুচ্ছ মনে হয়—রাজা পুরুষের সঙ্গে মিলনের আকাঙ্ক্ষা তাঁর এতই প্রবল। অতএব স্বেচ্ছাবিহারিণী অপ্সরা স-সখী সেই উত্তানেই চলে আসেন। তিরস্করিণী বিদ্যায় অদৃশ্য থেকে শুনতে থাকেন রাজার বিলাপ। অবশেষে তিনিও একটি ভূর্জপত্রে লিখে ফেললেন নিজের মনের কথা—সে’টি উড়ে এসে পড়ল রাজার সামনে। রাজা সাগ্রহে কুড়িয়ে নিয়ে পড়ে দেখেন—উর্বশীর পত্র!

বিরহ-বিশীর্ণা উর্বশীর কাছে পারিজাত পুষ্পের কোমল শয্যা, নন্দনকাননের শীতল পবনও উষ্ণ বলে বোধ হচ্ছে—একথাই তিনি জানিয়েছেন ছন্দোবদ্ধ পদবন্ধে।

—একি, এ যে তাঁর মতই আকুলতা ফুটে উঠেছে প্রতি ছত্রে! বারবার পড়েও আশ মেটে না। অবশেষে ওটি সযত্নে রক্ষা করতে বলেন বিদূষককে।—এইবার অবসর বুঝে চিত্রলেখা তাঁর প্রতি উর্বশীর গভীর আকর্ষণের কথা প্রকাশ করলেন—কি এক দুর্লভ আশায় তাঁর হৃদয় কম্পিত—মেঘের আড়াল থেকে এবার বুঝি দেখা দেয় বিদ্যুৎ—কারণ ‘প্রথম মেঘরাজিদ্‌শতে—পশ্চাদ্বিহ্বলতা।’

রাজার আশা পূর্ণ করে এবার স্বয়ং উর্বশীই আত্মপ্রকাশ করেন—
উল্লাস ও বিস্ময়ে অভিভূত রাজা সাদরে নিজের পাশে বসালেন—
বিমুগ্ধ বিস্ময়ে কেটে যায় কয়েকটি মুহূর্ত!...!...! কিন্তু হরিষে
বিষাদ। বহুবাহিত মিলনক্ষণের স্থায়িত্ব খুবই স্বল্প—নেপথ্য
থেকে আদেশ ঘোষিত হয়—‘স্বর্গসভায় দেবরাজ ইন্দ্র নাট্যগুরু ভারতের
পরিচালনায় নাট্যাভিনয় দর্শন করবেন।’ অতএব বিদায় নিতে
হ’লো স্বর্গনটী উর্বশীকে কর্তব্যের ডাকে। রাজার সামনে এখন আবার
শুধুই অতল বিরহ-পারাবার।

এই সঙ্কট-মুহূর্তেই পুরুষবাপত্তী কাশীরাজ-তুহিতা এসে উপস্থিত
সেই প্রমোদোত্তানে। বিদূষকের অসাবধানতায় সেই ভূর্জ-
পত্রের লিখনটিও উড়ে গিয়ে পড়ে রানীর কাছে। বিদূষক যখন ও’টি
খুঁজে পাওয়ার বৃথা চেষ্টায় ব্যস্ত তখনই রাজ্ঞী বিদ্রূপ-কুটিল কণ্ঠে
মহারাজকে বললেন—‘এই যে আপনার সেই রাজকার্যের প্রয়োজনীয়
ভূর্জপত্র!’—রাজা হতবাক। বামাল ধরা পড়লে চোরের জবাব
দেওয়ার আর কিই বা থাকে! রাজা সত্য গোপনের প্রয়াস পেলেও
রানীর কাছে সবকিছু দিনের আলোর মতই পরিষ্কার। বিস্মুগ্ধ চিত্তে
তিনি চলে যেতে উদ্বৃত্ত হতে রাজা অন্ততপ্তভাবে তাঁর চরণ ধরে
অনুনয় করতে থাকেন। অন্তঃপুর-বিপ্লবকে কোন্ সাহসী পুরুষই
বা ভয় না করেন! কিন্তু ক্রুদ্ধা, অপমানিতা রাজ্ঞী কোনোদিকে
দৃকপাত না করে সবেগে প্রস্থান করেন।

স্বর্গে অভিনীত হচ্ছে নাট্যাচার্য ভারত রচিত লক্ষ্মীর স্বয়ংবর নাটক।
নাম ভূমিকায় স্বয়ং উর্বশী। কিন্তু অভিনয়ের মধ্যেই তিনি ঘটালেন
প্রমাদ—কমলার বাহিত পুরুষ রূপে পুরুষোত্তমের নাম উচ্চারণ করতে
গিয়ে বলে ফেললেন—‘পুরুষবা’। নাট্যাচার্য এই ভ্রান্তির জগ্ধে
বিরক্ত হয়ে অভিশাপ দিলেন—‘স্বর্গভ্রষ্ট হও।’ দেবসভায় লজ্জায়
অপমানে নতশির উর্বশীকে দেখে দেবরাজের মনে সহানুভূতির সঞ্চার
হ’লো—শাপের গুরুত্ব কিছু লাঘব করার উদ্দেশ্যে তিনি বললেন—

‘উর্বশী এখন মর্ত্যে গিয়ে পুরুষবার সঙ্গে বাস করতে পারে, তবে পুত্রমুখ দর্শনের পর আবার তার স্বর্গবাসের অধিকার ফিরে আসবে।’

সন্ধ্যা সমাসন্না—পাখীরা ফিরেছে কুলায়ে—প্রদীপ জ্বলে উঠেছে ঘরে ঘরে—ধূপের ধোঁয়ায় প্রাসাদগুলি ঢাকা পড়ে যাচ্ছে ধীরে ধীরে। রাজা দিনের কর্তব্য সমাধা করে এবার বিশ্রাম নেবেন—এমন সময় কণ্ঠকী সংবাদ আনে—‘রাজ্ঞী ব্রতপালনের জন্তে চন্দ্র-রোহিণীর সংযোগ-মুহূর্ত পর্যন্ত রাজার সঙ্গে ‘মণি-হর্ম্যে’র ওপর একত্র অবস্থানে ইচ্ছুক।’ আসলে পায়ে ধরে সাধা সত্ত্বেও রাজাকে ইতিপূর্বে অবহেলা করে রানী এখন অন্ততপ্ত—তাই রাজাকে সন্তুষ্ট করার জন্তেই তাঁর এই প্রস্তাব। জ্যোৎস্নাপ্লাবিত সন্ধ্যার অপরূপ শোভা দেখতে দেখতে রানীর নির্দেশিত স্থানে উপস্থিত হলেন রাজা পুরুষবা—বিদূষকসহ রানীর প্রতীক্ষা করতে থাকেন—কিন্তু তাঁর অন্তর এক মুহূর্তের জন্তেও উর্বশীর চিন্তা থেকে বিরত হতে পারছে না—বিদূষক তাঁকে আশ্বাস দিতে থাকেন—‘উর্বশীর সঙ্গে আপনার মিলন ঘটবেই।’

এদিকে স্বর্গচ্যুতা উর্বশী সখী চিত্রলেখাসহ অভিসারিকার বেশে পুরুষবার উদ্দেশ্যে যাত্রা করেছেন আকাশযানে। প্রাসাদশিখরে বিদূষকসহ উপবিষ্ট চিন্তামগ্ন রাজা ক্রমশ তাঁদের দৃষ্টিপথে এলেন—অন্তরাল থেকে তাঁরা দু’জনের কথাবার্তা শুনতে থাকেন। এই সময়ই রাজা সখার কাছে প্রকাশ করছিলেন উর্বশী-বিহীন তাঁর অবস্থার কথা—কুসুমশয্যা—চন্দ্রকিরণ—চন্দনের প্রলেপ—সুশীতল মণিরত্ন—কিছুই তাঁর দাহ জুড়ানোর পক্ষে যথেষ্ট নয়—সেই স্বর্গকন্য়ার জন্তে তাঁর বাসনা এতই গভীর।—এবার স্বয়ং রাজ্ঞী এসে উপস্থিত। অগ্ন্য নারীকে হৃদয় সমর্পণ করা সত্ত্বেও রাজা স্বাভাবিক আভিজাত্যে পত্নীকে উপযুক্ত সম্মান প্রদর্শন করলেন। প্রথমে চন্দ্রের উদ্দেশ্যে অঞ্জলি দানের পর প্রসাদী মিষ্টান্ন বিতরণ করে রানী লুটিয়ে পড়লেন রাজার

পায়ে—পতিপ্রাণা পত্নী স্বামীর প্রীতির জন্তে ঘোষণা করেন—‘অথ প্রভৃতি যাং স্ত্রিয়মার্যপুত্রঃ প্রার্থয়তে, যা চার্যপুত্রস্ত সমাগমপ্রণয়িনী, তয়া সহ ময়া প্রীতিবন্ধনেন বর্তিতব্যমিতি ।’ ‘আজ থেকে যে নারীকে আর্যপুত্র কামনা করবেন বা যে নারী তাঁকে প্রার্থনা করবেন তাঁর সঙ্গে আমি প্রীতির সম্বন্ধই বজায় রাখব ।’—উর্বশীর সঙ্গে মিলনের প্রধান অন্তরায় অপগত হলো রানীর সম্মতিতে । পত্নীর বিদায়-গ্রহণের পর রাজা আবার ভূবে যান উর্বশীর ভাবনায়—সহসা চোখের ওপর কার কোমল অঙ্গুলির স্পর্শে চমকে ওঠেন—কে যেন পেছন থেকে এসে তাঁর চোখ দু’টি চেপে ধরেছে ! অভীষ্ট সেই স্পর্শ চিন্তে ভুল হয় না রাজার—সাদরে উর্বশীকে বসালেন নিজের আসনে—সঙ্গিনী চিত্রলেখা উর্বশীকে তাঁর হস্তে সমর্পণ করে অহুরোধ জানালেন—‘আপনার ব্যবহার যেন এঁকে স্বর্গ ও স্বজন-বিচ্ছেদের বেদনা ভুলিয়ে দিতে পারে ।’—বাহুজিতাকে লাভ করে ধন্য হলেন রাজা পুরুষবা—চিত্রলেখা বিদায় নিলেন ।

মিলনসুখী দম্পতী নানাস্থানে ভ্রমণ করতে থাকেন—অবশেষে তাঁরা উপস্থিত হ’ন গন্ধমাদন অরণ্যে,—আনন্দে হৃ’জনে নন্দনবনে বিহার করছিলেন—কিন্তু তাঁদের সুখের নির্মল আকাশে ঘনিয়ে এলো ছুঃখেরকালো মেঘ । মন্দাকিনী তাঁরে এক বিদ্যাধর-কণ্ঠার দিকে পুরুষবা দৃষ্টিপাত করেছেন—এই অপরাধে অভিমানক্ষুধা উর্বশী তাঁকে পরিত্যাগ করে চলে যেতে যেতে হঠাৎ ঢুকে পড়েন কুমার কার্তিকেয়ের সংরক্ষিত অরণ্যে । নারীর প্রবেশ নিষিদ্ধ ছিল এই অঞ্চলে—ফলে উর্বশী পরিণত হলেন এক ‘শ্যামকাস্তিময়ী’ লতায় । আর পুরুষবার অবস্থা ? তিনি উন্মাদের মতই খুঁজে বেড়াচ্ছেন হারানো প্রিয়াকে জল-স্থল-অন্তরীক্ষে—সর্বত্রই যেন তিনি দেখছেন তাঁর প্রেমসৌর ছায়া ! আকাশে দেখা দিয়েছে ঘন মেঘ—তার ফাঁকে বিজলীর ছটায় বুঝি উর্বশীরই দিব্য কাস্তি ঝলসে উঠছে ! জলসিক্ত রক্তবর্ণ কদলীপুষ্প তো নয়—এ বুঝি উর্বশীরই অভিমানরক্তিম সজল তাঁখি । মানস-

সরোগামী হংসকুলের কলধ্বনিতে যেন বেজে চলেছে তাঁরই নূপুর-
নিকণ !—কিন্তু কোথায় উর্বশী ! এ-সবই তো রাজার ভ্রমমাত্র !—
নিজের হুঁভাগ্যকে দায়ী করে বিলাপ করতে থাকেন তিনি—হঠাৎ
দেখতে পেলেন সামনে পড়ে আছে রক্তবর্ণের উজ্জ্বল এক রত্নখণ্ড—
নেপথ্য থেকে শোনা গেল কোনো ঋষির আদেশবাণী—‘বৎস, গ্রহণ কর
এই সঙ্গমমণি, এর দ্বারাই বাঞ্ছিত মিলন সাধিত হবে।’ সাগ্রহে
সংগ্রহ করেন রাজা মণিটি—অরণ্যের আরও দুর্গম অঞ্চলে প্রবেশ
করেন হারানো প্রিয়ার অনুসন্ধানে।—একটি অপরূপ লতা-মূর্তির
সামনে এসে থমকে দাঁড়ালেন রাজা—‘কি অপূর্ব শোভা এই লতাটির
—এর অঙ্গে অঙ্গে যেন উর্বশীরই দেহলাবণ্য ! নিবিড় আলিঙ্গনে
বুকে চেপে ধরেন লতাটিকে—আবেশে তাঁর চক্ষু মুদ্রিত।—এ যেন
প্রিয়তমার উষ্ণ কোমল দেহের স্পর্শ ! কয়েক মুহূর্ত কেটে যায়—
—চোখ খুলেই রাজা স্তম্ভিত।—স্বয়ং উর্বশী তাঁর বক্ষোলগ্না।
সঙ্গমমণির সংস্পর্শেই ‘কুমারবনে’ অনধিকার-প্রবেশের অভিষাপ
দূর হলো—উর্বশী দেহ ফিরে পেলেন।—সব ভুল বোঝাবুঝির
অবসানের পর হুঁজনে যাত্রা করলেন রাজধানীর উদ্দেশে।

রাজা পুত্ররবা এবার রাজকার্যের প্রতি মনোযোগ দিয়েছেন।
একদিন প্রাতঃস্নানের পর প্রসাধনের সময় সঙ্গমমণিটি আনা হচ্ছিল
তাঁর ধারণের জন্তে—এমন সময় এক লুক্ক শকুনি রক্তবর্ণ মণিটিকে
মাংসখণ্ড মনে করে ছৌঁ মেরে নিয়ে উড়ে চলে গেল বহুদূরে—রত্নটি
উদ্ধারের সব চেষ্টাই ব্যর্থ হলো। সকলেই যখন নিরাশ হয়ে পড়েছে
তখন ঘটল এক আশ্চর্য ঘটনা—কোনো অজ্ঞাতনামা তীরন্দাজের
তীরবিদ্ধ হয়ে মণিসহ পাখীটি পড়ে গেল ভূমিতে। রাজার লোকেরা
তীর ও মণিটি নিয়ে আসে রাজার কাছে। তীরের পেছনে লেখা
নাম—‘ঐল বা পুত্ররবার পুত্র আয়ুস্’—সকলেই বিস্মিত ! এই সময়
এক সন্ন্যাসিনী একটি বালককে নিয়ে উপস্থিত। পুত্ররবার অন্তর
বাৎসল্যে ভরে ওঠে এই অজ্ঞাতপরিচয় বালককে দেখে—তাঁর নিজের

সঙ্গে কী অদ্ভুত সাদৃশ্য ! ধীরে ধীরে তাপসী পরিচয় প্রকাশ করেন—
জন্মদানের পর উর্বশী সন্তানকে ঋষির আশ্রমে এই তাপসীর তত্ত্বাব-
ধানেই রেখে আসেন—কারণ ইন্দ্রের আদেশ ছিল রাজা পুরুরবা
পুত্রমুখ দর্শন করলেই উর্বশীকে ফিরে যেতে হবে স্বর্গে। পাছে
পুরুরবার বিরহ সহ্য করতে হয়—তাই এই ছলনা। উর্বশী সাধারণ
মানবী নন, দৈবী ক্ষমতার বলে সন্তানলাভের ব্যাপারটি তিনি অনায়াসে
পুরুরবার কাছে গোপন করতে পেরেছিলেন। কিন্তু শেষপর্যন্ত
গোপনতা রক্ষা করা গেল না—তীরটির মাধ্যমে ব্যাপারটি প্রকাশিত
হয়ে পড়ল। অতএব আবার হরিষে বিষাদ ! পুত্রপ্রাপ্তির
আনন্দকে ছাপিয়ে উঠল আসন্ন প্রিয়া-বিচ্ছেদের বেদনা। শাস্ত
পদক্ষেপে অশ্রুসজলনেত্রে প্রবেশ করেন উর্বশী—এবার এসেছে
তাঁর বিদায়ের লগ্ন, কারণ রাজা এখন পুত্রমুখ দর্শন করেছেন। পুত্র
আয়ু সাগ্রহে জনক-জননীর চরণ বন্দনা করে। কিন্তু পুরুরবার দুঃখের
বুঝি তুলনা নেই—এ যে সব পেয়েও হারানো। জীবনপাত্র যখন
কানায় কানায় পূর্ণ হতে চলেছে তখন রূঢ় বাস্তবের আঘাতে তা চূর্ণ-
বিচূর্ণ।

ঠিক এই সময়েই ঋষি নারদ স্বর্গ থেকে এসে উপস্থিত—না জানি
স্বর্গ থেকে আবার কোন্ বার্তা বয়ে আনলেন। দেবর্ষি আবার ইন্দ্রের
সংবাদ জানালেন—দম্ভ্যদলনের প্রধান সহায় রাজা পুরুরবার মনস্তাপ
ঘটাতে দেবরাজ অনিচ্ছুক, অতএব যতদিন ইচ্ছা উর্বশী সপুত্র রাজার
কাছে থাকতে পারেন। শুধু তাই নয়, পুত্র আয়ুর অভিষেকের উপযুক্ত
আয়োজন-উপহারও তিনি পাঠিয়ে দিয়েছেন। সব সমস্তার সমাধান
হলো। নারদ কর্তৃক যৌবরাজ্যে অভিষিক্ত হয়ে গুরুজনদের প্রণাম
জানালেন কুমার আয়ু। রাজপরিবারের জয়গানে মুখর হয়ে উঠল
চারিদিক।

অভিজ্ঞানশকুন্তলম্

মৃগয়াবিলাসী রাজা দৃষ্টান্ত মৃগয়ার উদ্দেশ্যে যাত্রা করেছেন। এক ধাবমান হরিণকে অনুসরণ করে বহুদূর চলে এসেছেন—সঙ্গের লোকজন সব পিছনে পড়ে গেছে। সারথি ক্রমশঃ রথের বক্সা ছেড়ে দেয়—বায়ুবেগে ছুটে চলে রথ—এবার বাণের নাগালের মধ্যে পেয়েছেন হরিণটিকে—তীর নিক্ষেপ করতে উত্তত হতেই শোনা গেল সাবধান-বাণী—‘...আশ্রমমৃগোহয়ং ন হন্তব্যো ন হন্তব্যঃ’—‘মারবেন না, মারবেন না এই আশ্রমমৃগকে।’—এগিয়ে আসেন তাপসেরা, তাঁরা বলেন—‘তুলারাশিতে অগ্নিসংযোগের মতই এই কোমল মৃগদেহে তীক্ষ্ণ বাণ নিক্ষেপ করা উচিত নয়’। তপস্বীর প্রতি শ্রদ্ধাশীল রাজা তৎক্ষণাৎ বাণ সংবরণ করেন ; এঁদের কাছ থেকে জানা গেল—এখানেই মালিনী নদীর তীরে ঋষি কণ্ঠের আশ্রম। তিনি কন্যাকে অতিথি পরিচর্যার দায়িত্ব অর্পণ করে সবেমাত্র সোমতীর্থে গেছেন কন্যারই মঙ্গলবিধানের উদ্দেশ্যে। তপোবনে আতিথ্য গ্রহণের জন্তে রাজাকে আহ্বান জানিয়ে তাঁরা বিদায় নিলেন যজ্ঞীয় সমিধ্ সংগ্রহের প্রয়োজনে।

রথ ও রাজসজ্জা দূরে রেখে নম্রভাবে তপোবনে প্রবেশ করেন রাজা দৃষ্টান্ত—প্রথমেই দক্ষিণ বাহু স্পন্দিত হলো—এই লক্ষণ তো পত্নীলাভের সূচক ! কিন্তু ব্রহ্মচর্য যেখানে অবশ্য পালনীয় সেই তপোবনে এই লক্ষণ ফলপ্রসূ হওয়ার সম্ভাবনা কোথায় ?—‘ইদো ইদো সহীও’—‘এই যে এইখানে সখি’ ! কাছেই যেন নারীকণ্ঠের আহ্বান শোনা যাচ্ছে ! কোতূহলী হয়ে উঠলেন রাজা—গাছের আড়ালে আত্মগোপন করে দেখতে পেলেন—রূপ-লাবণ্যময়ী সমবয়সী তিনটি তরুণী আশ্রম-তরুর আলবালে জলসেচনে ব্যস্ত। গোপনে

শুনতে থাকেন তাদের আলাপ—প্রথম সখী বলে—পিতা কণ্ঠের কাছে কণ্ঠা শকুন্তলার চেয়ে আশ্রমবৃক্ষগুলি নিশ্চয় প্রিয়তর—নাহলে কি আর কুসুমকোমলা তোমাকে এই জলসেচনের মত কাজে নিযুক্ত করে যান ?

—‘না, না, অনশূয়া, শুধু এজ্ঞেই নয়, আমিও তো এদের সহোদরের মতই দেখি’। রাজা বৃদ্ধিতে পারেন ইনিই কণ্ঠহিতা শকুন্তলা। সত্যিই, এই স্নকুমারতনু তরুণীকে কঠোর আশ্রমধর্ম পালনে নিযুক্ত করে ঋষি যেন পদ্মের পাপড়ি দিয়ে শমীগাছের শক্ত ডাল কাটবার চেষ্টা করছেন। এই তপোবন-কণ্ঠার অপরূপ তনুশ্রী রাজাকে মুগ্ধ করে—শৈবালযুক্ত কমলিনীর মত, কলঙ্কবিভূষিত চন্দ্রের মত বঙ্কলবসনা শকুন্তলার দেহকাস্তি যেন আরও নয়নাভিরাম হয়েছে ! নবযৌবনবতী শকুন্তলা পুষ্পিতা লতার মতই মনোরম। জলদানের সময় লতা থেকে একটি ভ্রমর তাঁর মুখের দিকে উড়ে আসতে থাকে —অনেক চেষ্টা সত্ত্বেও কিছুতেই তাকে নিকৃতি দিচ্ছে না দেখে ব্যতিবাস্ত শকুন্তলা বলে বসেন—‘আমাকে এই ছুষ্ট মধুকরের হাত থেকে রক্ষা কর।’ সখীরা পরিহাস করে বলে—‘ছুষ্টের দমনকর্তা রাজা ভ্রূষন্তকে ডাক’। রাজা বৃদ্ধিতে পারেন—আত্মপ্রকাশের পক্ষে এইটাই উপযুক্ত সময়। বীরদর্পে এগিয়ে এসে তিনি বলেন—‘পুরু-বংশীয় রাজার শাসন সত্ত্বেও কোন্‌ দুর্বিনীত অবলার উপর অত্যাচারের স্পর্ধা রাখে!’—সহসা এক অপরিচিত আগন্তকের আগমনে সখীরা চমকিত—অনশূয়া জানায়—‘অণু কিছু নয়, ভ্রমরের উপদ্রবই এই কাতরতার কারণ’। কিন্তু কে এই রূপবান্‌ অথচ গম্ভীরাকৃতি পুরুষ ? অতিথিকে অভ্যর্থনার উপযুক্ত আয়োজনের জন্তে শকুন্তলাকে কুটিরে পাঠাতে চায় সখীরা—কিন্তু ইতিপূর্বেই শকুন্তলার লাভ্যে রাজা বিমুগ্ধ—শকুন্তলাও এই আগন্তকের দর্শনমাত্রেই ‘তপোবন-বিরোধী বিকার’ প্রাপ্ত হয়েছেন। অতএব রাজার আগ্রহে সকলেই ছায়াশীতল সপ্তপর্ণ বৃক্ষের বেদিকাতে উপবেশন করেন। এবার সখীরা সসম্মমে আগন্তকের

পরিচয় জিজ্ঞাসা করেন—দুঃশ্যন্ত নিজের প্রকৃত পরিচয় গোপন করে জানালেন—পৌরব রাজা কর্তৃক তিনি শাসনকার্যে নিযুক্ত ; আশ্রম-জীবন নির্বিশ্ব কিনা জানার জন্তই তাঁর আগমন । ইতিমধ্যে শকুন্তলার শৃঙ্গারসূচক হাবভাব সখীদের পরিহাসপ্রবণ কোরে তোলে—তারা বলে—‘ঋষি কথ আজ যদি আশ্রমে উপস্থিত থাকতেন তা হলে এই বিশিষ্ট অতিথিকে নিজের জীবনসর্বস্ব দান করতেও বিমুখ হতেন না’ । রাজার মনেও শকুন্তলা সম্বন্ধে নানা জিজ্ঞাস্য—‘ঋষি কথ তো আজীবন ব্রহ্মচর্যব্রতধারী, তবে শকুন্তলার জন্ম কিভাবে সম্ভব হলো ?’

অনসূয়া শকুন্তলার জন্মকাহিনী বিবৃত করে বলে—‘রাজর্ষি বিশ্বামিত্র কঠোর তপশ্চর্যা শুরু করায় উদ্বিগ্ন দেবতারা যথারীতি তপোভঙ্গের জন্তে অপ্সরা মেনকাকে প্রেরণ করেন—এঁদেরই কন্যা শকুন্তলা—জন্মের পর পরিত্যক্ত হ’লে ঋষি কথই পালন করেছেন ।’

—কিন্তু এঁকে কি ঋষি ব্রহ্মচর্যেই দীক্ষিত করবেন, না বিবাহ দেবেন ? সখীরা জানায়—‘সুপাত্রে কন্যাদানই ঋষির অভিপ্রেত’ । উৎসাহিত হয়ে উঠলেন দুঃশ্যন্ত—তা’হলে অপ্সরাকন্যা শকুন্তলাকে পত্নীরূপে কামনা করায় কোনো নীতিগত বাধা নেই ! সখীদের উক্তিতে কৃত্রিম কোপে শকুন্তলা যখন চলে যেতে উদ্যত, সখীরা তখন তাকে জোর করে ধরে রাখে—প্রিয়ংবদা বলে—‘আমার কাছে তোমার দু’টি গাছে জল দেওয়ার ঋণ আছে—আগে নিজেকে ঋণমুক্ত কর—তারপর যেতে পাবে ।’ অদর্শনের আশঙ্কায় দুঃশ্যন্ত নিজ অঙ্গুরীয়ক দানে পরিশ্রান্তা শকুন্তলাকে ঋণমুক্ত করতে চাইলেন । এই অঙ্গুরীয়কে উৎকীর্ণ রাজা দুঃশ্যন্তের নাম দেখে সকলে বিস্মিত । সত্য গোপনের জন্তে রাজা তাড়াতাড়ি বলেন—‘অথ কিছু চিন্তার কারণ নেই, এটি মহারাজকর্তৃক প্রদত্ত ।’ কিন্তু তাঁর এই গোপনতা রক্ষার প্রয়াস বোধহয় সফল হ’লো না । প্রিয়ংবদা বলে—‘শকুন্তলে, তুমি তাহলে এই মহাশয়, অথবা স্বয়ং মহারাজের দ্বারাই ঋণমুক্ত হলে ।’ বেশীক্ষণ স্থায়ী হলো না এই মধুর আলাপের অবসর—নেপথ্য থেকে

ঘোষণা শোনা গেল—‘মৃগয়াবিহারী রাজা দৃশ্যান্তের সৈন্যে আগমনে আশ্রমে বিশৃঙ্খলা দেখা দিয়েছে—দন্তে লগ্ন ভগ্ন বৃক্ষশাখা ও পদতলে আবদ্ধ ছিন্ন লতাপাশসহ এক মত্ত মাতঙ্গ দানবের মতই আশ্রমজীবন লগ্নভগ্ন করে দিয়ে সবেগে এগিয়ে আসছে...’ বাধ্য হয়েই সমখী শকুন্তলাকে কুটিরের দিকে ফিরে যেতে হয়। রাজাও আশ্রমের শান্তিভঙ্গ না করার জন্তে তাঁর সৈন্যবাহিনীকে সংযত করার প্রয়োজন অনুভব করেন। যাওয়ার সময় শকুন্তলা—পায়ে কুশের কাঁটা ফুটেছে এই অজুহাতে, কখনও বা গাছের ডালে জড়িয়ে-যাওয়া বন্ধন মুক্ত করার ছল করে পিছন ফিরে রাজার দিকে বার বার দৃষ্টিপাত করতে থাকেন। কর্তব্যের আস্থানে রাজাকেও বিপরীত দিকে যেতে হয়। কিন্তু মন চলে যেতে থাকে শকুন্তলার উদ্দেশ্যে।

রাজবয়স্ক বিদূষক অরণ্যজীবনে অস্থির হয়ে উঠেছে—বন্যজন্তুদের সঙ্গে বিচরণ, অনিয়মিত আহার-নিদ্রা তার আর সহ হচ্ছে না। তাই রাজাকে আসতে দেখে তাঁর করুণা উদ্বেকের জন্তে হাড়গোড় ভেঙে যাওয়ায় শরীর বাঁকা হয়ে গেছে—এইরকম ভাণ করে দাঁড়িয়ে রইল। রাজা এসে তার এই অবস্থার কারণ জিজ্ঞাসা করামাত্র সে রাজাকেই দায়ী করে—মৃগয়ার জন্তে ঘুরে ঘুরেই তার এই অবস্থা। তাকে আশ্বাস দিলেন রাজা—মৃগয়া আপাতত পরিত্যক্ত হ’লো। মৃগয়ার ব্যবস্থাপক সেনাপতিকে ফিরে যেতে হয় ক্ষুণ্ণ মনে; বিদূষক অবশ্য এই সিদ্ধান্তে খুবই আনন্দিত। এবার নিভৃতে বিদূষকের কাছে দৃশ্যান্ত শকুন্তলার রূপ বর্ণনা করে বলেন—বিধাতা যেন প্রথমে ছবি এঁকে নিয়ে পরে তাতে প্রাণপ্রতিষ্ঠা করেছেন—কিংবা সৃষ্টির সমস্ত সৌন্দর্য আহরণ করে তিলোত্তমার পর শ্রেষ্ঠ নারীসৃষ্টি রূপে এই মানসী প্রতিমাকে গড়ে তুলেছেন।...অনাস্রাত পুষ্পের মত, অনাস্রাদিত মধুর মত, অনাবিন্দ রত্নের মত, পুষ্পের অখণ্ড ফলের মতই ইনি এখনও পবিত্র কৌমার্যে অধিষ্ঠিত। না জানি কোন্ ভাগ্যবান্ বিধির বিধানে এঁকে লাভ করতে সমর্থ হবে! কিন্তু রাজার প্রতি শকুন্তলার

মনোভাব কি? বিদূষকের প্রশ্নের উত্তরে রাজা শকুন্তলার সব হাবভাব লীলা চাক্ষুস্যের কথা প্রকাশ করে বলেন। সব শোনার পর বিদূষকের মন্তব্য : ‘তবে আর কি, তপোবন তো উপবনে পরিণত হয়ে গেল’। তাঁদের এই কথাবার্তার মধ্যেই রাজমাতার আদেশ নিয়ে রাজধানী থেকে হঠাৎ দূত উপস্থিত—‘পুত্রপিণ্ড-পালন ব্রতের উদ্‌যাপনের দিন অবশ্যই পুত্র দৃশ্যমুখে রাজধানীতে উপস্থিত থাকতে হবে।’—রাজার এখন উভয়সঙ্কট—একদিকে শকুন্তলার আকর্ষণ, অন্যদিকে মাতৃঅজ্ঞা! অনেক চিন্তার পর তিনি সমস্তার সমাধান খুঁজে পেলেন—‘সখা বসন্তককে তো মা পুত্ররূপেই গ্রহণ করেছেন’। অতএব ‘সখা, তুমিই তবে মাতৃক্রিয়া সম্পাদনের জন্তে যাত্রা কর—আমাকে যাগযজ্ঞের বিদ্ব দূর করে আশ্রমের প্রতি কর্তব্য পালন করতে হবে।’ ইতিপূর্বে কথ-শিষ্যরা এসে রাক্ষসদের হাত থেকে যজ্ঞ-রক্ষার আবেদন জানিয়ে গিয়েছিল। রাজভ্রাতার উপযুক্ত সম্মানে সমস্ত সৈন্যদলসহ বিদূষক রওনা হ’লো রাজধানীর দিকে। পাছে শকুন্তলার কথা বিদূষক অন্তঃপুরে ব’লে বসে এই আশঙ্কায় রাজা যাওয়ার আগে তাকে সাবধান করে দিলেন—‘...পরিহাসবিজ্ঞিতং সখে পরমার্থেন ন গৃহ্যতাং বচঃ।’ ‘শকুন্তলার বিষয় সম্পূর্ণ পরিহাস করে বলেছিলাম; সত্যি ব’লে মনে কোরো না।’ বিদূষকও একথাই স্বীকার করে নিয়ে হৃষ্টমনে রওনা হ’লো। মুক্তির নিঃশ্বাস ফেলেন দৃশ্যমুখ—শকুন্তলা ব্যাপারে মনোনিবেশের এখন অবাধ অবকাশ।

দৃশ্যমুখের শক্তিপ্রভাবে তপস্যা-বিদ্বকারী অরণ্যচরেরা দূরীভূত—আশ্রমকার্য নির্বিঘ্ন হওয়ায় তাপসেরা সন্তুষ্ট; কিন্তু শকুন্তলাকে না পাওয়া পর্যন্ত দৃশ্যমুখের মনে শান্তি নেই। বাস্তবতার দর্শনলাভের আশায় তাঁর অন্তর আগ্রহে অধীর! কোথায় গেলে পাওয়া যাবে প্রিয়তমার সান্নিধ্য! নিদাঘ-দ্বিপ্রহরে মালিনী নদীর তীরে লতাকুঞ্জের শীতল পরিবেশে তাঁর অবস্থান সম্ভব—অতএব দৃশ্যমুখ ঐ দিকেই অগ্রসর হলেন। ভুল হয়নি তাঁর অনুমান—লতাকুঞ্জের পথে পায়ের

চিহ্ন—এগিয়ে চলেন রাজা । সার্থক তাঁর প্রয়াস—কুঞ্জের অভ্যন্তরে শোনা যাচ্ছে নারীকণ্ঠের আলাপ । উৎসুক রাজা কান পাতলেন—মদনবাণে আহতা নায়িকার অবস্থাও শোচনীয়—পদ্মের মৃণাল, চন্দনের অনুলেপন, তালপত্রের বীজন—কোনো কিছুই তাঁর বিরহতাপ দূর করতে পারছে না—সখীরা বিমূঢ়—কি করা যায় ? একমাত্র বাস্তবিত্বের সঙ্গে মিলনেই এই ক্লেশ দূর করা সম্ভব । অতএব সখী পরামর্শ দেয়—‘...চিন্তেহি দাব কিম্পি ললিত-পদ-বন্ধনং...’ । ‘নিজের অবস্থা বর্ণনা করে সুন্দর পদবন্ধ রচনা কর—আমরা সেটি আশ্রমের আশীর্বাদী নির্মাল্যের সঙ্গে রাজার কাছে পৌঁছে দেব ।’ কোমল পদ্পাতায় নখরচিহ্নে লিখলেন শকুন্তলা—‘হে নিষ্ঠুর, তোমার অন্তর আমার অজ্ঞাত, কিন্তু তোমাতে সমর্পিতপ্রাণ আমাকে কামদেব উত্তাপে অভিভূত করেছেন...’ রাজা আর অন্তরালে থাকতে পারেন না । এগিয়ে এসে বলেন—‘অয়ি সূতনুকে, কামদেব তোমাকে যদি শুধুমাত্র উত্তপ্ত করে থাকেন তো আমাকে সম্পূর্ণ দগ্ধ করে ফেলেছেন ।’ প্রার্থিত জন সামনে উপস্থিত ! সখীরা হুটু ; শকুন্তলাও উঠে বসে শিষ্টাচার প্রদর্শনের প্রয়াস করেন, কিন্তু তাঁর শরীরের অবস্থা দেখে তাঁকে নিষেধ করে পাশেই শিলাতলে রাজা উপবেশন করেন । সখীরা এবার শকুন্তলার মানসিক অবস্থা রাজাকে বিশদভাবে বুঝিয়ে বলেন—‘আপনার চিন্তাতেই সখীর এই দশা ।...রাজার সাধারণতঃ বহুপত্নীক, কিন্তু আমাদের সখী যেন আত্মীয়দের দুঃখের কারণ না হন—সেই ব্যবস্থা করুন...’ রাজা তাদের আশ্বস্ত করে বলেন—‘আমার বংশের প্রতিষ্ঠার কারণ ছুটি—এক সমুদ্রমেখলা বসুমতী, অপরা শকুন্তলা ।’ নিশ্চিন্ত মনে সখীরা রাজার কাছে সলজ্জা শকুন্তলাকে রেখে হরিণীর সন্ধানের ছলনায় বিদায় নিল । ব্রীড়াবনত শকুন্তলা অসহায়া, কিন্তু স্বয়ং পৃথিবীস্থর তো তাঁর কাছে উপস্থিত ! শকুন্তলা চলে যেতে চান—কিন্তু রাজা তাঁকে বাধা দিলেন—বলপ্রয়োগের আশঙ্কায় সন্ত্রস্তা শকুন্তলা বলে ওঠেন—পৌরব, অসংযম প্রকাশ করা উচিত নয়, কারণ

আমি অভিভাবকের অধীন। কিন্তু রাজা গান্ধর্ব বিবাহের প্রতিশ্রুতি দেওয়ায় তাঁর দৃঢ়তা দূর হয়—বাধাদানের দুর্বল প্রয়াস সত্ত্বেও ধীরে ধীরে রাজা তাঁর আনন উন্মিত করেন—শকুন্তলার অধরমধুপানে উচ্চত হতেই নেপথ্য থেকে ভেসে এলো সখীদের কণ্ঠ—‘হে ছুঃখিনি চক্রবাকি, চক্রবাকে এখন বিদায় জানাও, রাত্রি সমাগত।’ শকুন্তলা বুঝতে পারেন সখীদের সাবধানবাণী। ত্রস্তে দুঃখান্তকে জানানেন—‘আর্য্য! গৌতমী আমার শারীরিক অবস্থা জানার জন্তে এইদিকেই আসছেন—অতএব আপনি লতাকুঞ্জের আড়ালে আত্মগোপন করুন।’ নিরুপায় রাজাকে সেইভাবেই লুকিয়ে পড়তে হ’লো। তাপসী গৌতমী অননুয়া-প্রিয়ংবদা সহ প্রবেশ করে কুশল প্রশ্ন করেন—পবিত্র শাস্তিভল ছিটিয়ে দেন শকুন্তলার অঙ্গে। সন্ধ্যা আসন্ন, অতএব তাঁর আদেশে সকলকেই কুটিরের দিকে রওনা হতে হয়। শকুন্তলা যেন লতাকুঞ্জের উদ্দেশ্যেই তাঁর বিদায়বাণী জ্ঞাপন করেন—‘হে শাস্তিপ্রদ লতাকুঞ্জ, আবার তোমার সঙ্গসুখ লাভ করার আশায় রইলাম।’

অন্তরাল থেকে বেরিয়ে এসে দীর্ঘশ্বাস ত্যাগ করেন দুঃখান্ত—‘শ্রেয়াংসি বহুবিস্মানি’—অভীষ্টপ্রাপ্তির বাধা অনেক। লতাগৃহের চারিদিকে প্রিয়ার স্মৃতি—দলিত পুষ্পশয্যা, ছিন্নমৃগালবলয়—পদ্ম-পত্রের লিখন—তাঁর অন্তরকে আলোড়িত করে তোলে। কিন্তু আবার আসে কর্তব্যের আহ্বান—নেপথ্য-বাণী থেকে জানা গেল—‘সান্ধ্য হোমবিধি শুরু হওয়া মাত্রই উৎপীড়ক রাক্ষসদের গতায়াত লক্ষ্য করা যাচ্ছে।’ অতএব যজ্ঞবাধা দূর করার প্রয়োজনে রাজাকে তৎপর হতে হ’লো।

বেশ কিছুদিন কেটে গেছে—রাজা ফিরে গেছেন রাজধানী। কিন্তু এত দীর্ঘ সময় পরেও শকুন্তলার খোঁজ নিতে রাজধানী থেকে কোনো দূত আসেনি। স্বামীর চিন্তায় তিনি সর্বদাই অগ্নমনা। এমন সময় ঘটে এক অঘটন—পূজার পুষ্পচয়নে ব্যস্ত সখীরা দূর থেকে শুনতে পেল ক্রুদ্ধ অভিশাপবাণী—‘রে অতিথির অবমাননাকারিণি! যার চিন্তায়

আমার মত তপোনিধির উপস্থিতিও অগ্রাহ্য করলি, উন্মত্ত ব্যক্তির পূর্বকথা মনে করিয়ে দিলেও সে তোকে চিনতে পারবে না।’—আকাশ ভেঙে পড়ল সখীদের মাথায়—তুর্ভাগিনী শকুন্তলার একি বিপত্তি! প্রিয়বদা দৌড়ে এসে কোপনস্বভাব ঋষি তুর্ভাসার পায়ে পড়ে। অনেক অনুনয়ের পর ঋষি শুধু এইটুকু আশ্বাস দিলেন, ‘যে-কোনো নিদর্শনদেখাতে পারলে তবে শাপের প্রভাব দূর হবে।’ কিছুটা আশ্বস্ত হ’লো সখীরা, কারণ রাজার নামাক্তিত অঙ্গুরীয়ক তো আছে শকুন্তলার কাছে—রাজধানীর উদ্দেশ্যে বিদায়গ্রহণের সময় দুঃখান্ত এইটি শকুন্তলাকে পরিয়ে ব’লে গিয়েছিলেন—‘এখানে উৎকীর্ণ আমার নামের অক্ষর গণনা করতে থাক, যেদিন গণনা শেষ হবে সেদিন রাজধানী থেকে তোমার জন্মে লোক এসে পৌঁছবে।’ এই অঙ্গুরীয়কটি ভবিষ্যতে স্মারকচিহ্ন হবে—এই ভেবে নিশ্চিন্ত সখীরা স্থির করলেন—অভিশাপের কথা জানিয়ে ছুঃখিনী শকুন্তলার ছুঃখ আর বাড়িয়ে দিয়ে লাভ নেই। অতএব শকুন্তলার অজ্ঞাতেই ঘটে গেল অভিশাপ-সংক্রান্ত ব্যাপারটি।

তীর্থ থেকে ফিরে এসে অগ্নিগৃহে দৈববাণীর মাধ্যমে ঋষি কথ জানতে পারলেন—শকুন্তলা দুঃখান্তের পরিণীতা ও অন্তঃসত্ত্বা। অতএব তাপসী গৌতমী ও শাক্তরব-শারদ্বত দুই শিষ্য সহ তিনি কন্যাকে পতিগৃহে প্রেরণের আয়োজন করলেন। সখীরা সাজিয়ে দেয় শকুন্তলাকে—অরণ্যদেবতাদের প্রদত্ত ক্ষৌমবস্ত্রে—আভরণে। বিদায়ের পূর্বে আশ্রমবাসীরা আশীর্বাদ করেন শকুন্তলাকে। এবার পিতা কথকে প্রণাম জানান শকুন্তলা—আশীর্বাদ করেন ঋষি—‘যযাতির পত্নী শর্মিষ্ঠার মত স্বামীর আদরণীয় হও, পুরুষ মত চক্রবর্তী পুত্রলাভ কর।’—সমস্ত আশ্রম-তরুর কাছে তিনি অনুমতি প্রার্থনা করেন—‘তোমাদের জল না দিয়ে যে জলগ্রহণ করত না, ভূষণপ্রিয়তা সত্ত্বেও যে তোমাদের পত্রপল্লব ছিন্ন করতে অনিচ্ছুক, তোমরা কুসুমিত হ’লেই যা’র আনন্দ, সেই শকুন্তলার পতিগৃহে যাত্রা অনুমোদন কর।’

ভেসে এলো কোকিলের কুহুধ্বনি—এ যেন তরুদেরই স্বীকৃতি ।
 —এগিয়ে আসে বিদায়ের লগ্ন—সখীরা তো কেঁদেই আকুল । সমস্ত
 তপোবন-প্রকৃতিও যেন ছুঁখে মুহূমান । হরিণের মুখ থেকে খসে পড়ছে
 দর্ভতৃণের গ্রাস—ময়ূর ভুলেছে তার নৃত্য—লতার। যেন শুষ্ক পত্র
 বিমোচনের ছলে অশ্রুবিসর্জন করছে । যে লতাটিকে পরম স্নেহে
 লালন করে ‘বনজ্যোৎস্না’ নাম দিয়ে সহকারের সঙ্গে বিবাহ
 দিয়েছিলেন—সেই লতা-ভগিনীর কাছ থেকে বিদায়গ্রহণ করেন
 শকুন্তলা । কিন্তু পেছন থেকে কে তাঁর আঁচল ধরে আকর্ষণ করে !
 থমকে দাঁড়ান তিনি—আর কেউ নয়, এ সেই মাতৃহীন হরিণশিশু,
 যাকে সন্তানস্নেহে পালন করেছিলেন ! সকলের দৃষ্টিই বাষ্পরুদ্ধ !
 কিন্তু আশ্রমিকদের আর বেশীদূর অগ্রসর হওয়া চলে না ; কথ বিদায়ের
 আগে রাজার উদ্দেশ্যে শিষ্যদের তাঁর বক্তব্য জানিয়ে দিলেন—‘মুনি-
 দের সংঘম, নিজের উচ্চবংশ, শকুন্তলার প্রতি আপনার স্বত-উৎসারিত
 ভালবাসা—এসব কথা মনে রেখে শকুন্তলাকে অন্তঃপুরে পত্নীত্বের
 স্বাভাবিক মর্যাদা দান করা আপনার কর্তব্য । এর চেয়ে বেশী কিছু
 বধূর আত্মীয়দের বলা অশোভন—কারণ তা ভাগ্যায়ত্ত ।’ শকুন্তলাকেও
 উপদেশ দিলেন স্বামিগৃহের কর্তব্য সম্বন্ধে—‘গুরুজনদের সেবা
 করবে—সপত্নীদের সঙ্গে সখীমূলভ আচরণ করবে—স্বামী ক্রুদ্ধ হলেও
 তাঁর বিরোধিতা করবে না—এইভাবে যুবতীরা গৃহিণীত্ব লাভ করে—
 বিরুদ্ধচারিণীরা কুলের কটক ।’...কিন্তু আর তো দেরি করা চলে না
 —জলাশয়ের কাছে এসে পড়েছেন—এই পর্যন্তই আসা চলে—
 —শিষ্যেরা একথা স্মরণ করিয়ে দেওয়ায় সম্বিৎ ফিরে পেলেন কণ্ঠা-
 বিচ্ছেদ ছুঁখে স্রিয়মাণ ঋষি—শকুন্তলাকে বিদায় আলিঙ্গন জানিয়ে
 এবার অনশ্রুয়া-প্রিয়ংবদাকে নিয়ে ফিরে আসতে হবে আশ্রমে—
 এদেরও পাত্রস্থ করার দায়িত্ব আছে । আশ্রমবিয়োগবিধুরা শকুন্তলা
 সাগ্রহে জিজ্ঞাসা করেন—আবার কবে পিতার কাছে আশ্রমে ফিরে
 আসার সুযোগ ঘটবে ? কথ জানালেন—রাজ্যের কর্তব্য সম্পাদনের পর

পুত্রকে সিংহাসনে বসিয়ে আবার স্বামিসহ তপোবনে প্রত্যাগমন সম্ভব হবে। সজল নয়নে শকুন্তলাকে বিদায় নিতে হয় এতদিনের পরিচিত পরিবেশ ছেড়ে এক অজানার উদ্দেশ্যে—সতৃষ্ণ নয়নে বার বার ফিরে তাকান! দৃষ্টি বাষ্পাচ্ছন্ন হওয়ায় বন্ধুর ভূমিতে আঘাত পেতে পারেন—সাবধান করে দেন মঙ্গলাকাজক্ষী পিতা। ধীরে ধীরে গাছের আড়ালে অন্তর্হিত হয়ে যায় শকুন্তলা ও তার অনুগামীরা—সখীরা নির্নিমেষে চেয়ে থাকে তাঁর পথপানে—যতক্ষণ দেখা যায়! তারপর বাধ্য হয়েই ফিরতে হয় আশ্রমের দিকে। ছুহিতার বিচ্ছেদ-বেদনা সত্ত্বেও ঋষি কণ্ঠের মনে বেজে ওঠে শান্তির সুর—কারণ ‘অর্থো হি কন্যা পরকীয় এব’—অতএব কন্যাকে স্বামিগৃহে প্রেরণ করে যেন গচ্ছিত বস্তু যথার্থ অধিকারীকে ফিরিয়ে দেওয়ার মতই মুক্তির নিশ্চিততা তাঁকে শাস্তি দেয়।

রাজকার্য সম্পাদনের পর দ্রুত বিজ্ঞানবিশ্রামের উদ্দেশ্যে অন্তঃপুরে আসছেন—সঙ্গে বিদূষক। দূর থেকে শোনা যাচ্ছে রানী হংসপদিকার গান—‘হে নবমধুলোভী মধুকর, নতুন আত্মমঞ্জরীর আশ্বাদ গ্রহণ করে পূর্বের আদৃত পদ্যের প্রতি ভালবাসা বিস্মৃত হলে?’ রাজা বুঝতে পারেন—রানী বসুমতীর প্রতি বর্তমান আকর্ষণ লক্ষ্য করে পূর্বের প্রিয়তমা হংসপদিকা তাঁর মধুকরবৃত্তিকে ইঙ্গিত করছেন; তাই বিদূষককে দিয়ে বলে পাঠালেন—‘খুবই নিপুণভাবে আমাকে তিরস্কৃত করা হয়েছে।’ এই সঙ্গীতের বিষাদময়তায় রাজা অভিভূত হয়ে পড়েন—কি কথা যেন তাঁর মনে পড়েও পড়েনা—সুন্দর কোনো দৃশ্য বা মধুর সঙ্গীত যেন কোন জন্মান্তরের সুখস্মৃতি বহন করে আনে! রাজার আর বিজ্ঞান করা হ’লো না কারণ, কণ্ঠস্বর সংবাদ নিয়ে আসে—‘দ্বারে উপস্থিত কণ্ঠশিষ্য।’ যথাযোগ্য মর্যাদার সঙ্গে তাঁদের আনয়নের আদেশ দেন দ্রুত। ঋষিকুমাররা প্রবেশ করলে সসম্মানে তিনি উঠে দাঁড়ান—জিজ্ঞাসা করেন আশ্রমের কুশলবার্তা—কিন্তু অন্তরে তাঁর বিস্ময়—বৃদ্ধা তাপসী ব্যতীত আরেকজন অবগুণ্ঠনবতী

কে ঐ নারী এই তাপসদলে, যার আকৃতি দেখে মনে হচ্ছে সুন্দরী এবং যুবতী ! আনুষ্ঠানিক কুশল-সমাচারের পর ঋষিকুমারেরা প্রকৃত বক্তব্য উপস্থাপিত করেন—‘যোগ্যপাত্র ছ্যাস্ত ও মূর্তিমতী সংক্রিয়া শকুন্তলা—এই তুল্যাগুণসম্পন্ন বধুবরের মিলনকে ঋষি কথ সমর্থন করেছেন, যদিও অভিভাবকের অনুমতির অপেক্ষা না রেখে শুধুমাত্র পরস্পরের শপথ-বিনিময়েই এই বিবাহ সম্পন্ন হয়েছে । এবার অন্তঃসত্ত্বা পত্নীকে অন্তঃপুরে গ্রহণ করাই বাঞ্ছনীয় ।’ শকুন্তলার হৃদয় উৎকণ্ঠায় ত্রুতত্রুত—না জানি এবার আর্যপুত্র কি উত্তর দেন । অভিশাপের প্রভাবে লুপ্তস্মৃতি রাজা বিস্মিতভাবে বলেন—‘এ আবার কী ব্যাপার !’ শকুন্তলা স্তম্ভিত, বিনামেঘে বজ্রাঘাত ! শার্ঙ্গ’রব ভাবেন, বুঝি ভালবাসার অভাবই এই বিকৃপতার কারণ—তাই তিনি বলেন—‘পত্নী প্রিয় বা অপ্রিয় হোক, স্বামিগৃহই তার যথার্থ স্থান, বিবাহিতা কন্যার দীর্ঘ পিতৃগৃহবাস নিন্দনীয় ।’ ছ্যাস্ত আরও বিমূঢ়ভাবে বলেন—‘আমি কী একে বিবাহ করেছি ?’ বিবাহের ব্যাপারটির সম্পূর্ণ অস্বীকৃতি শকুন্তলাকে হতাশার অন্ধকারে নিষ্কিপ্ত করে । শার্ঙ্গ’রব আর বেশীক্ষণ শান্ত থাকতে পারেন না—তিনি বলে ফেলেন—‘ধনগবীর্ষদের পক্ষে এই রকম ব্যবহার কিছুই বিচিত্র নয় ।’ ব্যাপারটি সম্পূর্ণ বিপরীত গতি লাভ করেছে দেখে গৌতমী ভাবেন, শকুন্তলাব মুখ দেখলে হয়তো বা রাজার পূর্বপরিচয় মনে পড়বে—তিনি এগিয়ে এসে শকুন্তলার অবগুষ্ঠন মোচন করে দিলেন—সেই অনিন্দ্য কান্তি রাজাকে মুগ্ধ করে, কিন্তু বিবাহের কথা কিছুতেই তাঁর স্মৃতিপথে উদ্ভিত হলো না ! এক্ষেত্রে কী করে তিনি গর্ভবতী পরস্ত্রীর সংস্পর্শে নিজেকে কলুষিত করবেন ? বাধ্য হয়েই একথা তপস্বীদের জানালেন—ক্ষোভে দুঃখে ভেঙে পড়েন শকুন্তলা—শার্ঙ্গ’রব ত্রুত হয়ে ওঠেন । শারদ্বত তাঁকে থামিয়ে শকুন্তলাকে বলেন—‘রাজার বিশ্বাস সৃষ্টি হয় এমন কোনো প্রমাণ তুমি দাও ।’

শকুন্তলার মনে পড়ে যায় অভিজ্ঞান—অঙ্গুরীয়কের কথা—সখীরা

তো বলেও দিয়েছিল—রাজা যদি চিনতে না পারেন তাহলে ওটি দেখাতে হবে। তাড়াতাড়ি আংটি খুলতে গিয়ে দেখেন—কোথায় আংটি। শূন্য আঙুল! আর তো কোনো উপায় নেই। রিক্ত দৃষ্টিতে গৌতমীর দিকে চেয়ে থাকেন। গৌতমী বুঝতে পারেন—পথে শট্টা-তীর্থে স্নানের পর অঞ্জলি দেওয়ার সময় নিশ্চয় হাত থেকে খুলে জলে পড়ে গেছে আংটি। তাঁর একথা শুনে রাজা স্ত্রীজাতির প্রত্যাশা-মতিত্বকে উপহাস করেন। নিরুপায় শকুন্তলা তার নারীত্বের অবমাননা থেকে আত্মরক্ষার জন্তে তপোবনে অন্তরঙ্গতায় মধুর ছ'একটি নিভৃত স্মৃতির চিত্র ধীরে ধীরে লোকসমক্ষে উন্মোচিত করে চলেন—একদিন বেতসকুঞ্জে পদ্মপাতায় জল নিয়ে মৃগশিশুকে আপনি পান করাবার চেষ্টা করছিলেন, কিন্তু অপরিচিত বলে সে আপনার কাছে গেল না, পরে আমার কাছ থেকে ঐ জল পান করায় পরিহাস করে আপনি বললেন—‘তোমরা ছ’জনেই আরণ্যক প্রাণী, তাই পরম্পরের প্রতি সহজ বিশ্বাস।’

কিন্তু শকুন্তলার এই সরল বর্ণনা রাজার কাছে কার্যসিদ্ধির জন্তে স্ত্রীমূলভ মিথ্যাভাষণরূপে অবজ্ঞাত হওয়ায় গৌতমীও অসন্তুষ্ট হয়ে বলেন—‘তপোবন-লালিতা শকুন্তলা কপটতা জানে না।’ রাজা উপহাস করেন—‘স্বার্থসিদ্ধির ব্যাপারে ইতর প্রাণীর স্ত্রীজাতিতেও অশিক্ষিতপটুই দেখা যায়—স্ত্রীকোকিল অনায়াসে অগ্নি পাখীকে দিয়ে নিজের শাবক পালন করিয়ে নেয়!’ আর সংযত থাকতে পারেন না শকুন্তলা—তেজোদৃপ্ত কণ্ঠে বলে ওঠেন—‘অনার্য, তুমি সকলকেই নিজের মত কপটাচারী মনে কর—তৃণাচ্ছন্ন কূপের মতই ধর্মের ভেকধারী তোমার সংসর্গ বিপজ্জনক!’ পরমুহূর্তেই তিনি ক্ষোভে ছুঁতে ভেঙে পড়েন—‘পুরু-বংশের প্রতি বিশ্বাসে এই মুখে মধু অন্তরে বিষযুক্ত ব্যক্তির উপর আস্থা অর্পণ করে স্বেচ্ছাচারিণী প্রতিপন্ন হ’লাম!’ শার্ঙ্গরব ও রাজার মধ্যে উত্তেজিত বাক-বিনিময় চলতে থাকে দেখে শারদ্বত মীমাংসার জন্তে এগিয়ে আসেন—‘গুরুর আদেশ

অনুসারে পত্নীকে আপনার কাছে পৌঁছে দিয়ে গেলাম—এখন গ্রহণ করা বা ত্যাগ করা সবই আপনার ইচ্ছাধীন!’ তাঁরা চলে যেতে উদ্যত হতেই—‘এই প্রতারণা আমাকে বঞ্চনা করল, আর তোমরাও আমাকে পরিত্যাগ করে চলে যাচ্ছ?’—একথা বলে নিঃসহায় শকুন্তলা এঁদের অনুসরণ করতে গেলেন—কিন্তু গতিরুদ্ধ হ’লো শার্ঙ্গ’রবের তীব্র ভৎসনায়। শারদ্বতও শকুন্তলাকে বলেন—‘রাজা যা বলছেন তা যদি সত্য হয়, তাহলে কলঙ্কিনী কন্যাকে নিয়ে কথ কিই বা করবেন, আর প্রকৃতই যদি শকুন্তলা সাক্ষী হন তাহলে পতিগৃহে দাসীবৃত্তিও কাম্য হওয়া উচিত।’ দুঃস্থেরই বা এক্ষেত্রে কী করণীয়—একদিকে পরদ্বী গ্রহণের পাপ, অপরদিকে যদি সত্যিই বিভ্রম হয় তাহলে ধর্মপত্নী ত্যাগের অপরাধ! সমস্যার সমাধান দিলেন রাজপুরোহিত। তিনি বললেন—‘যে পর্যন্ত না পুত্র জন্মায় সে পর্যন্ত শকুন্তলা আমার গৃহেই বসবাস করুন; গণকেরা ভবিষ্যদ্বাণী করেছেন দুঃস্থ রাজচক্রবর্তীর লক্ষণযুক্ত পুত্র লাভ করবেন। ঋষির দোহিত্র যদি এই লক্ষণযুক্ত হয় তাহলে রাজা শকুন্তলার পত্নীত্ব সম্বন্ধে নিঃসন্দেহ হয়ে দু’জনকেই সাদরে অন্তঃপুরে গ্রহণ করতে পারবেন।’ রাজাও এই সিদ্ধান্তে সন্মতি জানালেন। তপস্বিদল বিদায় নেওয়ার পর পুরোহিতও ক্রন্দনরতা শকুন্তলাসহ প্রস্থান করলেন—কিন্তু অল্লক্ষণ পরেই এক আশ্চর্য ব্যাপার ঘটে গেল, পুরোহিত এসে জানালেন—‘ভাগ্যের প্রতি দোষারোপকারিণী, ক্রন্দনপরায়ণা সেই বালাকে এক জ্যোতির্ময়ী স্ত্রীআকৃতি শূণ্ডে তুলে নিয়ে অম্বরাতীরের দিকে চলে গেল!’ অন্তরে বিচলিত হলেও রাজা উদ্বেগহীনতার ভাণ করে বলেন—‘যাক্, যে ব্যাপার আমরা পূর্বেই পরিত্যাগ করেছি সে ব্যাপারে আর চিন্তা করা নিম্প্রয়োজন। আপনারা সকলে বিশ্রাম করুন।’ ক্লান্ত রাজা নিজেও শয়নকক্ষের দিকে অগ্রসর হলেন।

কিছুকাল কেটে গেছে। একদিন এক ধীবরকে ধরে নিয়ে আসে গ্রহরীরা, তার অপরাধ, তার কাছে রাজার নাম লেখা আংটি পাওয়া

গেছে। তারা তো তাকে চোর ভেবে শূলে চড়াতে চায়, কিন্তু রাজ-শ্যালক নগরপাল গেলেন রাজার কাছে—তাকে আংটিটি দেখিয়ে তাঁর আদেশ আনার জন্তে। ইতিমধ্যে রক্ষীরা ধীবরকে যতদূর সম্ভব লাক্ষিত করতে থাকে—আত্মপক্ষসমর্থনে তার কোনো বক্তব্যতেই তারা কান দেয় না। সে যতই বলে—‘আমি ‘কুস্তীরক’, শত্রুবতারবাসী একজন ধীবর, শচীতীর্থের জলে মাছ ধরতে গিয়ে মাছের পেটে এই আংটি পেয়েছি—কিছু অর্থপ্রাপ্তির উদ্দেশ্যে নগরে বেচতে যেতেই আপনারা আমায় ধরে ফেললেন’—ততই রক্ষীদের লাঞ্ছনা-বিদ্ৰূপের কশাঘাত তীব্রতর হয়ে ওঠে। নিরপরাধ ধীবরকে শূলে চড়ানোর জন্তে তারা যখন ব্যগ্র—তখন দূরে দেখা গেল শ্যালকমশাই রাজাদেশ নিয়ে আসছেন; উৎফুল্ল হয়ে ওঠে রক্ষীরা। কিন্তু হায়, কাছে এসে নগরপাল তাদের এত আশায় ছাই দিলেন—রাজা আংটি পেয়ে ধীবরকে শাস্তি তো দিলেনই না, বরং কিছু পুরস্কার পাঠিয়ে দিয়েছেন। ঐটি দেখে তাঁর যেন কোন পূর্বস্মৃতি মনে পড়ে গেল! রক্ষীরা ধীবরের সৌভাগ্যে ঈর্ষিত। ধীবর কিন্তু উদার হয়ে তার পুরস্কারের কিছু অংশ ভাগ করে দিল এদের মধ্যে—তারপর সকলে রওনা হ’লো পানশালার উদ্দেশ্যে।

অঙ্গুরীয়ক দর্শনের পর দুর্বাসার অভিশাপজনিত মোহ দূর হওয়ায় দৃশ্যস্তর এখন শকুন্তলার বিবাহসংক্রান্ত সব কথাই স্মৃতিপটে উদ্ভিত হয়েছে। কিন্তু তাঁকে ফিরে পাওয়ার কোনো উপায়ই তো তাঁর জানা নেই। বিচ্ছেদ-বেদনায় তিনি মুহূমান—রাজকাৰ্য সম্পাদন তাঁর কাছে অসম্ভব হয়ে উঠেছে—দেহ ক্ষীণ—খুলে পড়ছে শীর্ণ হাতের বলয়—রাত্রিজাগরণের ক্লান্তি ও দুঃখের ছাপ তাঁর সর্বাস্থে। রাজ্যে সমস্ত আমোদ-প্রমোদ নিষিদ্ধ। অবসর যাপনের জন্তে বিদূষকসহ দৃশ্যস্ত প্রমোদ-উদ্যানে আসেন—কিন্তু উদ্যান-প্রকৃতিও যেন তাঁর শোকের অংশভাক্—তাই বসন্তের আগমন সত্ত্বেও কুরুবক কুঁড়ি অবস্থাতেই থেঁকে গেছে—কোকিলের স্বরও শোনা যাচ্ছে না—

সমগ্র পরিবেশ এক বিষাদময়তায় সমাচ্ছন্ন। শকুন্তলা-জননী মেনকার অনুরোধে অম্বরী সান্নমতী তীর্থ থেকে প্রত্যাবর্তনের পথে ছ্যাস্তুর রাজধানীতে আসেন—রাজার অবস্থা স্বচক্ষে দেখে সখী শকুন্তলার কাছে সংবাদ নিয়ে যাওয়াই তাঁর উদ্দেশ্য। অদৃশ্য হয়ে তিনি শকুন্তলার জন্তে রাজার বিলাপ শুনতে থাকেন। সখীসহ শকুন্তলার জলসেচনরতা অবস্থার যে চিত্র ছ্যাস্তুর অঙ্কন করছিলেন সেটি সম্পূর্ণ করার জন্তে সেখানে আনিয়া নিলেন—ছবিতে শকুন্তলার মুখের দিকে ধাবমান সেই মধুপটিকেও অঙ্কিত করা হয়েছে—দেখতে দেখতে চিত্রাঙ্গিতা শকুন্তলাকে তাঁর প্রাণময়ী বলে ভ্রম হয়—ভ্রমরটিকে শাস্তি দিতে অগ্রসর হলেন। বিদূষক তাঁকে সচেতন করে দিলে সখীৎ ফিরে পেয়ে খেদোক্তি করেন—‘প্রকৃত শকুন্তলা যখন কাছে এসেছিল তখন মোহবশত তাকে অবহেলা করে এখন চিত্রের প্রতি সম্মান দেখাচ্ছি—এ যেন পথে সুশীতল নদীজলকে উপেক্ষা করে এসে মরীচিকার পিছনে ছোটা।’ বলা বাতিল্য, শকুন্তলার প্রতি রাজার আন্তরিক অনুরাগের প্রকাশ, এবং তাঁর বিচ্ছেদে কাতর বিলাপ—এ সব-কিছুই সান্নমতীকে সন্তুষ্ট করে, কারণ এই সংবাদ শকুন্তলার কাছে পৌঁছে দিয়ে তিনি সখীকে সুখী করতে পারবেন।

অমাত্য পিশুন একটি বিচার্য বিষয় পত্রে লিখে রাজার কাছে প্রেরণ করেন—নিঃসন্তান বণিক্ ধনমিত্র সমুদ্রে নৌকাসহ নিমজ্জিত হওয়ায় তার বিষয়-সম্পত্তি রাজকোষে বাজেয়াপ্ত করা ছাড়া উপায় কী? কিন্তু রাজা আদেশ দিলেন খোঁজ নেওয়া হোক তার কোনো অন্তঃসত্ত্বা পত্নী আছে কিনা। প্রতিহারী জানায় ধনমিত্রের যে স্ত্রী অযোধ্যার বণিক্-কন্যা সে সন্তানসম্ভবা। রাজার আদেশে সেই গর্ভস্থ সন্তানকেই উত্তরাধিকাররূপে স্থির করা হয়—তিনি আরও ঘোষণা করলেন যে ‘নিরপরাধ কোনো প্রজার সন্তানবিয়োগ হলে রাজা ছ্যাস্তুরই তার বন্ধুর স্থান গ্রহণ করবেন’। প্রতিহারীর বিদায়ের

পর নিজের সম্মানহীনতার কথা চিন্তা করে দুঃখান্বিত হুঃখে অভিভূত হয়ে পড়েন—পূর্বপুরুষেরা তাঁর অবর্তমানে প্রাপ্য জলগণ্ডুষ থেকে বঞ্চিত হবেন—এই চিন্তা তাঁকে ক্রিষ্ট করে তোলে। একথাও তাঁর মনে পড়ে—ধর্মপত্নী শকুন্তলার গর্ভে তাঁর সম্মান-জন্মের সম্ভাবনা দেখা দেওয়া সত্ত্বেও সেই ফলদায়িনী বসুন্ধরাস্বরূপা পত্নীকে বিস্মৃতি হেতু ত্যাগ করেছেন—অনুশোচনায় দম্ব হতে থাকেন তিনি। রাজার অবস্থা স্বয়ং পর্যবেক্ষণ করে সান্ন্যমতী রওনা হলেন সখীকে জানানোর জন্মে। রাজা ইতিপূর্বে রাজ্ঞী বসুমতীর আগমন সম্ভাবনায় শকুন্তলার চিত্রটি বিদূষকের হাতে দিয়ে তাকে মেঘপ্রতিচ্ছন্দ প্রাসাদে প্রেরণ করেছিলেন। হঠাৎ সেখান থেকে শোনা গেল তার কাতর আর্তনাদ! কোন এক দুর্বৃত্ত তাকে শূণ্যে তুলে যজ্ঞের বলির মতই হত্যা করতে উদ্বৃত! অন্তরীক্ষ থেকে ভেসে-আসা বয়স্কের কাতর আহ্বান রাজাকে বিচলিত করে তোলে—জড়তা দূরে ফেলে ধনুর্বাণসহ অদৃশ্য আততায়ীকে দণ্ডদানের উদ্দেশ্যে এগিয়ে আসছেন—এমন সময় সামনে আবিভূত হলেন ইন্দ্র-সারথি মাতলি। কালনেমি-পুত্র তুর্জয় নামে দানবকে বিনাশের জন্মে দেবরাজ ইন্দ্র পরাক্রমশালী রাজা দুঃখান্বিতকে আমন্ত্রণ জানিয়েছেন—দেবরাজের এই আদেশ দুঃখান্বিত আনন্দের সঙ্গে গ্রহণ করলেন। কিন্তু বিদূষক মাধব্যকে কেন এই ভীতি প্রদর্শন? মাতলি বলেন, হুঃখে ত্রিয়মাণ রাজাকে উত্তেজিত ও উদ্দীপ্ত করার জন্মেই এই ছলনা। তৎক্ষণাৎ দম্ব্যদলনের জন্মে মাতলির সঙ্গে রাজা যাত্রা করলেন।

দৈত্য নিধনের পর ইন্দ্রের সভায় প্রচুর সম্মান লাভ করলেন দুঃখান্বিত। কর্তব্য সম্পাদনের পর তিনি মাতলির রথে আকাশপথ দিয়ে নিজ রাজ্য অভিমুখে প্রত্যাবর্তন করছেন। ক্রমশ পৃথিবী নিকটস্থ হয়ে আসতে থাকে—পর্বতশৃঙ্গগুলি মাথা তুলে দাঁড়ায়—সূত্রের মত নদীগুলিতে এখন জলপ্রবাহ লক্ষ্য করা যায়—বন্ধুর ভূমিভাগ ক্রমশ প্রত্যক্ষ হতে থাকে। 'হেমকূট পর্বত শিখরে রথ থেকে অবতরণ করে

রাজা ইন্দ্রের জনক-জননী মারীচ ও অদিতির চরণবন্দনা করার ইচ্ছা প্রকাশ করেন। মারীচাশ্রমের শাস্তিময় পরিবেশ রাজাকে মুগ্ধ করে। বল্লীকাবৃতদেহ তপস্বীরা উগ্র তপস্যায় রত—মন্দারতরুরাজি শোভিত—কল্পবৃক্ষের অরণ্যসমন্বিত স্বর্ণপথে ভূষিত জলাশয়যুক্ত এই আশ্রমভূমি যেন স্বর্গের চেয়েও সুখদায়ক স্থান! মাতলি গেলেন মহর্ষি মারীচকে দৃশ্যস্তের আগমন-সংবাদ জানাতে। প্রতীক্ষারত রাজা শুনতে পেলেন এক শিশুর কণ্ঠস্বর—‘সিংহ, হাঁ কর, তোর দাঁত গুন্ব’—এই কথা বলতে বলতে সিংহশাবককে জোর করে ধরে নিয়ে এক বালক প্রবেশ করে—সঙ্ঘের তাপসী ছ’জন তপোবনের পশুর প্রতি অত্যাচার থেকে তাকে বিরত করার চেষ্টা করে; কিন্তু বৃথা চেষ্টা। বালকটির আকৃতি দেখে রাজা বিস্মিত। বাৎসল্যরসে অভিযুক্ত হয়ে ওঠে তাঁর অন্তর। নিবৃত্ত করার জগ্নে তাপসী অগ্ন এক খেলনার কথা বলতেই বালক বলে ওঠে—‘কই, দাও।’ একি! রাজা চমকে ওঠেন, শিশুটির প্রসারিত করতলে রাজচক্রবর্তীর চিহ্ন। খেলনা আনার জগ্নে এক তাপসী চলে যাওয়ায় অপরাধ কাছে বালকটির পরিচয় জিজ্ঞাসা করে রাজা জানতে পারেন—এ প্রকৃতপক্ষে—ক্ষত্রিয়-সন্তান, নাম সর্বদমন।

—কোন বংশে জাত?

—পুরু বংশে।

—পিতার নাম? ঘৃণার সঙ্গে তাপসী বলে ‘কে সেই পত্নীত্যাগী অধার্মিকের নাম মুখে আনবে?’ এইসময় মাটির ময়ূর নিয়ে আরেক তাপসী এসে বলে—‘পশু শকুন্তলাবণ্যম্’—‘শকুন্ত’ অর্থাৎ পাখিটির শোভা দেখ। কিন্তু বালকটি বলে—‘কোথায় আমার মা?’ অতএব এ’র মায়ের নাম শকুন্তলা, সেকথাও বোঝা গেল। রাজার মনে বিশ্বাস দৃঢ় হয়। হঠাৎ এক বিস্ময়কর ঘটনা ঘটে—বালকের হাত থেকে কখন খুলে পড়ে গেছে রক্ষাকবচ। তাপসীরা ব্যস্ত হয়ে উঠতেই রাজা সেটি সংগ্রহ করে তাদের হাতে দিয়ে বলেন—‘সিংহ-

শাবকের সঙ্গে খেলার সময় পড়ে গিয়েছিল। তাপসীরা হতবাক্—তারা বলে—‘এই কবচ ভগবান মারীচ কর্তৃক মন্ত্রপুত—পিতামাতা ব্যতীত আর কেও স্পর্শ করলে সর্প হয়ে তাকে দংশন করে।’ তারা এই রকম বহু ঘটনার সাক্ষী। এবার রাজা নিঃসন্দেহ হলেন। একজন তাপসী ইতিমধ্যে শকুন্তলাকে এই অদ্ভুত ঘটনার কথা বলে। এক-বেণীধরা তপঃশীর্ণা শকুন্তলা ব্যস্ত হয়ে এগিয়ে আসেন—দূর থেকেই চিনতে পারেন স্বামীকে। কাতর অনুনয়ে পূর্বের ভ্রমের জন্তে ক্ষমা চেয়ে শকুন্তলার পায়ে পড়েন দুঃস্থ—বলা বাহুল্য, পতিব্রতা পত্নীর আর আক্ষেপের কোনো কারণ থাকে না। পুত্রসহ দম্পতী এখন মারীচ ও অদিতিকে প্রণাম জানানোর জন্তে অগ্রসর হ’ন। ঋষিদম্পতী আন্তরিক আশীর্বাদের সঙ্গে তাঁদের গ্রহণ করেন। পুত্র ইন্দ্রের সহায়তা করায় তাঁরা দুঃস্থের প্রতি সন্তুষ্ট। মেনকা-কন্যা শকুন্তলাসহ এই আশ্রমে থেকেই তাঁদের পরিচর্যা করছিলেন—পুত্রের জাতকর্ম, নামকরণ ইত্যাদি ক্রিয়া মারীচ কর্তৃকই সম্পন্ন হয়েছিল। রাজার মোহের কারণ যে দুর্বাসার অভিশাপ—সেই ঘটনাটি তাঁরা এখন বিবৃত করেন—ফলে শকুন্তলার আর ক্ষোভের কোন কারণ রইল না—বুঝতে পারলেন সেই প্রত্যাখ্যান দুঃস্থের সচেতনতায় ঘটেনি। ঋষি কণ্ঠের কাছে পাঠানো হ’লো এই মিলনবার্তা। সমস্ত প্রাণীদের দমনহেতু ‘সর্বদমন’ ও সমাগরা পৃথিবীর ভবিষ্যৎ অধীশ্বর প্রজাদের ভরণহেতু ‘ভরত’ নামে ভূষিত পুত্র ও পত্নীসহ ঋষিদম্পতীর আশীষ লাভ করে রাজা দুঃস্থ রাজধানীর উদ্দেশ্যে যাত্রা করেন। পার্থিব কামনায় যে প্রেমের অক্ষুর অনুতাপে দগ্ধ ও তপঃশীর্ণ হওয়ায় নিখাদ সেই প্রেম পরিশেষে ধ্বংস হয়।

মূচ্ছকটিকম্

পরম রূপবান্ গুণবান্ ব্রাহ্মণ চারুদত্ত পেশায় বণিক্ হলেও ধন-
হীন। অতিরিক্ত দানশীলতার জন্তেই তাঁর এই দারিদ্র্যাবরণ। অবশ্য
তাঁর ক্ষোভ নিজের কষ্টের জন্তে নয়, প্রার্থীর প্রার্থনা পূরণে অক্ষমতাই
তাঁকে ব্যথিত করে তোলে। কিন্তু দারিদ্র্য সত্ত্বেও নগরের প্রধানা
নটী বসন্তসেনা তাঁর প্রতি অনুরক্তা। যথার্থ অনুরাগ তো অর্থের
বিচার করে না! তাই গুণমুগ্ধা নায়িকা নায়ক চারুদত্তের সঙ্গে
মিলনে উৎসুক।

আসন্ন সন্ধ্যায় বসন্তসেনা বেরিয়েছেন অভিসারিকা বেশে—গন্ধ-
মাল্য-অলংকারে সুসজ্জিতা সুন্দরী নটী লাবণ্যশোভায় অপরূপা!
তাঁর পশ্চাদ্ধাবন করে কামার্ত রাজশ্যালক শকার—সঙ্গে ভৃত্য ও
সহচর ব্রাহ্মণ বিট। বিট নানা প্রলোভনে ভুলিয়ে বসন্তসেনাকে
শকারের দিকে আকর্ষণের চেষ্টা করে—কিন্তু গুণে যার মন মুগ্ধ
হয়েছে, তুচ্ছ পার্থিব সম্পদ কি তাকে লক্ষ্যভ্রষ্ট করতে পারে? ঘৃণাভরে
বসন্তসেনা শকারের প্রস্তাব প্রত্যাখ্যান করেন—‘গুণে কথু
অনুরাঅস্ম কারণং, ৭ উণ বলাঙ্কারো’—গুণই অনুরাগের কারণ—
বলাঙ্কার নয়।—বিপদ আসন্ন দেখে ত্রস্তা হরিণীর মতই তিনি ছুটে
চলেন শকারের কাছ থেকে আত্মগোপনের জন্তে। পাছে অলংকারের
শিঞ্জন তাঁর অস্তিত্বকে সোচ্চার করে তোলে—তাই সেগুলিও খুলে
ফেলে বেঁধে রাখলেন বস্ত্রে—অন্ধকারে আড়াল দিয়ে এগিয়ে যেতে
বাধা পেলেন এক প্রাচীরের গায়ে। দূর থেকে ভেসে-আসা বিট-
শকারের কথায় বুঝতে পারেন—এইটিই চারুদত্তের বাড়ি—কিন্তু
কোথায় দ্বার, কোথায়ই বা আলো! ওদিকে ধেয়ে আসছে মাংস-
লোলুপ হিংস্র জানোয়ার-দল!

চারুদত্ত সবে সন্ধ্যাপূজা সমাপন করেছেন। পূজার সামগ্র্য
নৈবেদ্য রাজপথে বিতরণের উদ্দেশ্যে সখা মৈত্রেয় দাসী রদনিকাকে

বললেন প্রদীপ ধরতে, নিজে দরজা খুলতে এগিয়ে গেলেন—এই মুহূর্তেই বসন্তসেনা এসে পড়েছেন সেখানে—আগল খোলামাত্রই তিনি আঁচলের ঝাপটায় নিভিয়ে দিলেন প্রদীপটি—পাছে তাঁর পরিচয় প্রকাশিত হয়ে পড়ে। ঘটনার দ্রুততায় রদনিকা বা মৈত্রেয় কারও মনেই কোনো সন্দেহ হ'লো না—বুঝি দম্কা হাওয়াতেই প্রদীপ নিভে গেল! ইতিমধ্যে শকার তার সঙ্গীদের নিয়ে সেখানে এসে উপস্থিত—অন্ধকারে কাছের মানুষকেও চেনা যায় না; কামোন্মত্ত শকার কখনও ‘বিট’কে কখনও বা ভৃত্যকেই বসন্তসেনা ভেবে জড়িয়ে ধরছে। অবশেষে রদনিকার চুলের মুঠি ধরে নিশ্চিন্ত হ'লো—‘এই তো বসন্তসেনাকে ধরে ফেলেছি, আর পালাবে কোথায়!’ উদ্ভ্যক্ত দাসী রুখে দাঁড়ায়—‘মহাশয়রা কি ধরণের ব্যবহার শুরু করেছেন? স্বর শুনে বিট বুঝতে পারেন—এ তো বসন্তসেনা নয়! কিন্তু মূর্খ শকার ভাবে বসন্তসেনা বুঝি গলার স্বর পরিবর্তন করে তাদের ধোঁকা দিতে চাইছেন! এই সময়ই মৈত্রেয় আবার প্রদীপটি জ্বলে নিয়ে ফিরে এলেন—রদনিকার লাঞ্ছনা দেখে ক্রুদ্ধ হয়ে উঠলেন—কিন্তু বিট ভুল বুঝতে পেরে ক্ষমা প্রার্থনা করলেন। অনিচ্ছাকৃত অপমানের জন্তে ত্রুণ প্রকাশ করে তিনি বললেন—‘এক গণিকাকে অনুসরণ করতে এসেই এই দুর্বিপাক। একথা যেন মাননীয় চারুদত্তের কানে না ওঠে, কারণ তাঁর পরিজনদের অসম্মান করার উদ্দেশ্য আমাদের ছিল না।’ কিন্তু বিটের ক্ষমা চাওয়া ও চারুদত্তের প্রশংসা শকারের সহ্য হলো না। ঈর্ষাকুটিলকণ্ঠে সে ঘোষণা করে—‘চারুদত্তকে একথা জানিয়ে দিও—নটী বসন্তসেনা চারুদত্তের প্রতি আকৃষ্ট হয়ে তার ঘরে ঢুকেছে। এখন চারুদত্ত যদি রাজশালকের হাতে বসন্তসেনাকে ফিরিয়ে দেয় তাহলেই বন্ধু হবো, না হলে আমৃত্যু শত্রুতা থাকবে।’—ইতিমধ্যে শকারের ব্যবহারে অসন্তুষ্ট বিট চলে গেছেন—অগত্যা কাপুরুষ শকার তাড়াতাড়ি গা-ঢাকা দেয়।

প্রাচীরের ভিতর নারী-আকৃতি দেখে অন্ধকারে চারুদত্ত ভাবেন

দাসী রদনিকা—নিজের চাদরটি দিয়ে বলেন—‘পুত্র রোহসেনকে এটি দিয়ে জড়িয়ে বাড়ির ভিতর নিয়ে যাও।’—কিন্তু বসন্তসেনা সেই সুবাসিত উত্তরীয় হাতে নিয়ে দাঁড়িয়ে থাকেন—অন্তঃপুরে প্রবেশের অধিকার তো তাঁর নেই! রদনিকাসহ মৈত্রেয় ভিতরে আসতেই চারুদত্ত বিস্মিত—এই নারী তবে কে? এতো দাসী রদনিকা নয়! এখন নিজের পরিচয় প্রকাশ করা ছাড়া বসন্তসেনার গত্যন্তর থাকে না। লজ্জিত চারুদত্ত তাঁকে দাসীর মত আদেশ করায় ক্ষমা প্রার্থনা করেন। বিদূষক মৈত্রেয় যথারীতি শকারের বক্তব্য পেশ করলেন—কিন্তু লম্পটের ক্রোধ চারুদত্তকে বিন্দুমান্রও বিচলিত করতে পারে না। বসন্তসেনার রূপ ও গুণ ইতিপূর্বেই চারুদত্তের হৃদয় জয় করেছে। বিনীতভাবে বসন্তসেনা বলেন—‘আমার এই অলংকারগুলি আপনার কাছে গচ্ছিত রাখতে চাই—কারণ এগুলির জন্যই যত ছুঁতোর দল অনুসরণ করে।’ অনিচ্ছাসত্ত্বেও বসন্তসেনার আগ্রহে চারুদত্তকে রাজী হতে হয়। বন্ধু মৈত্রেয়কে এই অলংকার রক্ষার দায়িত্ব দিয়ে বসন্তসেনাকে তাঁর বাড়ির দিকে এগিয়ে দিতে চললেন—কারণ অন্ধকার রাজপথ সুন্দরী যুবতীর পক্ষে বিপদজনক। ছ’জনে এগিয়ে চললেন—বাস্তিত-সান্নিধ্য ছ’জনের মনে আলোড়ন জাগায়—কিন্তু অলক্ষণেই পথ গেল ফুরিয়ে—বসন্তসেনা প্রবেশ করলেন নিজ আবাসে—শূন্যমনে ফিরে এলেন চারুদত্ত।

একদিন সংবাহক নামে চারুদত্তের এক পুরাতন ভৃত্য পাশা খেলায় হেরে গিয়ে প্রাপ্য অর্থ না দিয়েই পালিয়ে আসছিল আসর থেকে—সভাধ্যক্ষ মাথুর ও প্রতিদ্বন্দ্বী দূতকর তার পিছু ধাওয়া করে যায়—পলায়মান সংবাহক এক প্রতিমাশূন্য মন্দিরের সামনে এসে উপস্থিত—তার মাথায় চট করে একবুদ্ধি খেলে গেল—অনুসরণকারীদের বিপথে চালিত করার জগ্গে সে পিছু হেঁটে মন্দিরে ঢুকে আব্ছা অন্ধকারে বিগ্রহের মত বসে রইল। মাথুর ও দূতকর সেখানে এসে বিপরীত দিকের পদচিহ্ন দেখে ভাবল মন্দির থেকে সংবাহক চলে গেছে—কাজেই ওইখানেই বসে তারা পাশাখেলা শুরু করে দিল—জুয়াড়ী

সংবাহক পাশার শব্দে আর নিজেকে স্থির রাখতে পারে না—জুয়ার এমনই অমোঘ আকর্ষণ। সে বেরিয়ে এসে যেই পাশায় দান দিতে যাবে অম্নি খপ্ করে চেপে ধরেছে এরা দু'জন—‘আর যাবে কোথায় বাছা-ধন—বার কর জলদি দশ মোহর’। অনেক অনুন্নয় করে কপর্দকহীন সংবাহক—কিন্তু নিষ্ঠুর জুয়াড়ীদের কাছে কিছুতেই রেহাই নেই। যথেষ্ট উত্তম-মধ্যম দেওয়া সত্ত্বেও যখন কোনমতেই কিছু পাওয়া গেল না তখন তাকে বিক্রী করেই টাকা আদায়ের সিদ্ধান্ত হলো—এই সময় দর্জরক নামে এক নাগরিক অকুস্থলে এসে হাজির—পাশাখেলায় অভিজ্ঞ এই ব্যক্তি মাথুরের নিষ্ঠুরতা সম্বন্ধেও যথেষ্ট ওয়াকিফ্‌হাল। সংবাহকের অবস্থা তাঁর মনে সহানুভূতির উদ্রেক করে—সে এদের সঙ্গে ঝগড়া বাধিয়ে দিল—সুযোগ বুঝে মাথুরের চোখে ধুলো ছিটিয়ে সংবাহককে ইঙ্গিত করতেই সে ছুটে পালিয়ে গিয়ে বসন্তসেনার গৃহে আশ্রয় নিল। বসন্তসেনা প্রশ্ন করে জানতে পারেন—এ ব্যক্তি পূর্বে চারুদত্তের ভৃত্য ছিল—এখন প্রভু ধনহীন হওয়ায় বাধ্য হয়ে জুয়াড়ীর বৃত্তি গ্রহণ করেছে। তৎক্ষণাৎ তিনি মাথুরের জন্ত অলংকার পাঠিয়ে সংবাহককে ঋণমুক্ত করলেন—কৃতজ্ঞ সংবাহক জুয়াখেলা ছেড়ে সন্ন্যাস-গ্রহণের অঙ্গীকার করে বিদায় নেয়।

ইতিমধ্যে এক অঘটন ঘটে গেছে—বসন্তসেনার পোষা হাতী ক্ষেপে গিয়ে রাজপথে এক কাণ্ড বাধিয়ে দিয়েছিল—কোনো লোকই তাকে বাঁধার জন্তে এগোতে ভরসা পাচ্ছিল না। শেষকালে তাঁর ভৃত্য কর্ণপূরক বলকণ্ঠে তাকে শৃঙ্খলিত করতে সমর্থ হ’লো—ধন্য ধন্য পড়ে গেল নগরবাসীদের মধ্যে; পথচারী চারুদত্ত খুশি হয়ে শেষসম্মল গায়ের চাদরখানি দান করে বসলেন কর্ণপূরককে। ফুলের রঙে রাঙানো সুগন্ধি এই উত্তরীয়টি বসন্তসেনা আগেও একবার স্পর্শ করতে সুযোগ পেয়েছিলেন চারুদত্ত তাঁকে দাসী বলে ভুল করায়; এখন হাতে পেয়ে এটি আর ছাড়লেন না—বিনিময়ে ভৃত্যকে মূল্যবান অলংকারই দিয়ে দিলেন।

চৌধবিদ্যাবিশারদ শর্বিলক বসন্তসেনার দাসী মদনিকার প্রেম-প্রার্থী—কিন্তু তাকে সম্পূর্ণ নিজের করে পেতে গেলে গৃহকর্ত্রীর কাছ থেকে অর্থের বিনিময়ে তাকে মুক্ত করে আনতে হবে। কি করে সংগ্রহ করা যাবে এই মুক্তিপণ ? তস্করতা ছাড়া আর কোন পথ তো আপাতত খোলা নেই ! অতএব নিজের আয়ত্ত বিদ্যাকেই কাজে লাগাতে মনস্থ করে শর্বিলক। মধ্যরাত্রির গভীর অন্ধকারে আত্মগোপন করে সে রাজপথ ধরে এগিয়ে চলে। সঙ্গীত-রসিক চারুদত্ত গিয়েছিলেন সঙ্গীতজ্ঞ রেভিলের গান শুনতে—অনেক রাত্রে ক্লান্ত দেহে ফিরে এসে নিদ্রিত হয়ে পড়লেন। সঙ্গী মৈত্রেয়ও বাইরের ঘরে গভীর নিদ্রায় আচ্ছন্ন—শর্বিলক সিঁদ কেটে সেই ঘরে প্রবেশ করে—কিন্তু হতাশ হতে হলো তাকে—নির্ধন চারুদত্তের ঘরে দাসী জিনিষ আর কিই বা পাওয়া যাবে ! হঠাৎ তার দৃষ্টি আকৃষ্ট হলো ঘুমন্ত লোকটির দিকে—বিড়বিড় করে ঘুমের ঘোরে কি বকে যাচ্ছে—যেন কোন অলঙ্কারের কথা বলছে ? ওর কাছে রাখা ছেঁড়া পুঁটুলিতে কিই বা বাঁধা আছে ? একি, প্রদীপের মুছ আলোতেও যে সোনার দীপ্তি ঠিকরে উঠছে ? তাইতো, এ যে মূল্যবান অলঙ্কার ! তৎক্ষণাৎ ঐগুলি নিয়ে সে চম্পট দেয়। স্পর্শ পেয়ে ঘুমের ঘোরে মৈত্রেয় ভাবে বুঝি চারুদত্ত এসেছেন—অতএব তাঁর হাতে অলঙ্কারের দায়িত্ব অর্পণ করে নির্বিবাদে নিজ দিতে থাকে। ভোর হয়ে আসে—দাসী মদনিকার ডাকাডাকিতে চোখ রগড়ে উঠে বসে বিদূষক মৈত্রেয়—সামনে একি ? এমন বিচিত্র সিঁদ কেটে এ ঘরে ঢুকে চোরের লাভ হল কি ? অলঙ্কারের পুঁটুলি তো স্বয়ং চারুদত্তের কাছে কাল রাত্রেই গচ্ছিত করে দেওয়া আছে ! চারুদত্তও ঘুম ভেঙে যাওয়ায় সেখানে এসে এই কীর্তি দেখে হতবাক। বিদূষকের কথা শুনে তিনি সবই বুঝতে পারেন—ঘুমের ঘোরে তস্করকে অলঙ্কার সমর্পণ করে বিদূষক ভাবছে বুঝি চারুদত্তের হাতেই দিয়ে দিয়েছে। অলঙ্কারগুলি অপহৃত হওয়ায় মর্মাহত হয়ে পড়েন তিনি—লোকে নিশ্চয় মনে করবে দারিদ্র্যের

জন্মে নিজেই পরস্বাপহরণ করে চোরের দোহাই পাড়ছেন। স্বামীকে এই বিপদ থেকে উদ্ধার করার জন্মে এগিয়ে আসেন সাক্ষী পত্নী ধূতা—তঁার একটি মাত্র অবশিষ্ট রত্নমালা, যেটি তিনি পিতৃগৃহের স্মৃতিরূপে এতদিন রক্ষা করে আসছিলেন, সেইটিই অর্পণ করেন স্বামীকে ঋণ মুক্ত করার জন্মে। অনিচ্ছাসত্ত্বেও পত্নীর দান গ্রহণ করতে বাধ্য হলেন চারুদত্ত। তৎক্ষণাৎ তিনি বিদুষককে পাঠিয়ে দিলেন বসন্তসেনার কাছে এই কথা বলে—‘গচ্ছিত অলঙ্কারগুলি আমি পাশাখেলায় হেরেছি, বিনিময়ে আপনি এই রত্নহার গ্রহণ করুন।’

শর্বিলক বসন্তসেনার বাড়িতে এসে গোপনে মদনিকার সঙ্গে সাক্ষাৎ করে—মুক্তিমূল্য হিসাবে পাঠায় সেই চুরি-করা অলঙ্কার-গুলি। অলিন্দ থেকে তাদের কথাবার্তার কিছু অংশ বসন্তসেনার কানে গেল—শঙ্কিত হয়ে ওঠেন তিনি—অলঙ্কার চুরি করতে গিয়ে চারুদত্তের কোনো শারীরিক ক্ষতি করেনি তো এই ব্যক্তি? না, আশঙ্কা অমূলক, বাস্তিতার জন্ম এগুলি গ্রহণ করা ছাড়া আর কোনো অগ্নায় করেনি শর্বিলক। অতএব গহনার পুঁটলিটি গ্রহণ করেন বসন্তসেনা। প্রার্থনা অনুসারে মদনিকাকেও দাসীত্ব থেকে মুক্তি দিয়ে শর্বিলকের হস্তে সমর্পণ করেন বধূরূপে; তাদের যাত্রার জন্ম গাড়িরও ব্যবস্থা করে দিলেন সহৃদয় বসন্তসেনা। কৃতজ্ঞ দম্পতী বিদায় নিল—শুরু হলো তাদের নতুন জীবনের প্রথম যাত্রা। কিন্তু পথের মাঝেই এক বিপত্তি—সংবাদ এলো শর্বিলকের ঘনিষ্ঠ বন্ধু আর্থককে রাজা কারাকুদ্ধ করেছেন, কারণ গণকরা ভবিষ্যদ্বাণী করেছিলেন যে গোপযুবক আর্থকই বর্তমান রাজাকে সিংহাসনচ্যুত করে রাজত্ব লাভ করবেন। বন্ধুর বিপদে উদাসীন থাকতে পারেন না শর্বিলক, অতএব নববধূ মদনিকাকে বন্ধু রেভিলের বাড়ীর দিকে রওনা করিয়ে দিয়ে আর্থকের সহায়তার উদ্দেশ্যে অগ্রসর হলেন।

ওদিকে মৈত্রেয় সেই রত্নহার নিয়ে এসেছেন বসন্তসেনার কাছে গচ্ছিত স্বর্ণালঙ্কারের পরিবর্তে। দাসী সসজ্জমে তাঁকে প্রাসাদে নিয়ে

আসে—বিলাস-বৈভবের প্রাচুর্য তাঁকে বিস্মিত, বিহ্বল করে তোলে। বহু প্রকোষ্ঠ পার হয়ে তিনি বসন্তসেনার কাছে এসে পৌঁছালেন। চারুদত্তের বক্তব্য যথারীতি জানিয়ে রত্নমালাটি সমর্পণ করলেন মৈত্রেয়—বসন্তসেনাও শ্রদ্ধাভরে সেটি গ্রহণ করে জানালেন—আজই চারুদত্তের সঙ্গে তাঁর মিলন হবে। রত্নহারটি নিয়ে নেওয়ায় অবশ্য মৈত্রেয় বসন্তসেনার ওপর খুবই বিরক্ত।

চারুদত্ত উদ্বিগ্ন চিন্তে অপেক্ষা করছেন উদ্যানে—আকাশে মেঘের ঘনঘটা—মৈত্রেয় ফিরে এসে জানালেন বসন্তসেনার আগমনের কথা। বিরক্তভাবে তিনি চারুদত্তকে বেণ্যাসংসর্গ থেকে নিবৃত্ত হতে বলেন—কিন্তু হৃদয় দিয়েই হৃদয়ের অনুভব সম্ভব—তাই বসন্তসেনার অন্তরের প্রকৃত পরিচয় মৈত্রেয় না বুঝলেও চারুদত্তের কাছে অজানা ছিল না। অতএব সাগ্রহে তিনি অপেক্ষা করতে থাকেন প্রিয়া-মিলনের আশায়।

দারুণ দুর্যোগের মধ্যেও অভিসার-সাজে সেজে বসন্তসেনা রওনা হয়েছেন দয়িতের উদ্দেশ্যে। অন্ধকার—ঝড়ঝাঝি কিছুই তাঁর পথের বাধা হতে পারে না—দারুণ ধারাবর্ষণকে উপেক্ষা করে, বজ্রের গর্জন—বিদ্যুতের ভ্রুকুটিকে তুচ্ছ করে চারুদত্তের কাছে এসে উপস্থিত। দাসী পরিহাস করে বলে—‘রত্নমালাটির মূল্য জানতেই এঁর আগমন, কারণ সেই মালাটি বসন্তসেনা পাশাখেলায় বাজী রেখে খুইয়েছেন—কাজেই তার বদলে এই সোনার গয়নার পুঁটুলিটি রাখুন।’ আশ্চর্য! এতো সেই পুঁটুলি যেটি বসন্তসেনা পূর্বে চারুদত্তের কাছে গচ্ছিত রেখেছিলেন—পরে চোর সিঁদ কেটে নিয়ে যায়। কি করে তা’ আবার ফিরে গেল এঁর কাছে—চারুদত্ত ও মৈত্রেয় ছ’জনেই হতবাক্। দাসী শর্বিলকসংক্রান্ত সমস্ত ঘটনা বিবৃত করে। ধীরে ধীরে এগিয়ে আসেন বসন্তসেনা—সিন্ধুবসনা যৌবনবতী নারীর অপরূপ সৌন্দর্য মুগ্ধ করে চারুদত্তকে। বজ্রের গর্জনে ত্রস্তা নায়িকা আলিঙ্গনে আবদ্ধ করে নায়ককে—সাদরে তাঁকে

গৃহাভ্যন্তরে নিয়ে আসেন চারুদত্ত—প্রিয়-সমাগমে সার্থক হ'লো তাঁর অভিসার।

মিলন-রজনীর হলো অবসান—উদয়াচলে দিবাকরের আবির্ভাব, বিহঙ্গের কলগানে মুখরিত ধরা। দাসীর ডাকে ঘুম ভেঙে যায় বসন্তসেনার—কিন্তু কোথায় প্রিয়তম, পাশে নেই কেন? বুঝি কোনো ভবিষ্যৎ অমঙ্গলের আশঙ্কায় কেঁপে ওঠে তাঁর বুক! দাসী জানায় খুব ভোরে ওঠেই তিনি নগরের বাইরের পুরাতন উদ্যান-বাটিকায় চলে গেছেন—বসন্তসেনা জাগরিত হলে সেখানে যাওয়ার জন্তে আহ্বান জানিয়ে গাড়ির ব্যবস্থাও করে গেছেন। চলে যাওয়ার আগে চারুদত্তের পত্নী ধৃতাকে সেই রত্নমালাটি ফেরৎ পাঠিয়ে দিলেন বসন্তসেনা—কিন্তু আভিজাত্যবোধসম্পন্ন ধৃতা বলে পাঠালেন—‘স্বামী যখন প্রীতিভরে আপনাকে এই অলঙ্কার দিয়েছেন তখন তা’ আপনারই প্রাপ্য। আমার চিরস্থায়ী অলঙ্কার আৰ্যপুত্র স্বয়ং।’ চারুদত্তের পুত্র রোরুহমান রোহসেনকে কোলে নিয়ে নানাভাবে ভুলানোর চেষ্টা করে দাসী রজনিকা—তার দাবী—মাটির গাড়ি নিয়ে সে খেলবে না, সোনার গাড়ি চাই। শিশুর চোখে জল দেখে বসন্তসেনা স্থির থাকতে পারেন না—তাঁর সেই স্বর্ণালঙ্কারগুলি দিয়ে বলেন—‘এগুলি দিয়ে সোনার গাড়ি গড়িয়ে খেলা কোরো।’ তাঁর আর দেবী করা চলে না, কারণ ভৃত্য এসে জানায় ‘গাড়ি তৈরী’। অতএব সামান্য প্রসাধন সেরে নেওয়ার জন্তে কিছুক্ষণ অপেক্ষা করতে বলেন—এই সুযোগে ভৃত্য চলে গেল গাড়ির ঢাকনাখানি নিয়ে আসতে। ঠিক এই সময়ই রাজশালক শকারের গাড়ি নিয়ে ঐ পথ দিয়ে যাচ্ছিল ভৃত্য সংস্থানক সেই পুরাতন উদ্যানে যেখানে শকার উপস্থিত—এই উদ্যানেরই এক অংশে চারুদত্তও বসন্তসেনার জন্তে প্রতীক্ষারত। পেছনের গাড়িকে পাশ কাটিয়ে এগিয়ে যাওয়ার রাস্তা দিতে গিয়ে চারুদত্তের বাড়ির দরজাতেই গাড়ি রেখে সংস্থানক সবে নেমে গেছে—বসন্তসেনাও ঠিক সেই সময়ে বেরিয়ে এসে ওইটিই

তার জন্তে নির্দিষ্ট গাড়ি ভেবে চড়ে বসেছেন—সংস্থানকও কয়েক মুহূর্ত পর ফিরে এসে গাড়িটি চালিয়ে দিল।

রাজপথে ঘোষণা শোনা যাচ্ছে—‘রাজার কারাগার থেকে গোয়ালার ছেলে আর্থক পালিয়েছে।’ গণকরা জানিয়েছিলেন—বর্তমান রাজা পালকের পর আর্থকই রাজা হবে। অতএব রাজা পালক বন্দী করে রেখেছিলেন আর্থককে। বন্ধু শর্বিলক এই খবর পেয়ে ছুটে গিয়েছিলেন সাহায্যের জন্তে। তাঁর সহায়তাতেই কারারক্ষীকে কাবু করে আর্থক নিজেকে মুক্ত করেছে। পালাতে গিয়ে সেও এসে পড়েছে চারুদত্তের বাড়ির সামনে—তখন চারুদত্তের ভৃত্য সবেমাত্র আচ্ছাদনটি নিয়ে এসে গাড়িসহ অপেক্ষা করছে বসন্তসেনার জন্তে। কিন্তু তিনি তো ভুলক্রমে ইতিমধ্যেই সংস্থানক-চালিত শকারের গাড়ীতে উঠে চলে গেছেন। আর্থক এসে পড়ে গাড়ীটির পেছন দিকে—তার পায়ে বাজছে ছিন্ন শৃঙ্খল—ভৃত্য ভাবে বুঝি বসন্তসেনা এসেছেন, তাঁরই নৃপূরের শব্দ। অব্যর্থ গুরুগুলিকে নিয়ে সামনের দিকে ব্যস্ত থাকায় সে না দেখেই বলে—‘আর্য্য, আপনি পেছন থেকেই গাড়ীতে উঠুন, সামনে গুরুগুলি খুব পাগলামি জুড়েছে।’ আর্থক দেখে আত্মগোপনের এইটিই সুবর্ণ-সুযোগ। অতএব সে গাড়ির মধ্যে ঢুকে বসে থাকে। গাড়ি চলতে শুরু করে। কিন্তু কিছুদূর এগিয়েই গাড়ি থামাতে হয়—আর বুঝি শেষরক্ষা হলো না। চন্দনক ও বীরক—দুই সেনাপতি গাড়ির গতিরোধ করে—পরীক্ষা না করে কোনো কিছুই ছেড়ে দেওয়া হবে না। চারুদত্তের গাড়ি ও আরোহিণী বসন্তসেনা—চালকের কাছে একথা শুনে চন্দনক অবশ্য গাড়িটি ছেড়ে দেওয়ার পক্ষপাতী ছিল, কিন্তু বীরক নাছোড়-বান্দা। অগত্যা বাধ্য হয়েই চন্দনক পরীক্ষার জন্তে এগিয়ে এসে ঢাকনা তুলেই হতবাক—এই তো পলায়িত গোপনন্দন। নিরুপায় আর্থক তার শরণাপন্ন হয়। চন্দনক দেখে উভয়সঙ্কট—প্রথমত চারুদত্তের গাড়ীতে বন্দীর পলায়নের ব্যাপারটি রাজদ্বারে চারুদত্তের

অপরাধ প্রমাণ করবে, কিন্তু চারুদত্তের গুণগ্রাহী চন্দনক এইরকম কিছু ঘটতে দিতে রাজী নয়, তাছাড়া আর্থকের সাহায্যকারী শর্বিলকের কাছেও নানাভাবে ঋণী হওয়ায় তার ক্ষতিসাধন করাও চন্দনকের কাম্য নয়, অত্য়দিকে রাজকার্যের দায়িত্ব! যাইহোক শরণাগতকে আপাততঃ অভয় দেওয়াই কর্তব্য কারণ—‘ভীতাভয়-প্রদানং দদতঃ পরোপকাররসিকস্য । যদি ভবতি ভবতু নাশস্তথাপি চ লোকে গুণ এব । “—ভীত ব্যক্তিকে অভয়দানকারী এবং পরোপকারীর মৃত্যু হলেও তার গুণ পৃথিবীতে স্বীকৃত হবে ।’ অতএব চন্দনক গাড়িটি ছেড়ে দিলেও বাদ সাধল বীরক । চন্দনকের বক্তব্যের অসংলগ্নতা, আর্থক বলতে গিয়ে ঢোঁক গিলে ‘আর্থ্য বসন্তসেনা’ বলা—ইত্যাদি ব্যাপারগুলি স্বাভাবিকভাবেই বীরককে সন্দিগ্ধ করে তোলে—অতএব সে নিজেই গাড়ি পরীক্ষার জন্যে এগিয়ে আসে । চন্দনক দেখে সমূহ বিপদ—যে ভাবে হোক একে নিবৃত্ত করতেই হবে—কাজেই এর সঙ্গে ঝগড়া বাধিয়ে দেওয়া যাক । পারস্পরিক অপমানসূচক উক্তিতে অবস্থা যখন বেশ ঘোরালো হয়ে উঠেছে তখন পদাঘাতে বীরককে মাটিতে ফেলে দিয়ে চন্দনক নিজের তরবারিটি গাড়ির মধ্যে দিয়ে বলল—‘আর্থ্যে বসন্তসেনে, পরীক্ষার চিহ্নস্বরূপ এই তরবারিটি দিলাম’—এই বলে গাড়িটিকে চলে যেতে ইঙ্গিত করল । এইভাবে অস্ত্রহীন আর্থক অস্ত্র লাভ করল । ক্রুদ্ধ বীরক রাজদরবারে নালিশ জানাতে গেল ; চন্দনকও ভাবে ‘তার শাস্তি আসন্ন, অতএর সপরিবারে আর্থকেরই অনুসরণ করা যাক ।’

নগরোপান্তে উদ্গানে মৈত্রেয়সহ চারুদত্ত বসন্তসেনার প্রতীক্ষা করছেন অধীর আগ্রহে—এমন সময় শোনা গেল ভৃত্য বর্ধমানের গলার স্বর—আশাষিত হয়ে উঠলেন চারুদত্ত—মৈত্রেয়কে বললেন সসন্মানে যেন বসন্তসেনাকে নামিয়ে আনা হয় । কিন্তু গাড়ির ভিতর এ কে ? বিদূষক পরিহাস করে বলে—এতো বসন্তসেনা নয়, এ যে বসন্তসেন ! কৌতূহল নিয়ে এগিয়ে এসে চারুদত্ত ত বিস্মিত—

কে এই সুপুরুষ শক্তিমান কুমার ? আর্থক নিজের পরিচয় জানিয়ে তাঁর শরণ নেয়। শরণাগতকে অভয় দিয়ে তিনি তার পায়ের শিকল খুলে দিলেন, এমনকি নিজের গাড়িটিও দিয়ে দিলেন আর্থকের পলায়নে সহায়তার উদ্দেশ্যে। এইভাবে ভবিষ্যৎ রাজা আর্থক ও চারুদত্ত বাঁধা পড়লেন অচ্ছেদ্য বন্ধুত্বের বন্ধনে।

পুষ্পকরগুপ্ত নামে এই উদ্যানেরই আরেক দিকে নিজের গাড়ীর অপেক্ষায় বসে আছে শকার ও তার সহচর বিট। জুয়াড়ী সংবাহক ইতিমধ্যে সংসারের প্রতি বীতশ্রদ্ধ হয়ে ভিক্ষুব্রত অবলম্বন করেছে—সে এই উদ্যানের পুষ্করিগীতে কৌপীন ধুতে এসে পড়ে গেল শকারের সামনে—বদ্রাগী শকার তাকে মারতে যায়, কিন্তু বিট কোনোমতে এই অকাজ থেকে শকারকে নিরস্ত করে। ভৃত্য স্বাবরকের বেশ দেবী হয়ে যাচ্ছে গাড়ী নিয়ে আসতে—কারণ পথের মধ্যে ঐ গাড়িটিও সেনাপতিরা আটকে দিয়েছিল। বেলা বেড়ে চলে—শকার অধৈর্য হয়ে উঠছে—রৌদ্রের খরতাপ ক্রমশ অসহনীয় অবস্থার সৃষ্টি করে—অবশেষে গাড়ীর শব্দ শোনা গেল—কাছাকাছি আসতেই শকার গাড়ীতে ঢুকতে যায়—কিন্তু তৎক্ষণাৎ ভয়ে পিছিয়ে আসে—ভিতরে এক স্ত্রীমূর্তি কেন ? কোনো রাক্ষসী ঢুকে পড়েছে নাকি ? বিট যথার্থ ব্যাপারটি জানার জন্তে এগিয়ে এসে গাড়ির আচ্ছাদনটি তুলেই বিস্মিত—‘এ যে বসন্তসেনা ! তবে হরিণী কি নিজেই বাঘের মুখে এগিয়ে এলো !’ সভয়ে বিটের শরণ নিয়ে বসন্তসেনা জানালেন—গাড়ী-সংক্রান্ত ভুলের ফলেই এই বিপত্তি। বিট তাঁকে অভয় দিয়ে শকারকে গাড়ি চড়া থেকে নিবৃত্ত করার জন্তে বলতে বাধ্য হন—‘হ্যাঁ ওখানে রাক্ষসীই বসে আছে, অতএব গাড়িতে ওঠা উচিত হবে না ; আমরা হেঁটেই বাড়ির পথে রওনা হই।’ কিন্তু দুর্মতি শকার অত সহজে ভুলবার পাত্র নয়—গাড়িতে সে চড়ে বসবেই ! পাছে মিথ্যা কথা প্রমাণিত হয়ে যায় এই আশঙ্কায় বিট বাধ্য হয়ে সত্য প্রকাশ করে ফেলে—‘প্রকৃতপক্ষে বসন্তসেনাই এসেছেন অভিসারে।’ লম্পট

শকারের উল্লাস দেখে কে ! অনেক হাস্যকর অসংলগ্ন উক্তিতে সে বসন্তসেনাকে সন্তুষ্ট করার চেষ্টা করে—কিন্তু চারুদত্তে সমর্পিত হৃদয়া বসন্তসেনা ঘৃণাভরে তাকে প্রত্যাখ্যান করেন—ক্রোধের আগুন জ্বলে ওঠে তার মনে—নানা কুকথায় অপমান করার চেষ্টা করে তাঁকে । নিরুপায় বসন্তসেনা গাড়ী থেকে নেমে একপাশে দাঁড়িয়ে থাকেন অসহায়ভাবে । ক্ষিপ্ত শকার বিটকে আদেশ করে বসন্তসেনাকে হত্যা করতে—এই নির্মম প্রস্তাবে নিজের কান চেপে ধরে বিট—‘এমন কথা শোনাও পাপ’ । তখন ভৃত্যকে পুরস্কারের লোভ দেখিয়ে কাজ হাসিল করতে চায় ছবুভূ—কিন্তু এই কুকাজে ভৃত্য স্থাবরকও রাজি হ’লো না । অগত্যা মিথ্যা কারণ দেখিয়ে তাদের দূরে পাঠিয়ে দিয়ে নৃশংস শকার আবার একান্তে প্রলোভনের জাল বিস্তার করার চেষ্টা করে—কিন্তু বসন্তসেনার একনিষ্ঠতার কাছে ছবুভূের সব প্রয়াসই ব্যর্থ হয়—চরিত্রহীন খলস্বভাব শকারকে ঘৃণাভরে প্রত্যাখ্যান করে তিনি বলেন—‘যত্নেন সেবিতব্যঃ পুরুষঃ কুলশীলবান্ দরিদ্রোহপি’—সম্ভ্রান্ত চরিত্র ও উচ্চবংশবিশিষ্ট পুরুষ দরিদ্র হলেও সেবার যোগ্য ।’ ব্যর্থ লালসায় উন্মত্ত শকার চারুদত্তের উদ্দেশ্যে কটুক্তি করতে করতে গলা টিপে ধরে বসন্তসেনার—নিঃশ্বস রুদ্ধ হওয়ার আগে পর্যন্ত বসন্তসেনার মুখ থেকে একটি কথাই বারবার উচ্চারিত হতে থাকে—‘নমো অজ্ঞ চারুদত্তস্ম’—‘আর্য চারুদত্তকে নমস্কার ।’ নির্ধুর নিষ্পেষণে সংজ্ঞাহীন দেহটি মাটিতে পড়ে যায়—আত্মগোপনের জন্তে দ্রুত অশ্রুদিকে সরে পড়ার চেষ্টা করতে থাকে ছবুভূ, কিন্তু বিট অমঙ্গলের আশঙ্কায় তাড়াতাড়ি ফিরে এসে বসন্তসেনার কথা জিজ্ঞাসা করে । শকার প্রথমে এড়িয়ে যাওয়ার চেষ্টা করে—কিন্তু পাপ বেশীক্ষণ গোপন থাকে না । শকারের অসংলগ্ন কথাবার্তা থেকেই ধরা পড়ে যায় তার দুর্ভিক্ষ । আন্তরিক দুঃখে বিলাপ করতে থাকে বিট—অবশেষে দুর্জনের সঙ্গ পরিহার করে চলে যেতে উদ্যত হতেই শকার তার ঘাড়ে দোষ চাপাবার চেষ্টা করে—মরিয়া হয়ে বিট এবার

অস্ত্রে হাত দেয়—কাপুরুষ শকার তাড়াতাড়ি সরে দাঁড়ায়। বিট স্থির করে—এবার শর্বিলক—আর্যকের সঙ্গে যোগ দেওয়াই ভাল। এই উদ্দেশ্যে সে স্থান ত্যাগ করে। এবার ভৃত্য স্থাবরকের পালা। তাকে অলঙ্কারের প্রলোভন দেখিয়ে কুকর্মের সঙ্গী করার চেষ্টা করে শকার—কিন্তু কি সৎ ও নির্লোভ এই সামান্য ভৃত্য!—ঘৃণার সঙ্গে সে উৎকোচের প্রস্তাব প্রত্যাখ্যান করে। অতএব নিরুপায় শকার একাই শুকনো ডালপালা জড়ো করে ঢাকা দিয়ে দেয় বসন্তসেনার অচেতন দেহ। পাষণ্ড এবার চারুদত্তের বিনাশের জন্তে নতুন ফন্দী আঁটতে থাকে—‘বসন্তসেনাকে হত্যার অপরাধ চারুদত্তের ঘাড়ে চাপিয়ে আদালতে নালিশ করা যাক’। এই উদ্দেশ্যে সে রওনা হয়ে যাওয়ার পরই সেই বৌদ্ধ ভিক্ষু সেখানে উপস্থিত। তার ভিজা কাপড় সেই শুকনো পাতার স্তূপের ওপর মেলে দিতে গিয়ে দেখে—কার যেন গয়না-পরা হাত দেখা যাচ্ছে ভিতর থেকে! অবাক হয়ে যায় সন্ন্যাসী, তাড়াতাড়ি পাতাগুলি সরিয়ে দিতেই দেখা গেল বসন্তসেনার অচেতন-প্রায় দেহ! ইনিই সে দয়াশীলা রমণী যিনি দশমোহর দিয়ে তাকে দ্যুতকর থেকে মুক্ত করেছিলেন। ইঞ্জিতে জল চাইলেন বসন্তসেনা—ভিক্ষু নিজের ভিজা কাপড় নিংড়ে জল দিতে থাকে। জল ও বাতাসের স্পর্শ পেয়ে ধীরে ধীরে চৈতন্য লাভ করেন বসন্তসেনা। কাছের বুলন্ত লতাটি ধরার জন্তে এগিয়ে দিয়ে ভিক্ষু তাঁকে উঠে দাঁড়াতে সাহায্য করে। কাছেই বৌদ্ধ মঠে থাকে তার ধর্মভগিনী। আশ্রয়ের জন্তে বসন্তসেনাকে সেখানেই নিয়ে যায় এই পরহিতব্রতী বৌদ্ধ সন্ন্যাসী।

শকার সোজা এসেছে বিচারালয়ে—প্রথমেই চারুদত্তকে ‘খুনী’ অপবাদ দিয়ে বসন্তসেনা-হত্যার মামলা রুজু করে দেয়। বিচারক অবশ্য চারুদত্তের মহত্ব সম্বন্ধে নিশ্চিত—কিন্তু রাজার আত্মীয় শকারের রক্তচক্ষুকে অবহেলা করার মত হুঃসাহস তাঁর নেই—অতএব তলব করা হলো চারুদত্তকে। যথাসময়েই চারুদত্ত হাজির হলেন

বিচারকের দরবারে—পথে দেখা নানা দুর্লক্ষণ তাঁর মনকে ভারাক্রান্ত করে তোলে। বিচারক তাঁকে সম্মানে উপযুক্ত আসন দিলেন—কিন্তু ক্ষিপ্ত হয়ে ওঠে শকার—হত্যাকারী আখ্যা দিয়ে চারুদত্তের উপর অজস্র কটুক্তি বর্ষণ করে চলে এই ছুবৃত্ত। ইতিনধ্যে বসন্তসেনার মাকেও ডেকে আনা হয়েছে জিজ্ঞাসাবাদের উদ্দেশ্যে। তার কাছ থেকে জানা গেল—বসন্তসেনা চারুদত্তের অভিসারেই রওনা হয়েছিলেন, কিন্তু এখনও ফিরে আসেন নি। সত্যনিষ্ঠ চারুদত্তও একথার সত্যতা অস্বীকার করেন না। কিন্তু তারপর কি হলো বসন্তসেনার—তবে কি সত্যিই চারুদত্ত তাঁকে গয়নার লোভে মেরে ফেলেছেন?—সবার মনেই এই প্রশ্ন। অবস্থা আরও জটিল করে তুলতেই যেন চন্দনকের বিরুদ্ধে নালিশ করার জন্তে সেই সেনাপতি বীরক এসে উপস্থিত যার সঙ্গে চারুদত্তের গাড়ীসংক্রান্ত ব্যাপারে চন্দনকের ঝগড়া হয়েছিল। সে জানায়—পথে একটি গাড়ি সে আটকিয়ে ছিল যেটিতে চড়ে বসন্তসেনা চারুদত্তের উদ্দেশ্যে পুষ্পকরগুপ্ত উঠানে যাচ্ছেন শুনে চন্দনক ছেড়ে দিয়েছিল। বিচারক ক্রমশ গম্ভীর হয়ে উঠছেন—ঘটনাগুলি তো ক্রমশ চারুদত্তের বিপক্ষেই যাচ্ছে। তবে তিনি লোক পাঠালেন সেই উঠানে দেখে আসার জন্তে সত্যিই কোনো রমণীর মৃতদেহ পড়ে আছে কি না। সে ফিরে এসে জানায়—প্রকৃতই একটি বিকৃত দেহ সেখানে পড়ে আছে যেটি শেয়াল-শকুনিতে খেয়ে ফেলেছে—শুধু চুল ও অবশিষ্ট হাত পায়ের অংশ দেখে অনুমান করা যাচ্ছে দেহটি কোনো নারীর। অবস্থা উঠলো চরমে যখন বিদূষক মৈত্রেয় চারুদত্তের বিচারালয়ে আসার খবর পেয়ে ছুটে এলো। এইসময় সে চারুদত্তের অনুরোধে বসন্তসেনাকে প্রত্যর্পণ করতে যাচ্ছিল সেই অলঙ্কারগুলি—যেগুলি তিনি পুত্র রোহসেনের কান্না দেখে সোনার গাড়ী গড়িয়ে খেলার জন্তে দিয়ে এসেছিলেন। পথে চারুদত্তের খবর পেয়ে সে সোজা আদালতে হাজির। অভিযোগ শুনেই শকারের সঙ্গে ঝগড়া শুরু হয়ে যায় বিদূষকের—ক্রমশ

হাতাহাতি বেধে ওঠে। ধাক্কাধাক্কির ফলে মৈত্রেয়ের কোমরের পুঁটুলীটি খুলে গিয়ে সব গয়না পড়ে গেল—শকারের তো পোয়া-বারো—চারুদত্তের বিরুদ্ধে প্রমাণ যেন নিজেই হেঁটে এসে গেছে।

সে গয়নাগুলি দেখিয়ে বলে ওঠে—‘এগুলিই তো সেই বেশ্যার গয়না—যেগুলির লোভে চারুদত্ত তাকে খুন করেছে। সাংক্ষী মানা হয় বসন্তসেনার মাকে। সনাক্ত করা ছাড়া তারও আর কিছুই করার থাকে না। অতএব আত্মপক্ষ সমর্থনের কোনো উপায়ই আর চারুদত্তের নেই। কিন্তু সহানুভূতিশীল বিচারক চরম আদেশ দেওয়ার জগ্রে রাজা পালকের কাছে মোকদ্দমাটি পাঠিয়ে দেন। সব ঘটনা শুনে রাজা রায় দিলেন—‘গয়নাগুলি গলায় বেঁধে দিয়ে চারুদত্তকে শূলে চড়াতে হবে—লোভীদের কাছে উদাহরণ হয়ে থাকবে এই শাস্তি।’ শকারের আনন্দ দেখে কে! তার উদ্দেশ্য সফল হলো এবার। বিলাপরত মৈত্রেয়কে সাস্তুনা দিয়ে তার ওপর স্ত্রীপুত্রের দেখাশোনার দায়িত্ব দিলেন চারুদত্ত—এবার নিজেকে প্রস্তুত করেন বিনা অপরাধে শাস্তিগ্রহণের জগ্রে। চণ্ডালেরা এসে তাঁকে ধরে নিয়ে যেতে থাকে বধ্যভূমির দিকে। প্রথা অনুসারে তাঁর দেহে রক্তচন্দনের প্রলেপ দিয়ে তার ওপর চাল ছড়িয়ে গলায় করবীর মালা পরিয়ে রাজপথ দিয়ে নিয়ে যাওয়া হতে থাকে—চারুদত্তের এ হেন লাঞ্জনায় পুরবাসীরা অনেকেই শোকার্ত—কিন্তু রাজশাসনের কাছে তারা নিরুপায়। পুত্র রোহসেনকে নিয়ে মৈত্রেয় দৌড়ে আসেন চারুদত্তের কাছে—পুত্রমুখ দর্শনের আশায় চণ্ডালদের কাছে কিছু সময় প্রার্থনা করেন চারুদত্ত। বালকের করুণ উক্তিতে বৃষি পাথরও ফেটে যায়—‘আমার বাবাকে ছেড়ে দাও, আমাকে বরং মেরে ফেল।’ চারুদত্তের চোখে জল—সন্তানকে বুকে জড়িয়ে ধরেন। চণ্ডালদের কঠিন হৃদয়ও কোমল হয়ে ওঠে এই দৃশ্যে। কিন্তু কর্তব্যের ডাকে তাদের টেনে নিয়ে যেতে হয় চারুদত্তকে।

কুকর্মের সাক্ষী ভৃত্য স্থাবরককে শকার যে বাড়ীতে বন্দী করে রেখেছিল সে বাড়ীর সামনে এসে চণ্ডালরা যখন ডিঙিম বাজিয়ে ঘোষণা করতে থাকে রাজাদেশ—তখন স্থাবরক আর স্থির থাকতে পারে না। চীৎকার করে সে জানাতে থাকে আসল ঘটনা—কিন্তু সমবেত জনতার হট্টগোলে চাপা পড়ে যায় তার কণ্ঠস্বর। উপায়ান্তর না দেখে সে হাত বাঁধা অবস্থাতেই জানলা দিয়ে লাফ দিল—আঘাত খুব মারাত্মক না হলেও হাতের শিকলটি যাহোক ভেঙে গেল—অমনি ছুটে এসে সে সবাইকে বলতে থাকে—চারুদত্ত নির্দোষ—কুকীর্তি আসলে শকারেরই। চারুদত্তের নিধনপর্ব প্রত্যক্ষ করার জন্মে শকারও ইতিমধ্যে সেখানে পৌঁছে গেছে—সে তাড়াতাড়ি বলে ওঠে—‘আসলে সোনা চুরি করায় ওকে বন্দী করে রাখা হয়েছিল—এখন সুযোগ বুঝে মনিবের নামে অপবাদ দিচ্ছে।’ আড়ালে ডেকে স্থাবরকের হাতে জোর করে একটি সোনার বালা ধরিয়ে দিয়ে তাকে চুপ করে থাকতে বলে—কিন্তু ধর্মভীরু স্থাবরক সকলকে সেই সোনার বালাটি দেখিয়ে বলে, ‘শালা মশাই এইটি ঘুষ দিয়ে আমাকে বশ করতে চাইছেন।’ শকারেরও কূটবুদ্ধির অভাব নেই, সেও তক্ষুণি বলে বসে—‘এইটিই তো সেই বালা যেটি চুরি করার জন্মে একে শাস্তি দেওয়া হয়েছে’—এইভাবে সাধারণ মানুষকে বিভ্রান্ত করে চণ্ডালদের ওপর হুকুম চালায়—‘যত তাড়াতাড়ি সম্ভব রাজাদেশ পালন করে চারুদত্তকে হত্যা কর।’ চাপা পড়ে গেল স্থাবরকের চেষ্টা ; চারুদত্তকে বুঝি অগ্নায় শাস্তি থেকে বাঁচান গেল না। অবশেষে দলটি পৌঁছাল বধ্যভূমির সামনে—শ্মশানের দৃশ্য নারকীয়—অর্ধভুক্ত শব—শূলে বীভৎস নগ্ন দেহ—শৃগাল-কুকুরের বিচরণে ভয়ঙ্কর। শেষবারের মত দণ্ডাজ্ঞা ঘোষণা করতে থাকে চণ্ডালেরা—এর পরেই নেমে আসবে ঘাতকের তীক্ষ্ণ অস্ত্র। কিন্তু চারুদত্তের মত সজ্জন ব্যক্তির উপর অস্বাভাব্য করতে নিষ্ঠুর চণ্ডালেরাও বুঝি দ্বিধাগ্রস্ত। তাই প্রথমে তারা কালক্ষেপ করতে থাকে কার আঘাতের পালা—

এই নিয়ে তর্ক। যদিও বা এই প্রসঙ্গের একটা মীমাংসা হ'লো একজন আরেকজনকে কিছুক্ষণ অপেক্ষা করতে বলে। তার বাবা তাকে বলে গেছেন যে অপরাধীকে হত্যার আগে কিছু সময় অপেক্ষা করা উচিত; কারণ অনেক সময় রাজার জয়লাভ, পুত্রপ্রাপ্তি ইত্যাদি কারণে বন্দীদের মুক্তি দেওয়া হয়—আবার কখনও বা রাজার পরিবর্তন হওয়ায় নতুন রাজা সব অপরাধীদের ছেড়ে দেন। কিন্তু শকার অনবরতই তাড়া দিতে থাকে, কাজেই বেশীক্ষণ আর তাদের এভাবে কালক্ষেপ করা চলল না—কি আশ্চর্য! চরম আঘাত হানার জন্তে খড়া তুলতেই চণ্ডালের হাত থেকে সেটি পড়ে গেল। তখন যেই শূলে গাঁথার জন্তে চারুদত্তকে ধরা হয়েছে তখনি দূর থেকে শোনা গেল নারীকণ্ঠের কাতর অনুরোধ—ওঁকে মেরো না, মেরো না; যে হতভাগিনীর জন্তে ওঁর হত্যার আদেশ সেই আমি বেঁচে আছি।' চণ্ডালরা বসন্তসেনাকে দেখে চমকে উঠে, চারুদত্তকে ছেড়ে দেয়। কাঁদতে কাঁদতে বসন্তসেনা চারুদত্তের পায়ে পড়েন। চারুদত্তও বিস্মিত—একি সত্যি! বসন্তসেনা কি প্রকৃতই জীবিতা, না তাঁকে রক্ষা করার জন্তে স্বর্গ থেকে নেমে এলেন কোনো দেবী! কিন্তু স্পর্শ পেয়ে সব ভ্রম হ'লো দূর—আবেগে ছ'জনের কণ্ঠ রুদ্ধ। বসন্তসেনার সঙ্গে ছিল সেই উদ্ধারকর্তা ভিক্ষু—সে চারুদত্তকে সমস্ত ঘটনার বিবরণ জানাল। বেগতিক দেখে শকার তো দে চম্পট—কিন্তু চণ্ডালরা এবার আসল খুনীর সন্ধান পেয়ে ছুটে গেল তাকে ধরবার জন্তে।

চারিদিকে খুবই গণ্ডগোল শুরু হয়ে গেছে—শর্বিলক আর্যককে মুক্ত করার পর ছ'জনে মিলে রাজা পালককেও নিহত করেছে—আর্যকই এখন রাজা। শর্বিলক ছুটে এসে চারুদত্তকে মুক্ত করে দেয়। ইতিমধ্যে বসন্তসেনার সঙ্গে মিলন হয়েছে চারুদত্তের। রাজপ্রতিনিধিরূপে শর্বিলক বসন্তসেনাকে বধূর মর্যাদা দিয়ে অবগুণ্ঠন টেনে দেয়—চারুদত্তের ব্রাহ্মণী ধূতাও সাদরে অন্তঃপুরে গ্রহণ করেন

রসমুসেনাকে। কৃতজ্ঞতার চিহ্ন হিসাবে আর্থক ঐ দেশের দায়িত্ব
 ভার চারুদত্তের ওপরই সমর্পণ করে—শুধু তাই নয়, তাঁর ইচ্ছা
 অনুসারেই উদ্ধারকারী ভিক্ষু সমস্ত বৌদ্ধ মঠের কর্তৃত্ব লাভ করে,—
 স্থাবরক দাসত্ব থেকে মুক্ত হয়, চন্দনক পায় প্রধান সেনাপতির
 পদ। আর শকার? চণ্ডালরা ধরে আনার পর শর্বিলক শাস্তি
 দিতে উত্তত হলে এই কাপুরুষ চারুদত্তেরই পায়ে এসে পড়ল।
 ‘শরণাগতের ভয় নাই’—অতএব শরণাগত-বৎসল চারুদত্ত শকারকেও
 অব্যাহতি দিলেন।

রত্নাবলী

সাগরের জল থেকে যাকে পাওয়া গেল, তার নাম ‘সাগরিকা’ ছাড়া আর কিই বা দেওয়া চলে? কৌশাণ্ধী দেশের জনৈক বণিক সমুদ্র থেকে উদ্ধার করে আনলেন পরমসুন্দরী এক কন্যাকে—রাজমন্ত্রী যোগেন্দ্ররায়ণের আজ্ঞা অনুসারে সে কন্যা স্থান পেল রাজ-অন্তঃপুরে—রাজ্ঞী বাসবদত্তার সহচারিণীরূপে, কিন্তু কেউ জানতে পারল না এই কন্যার পরিচয়। রাজ্ঞীও তাঁকে সযত্নে রক্ষা করে চলেন চঞ্চলমতি রাজা উদয়নের দৃষ্টিপথ থেকে।

বৎস রাজ্যে মদনোৎসব—নরনারী আনন্দমত্ত। উৎসব দিবসে রাজ্ঞী বাসবদত্তা এসেছেন মকরন্দ উद्याনে পুষ্পধনুর অর্চনার উদ্দেশ্যে। দেবীর আস্থানে রাজা উদয়ন ও বিদূষক এলেন এই কাননে। কামদেবের আরাধনার পর রাজ্ঞী উদয়নকেও পুষ্পচন্দনে পূজা করলেন। এবার বুঝি রাজার দৃষ্টি থেকে সাগরিকাকে দূরে রাখার প্রয়াস ব্যর্থ হতে চলেছে। সখী সুসঙ্গতার সঙ্গে সাগরিকাও আসছিলেন সেই উद्याনে—আড়াল থেকে দেখলেন তিনি রাজাকে—অতনু যেন মূর্তি পরিগ্রহ করে কাননভূমি আলোকিত করে বসেছেন। মুগ্ধ হলেন তিনি। বিধাতা বুঝি রাজা উদয়নের বক্ষের জগাই সৃষ্টি করেছিলেন এই সাগর-সেঁচা রত্নহার ‘সাগরিকা’।

মদনশরে আহতা ‘সাগরিকা’ কদলীকুঞ্জে এসে রাজার ছবি এঁকে ভুলতে চাইলেন প্রার্থিত পুরুষকে না পাওয়ার বেদনা, কিন্তু সখী সুসঙ্গতাকে এড়িয়ে থাকা গেল না। সুসঙ্গতা সেখানে এসে সহজেই বুঝতে পারল সখীর মনোভাব—কৌতুকে সে রাজার চিত্রের পাশে এঁকে দিল সাগরিকার আলেখ্য—যেন কামদেবের পাশে রতিদেবী। গোপনতার আবরণ গেল উড়ে—অকপটেই সাগরিকা সখীর কাছে

প্রকাশ করলেন রাজা উদয়নের প্রতি তাঁর গভীর আকর্ষণের কথা। সুসঙ্গতার খাঁচায় ছিল পোষা সারিকাটি—যে কোন কথা শুনে মানুষের ভাষার পুনরাবৃত্তি করাই এই পাখীটির বৈশিষ্ট্য। কিন্তু তাঁদের এই নিভৃত আলাপের রেশটুকু ছিঁড়ে গেল এক উচ্চকিত ঘোষণায়—পশুশালা থেকে খাঁচা ভেঙে পালিয়েছে এক হিংস্র বানর—সামনে যা পাচ্ছে সব কিছুই সে ছিন্ন-ভিন্ন করে দিচ্ছে। ভীত হয়ে সাগরিকা ও সুসঙ্গতা আশ্রয় নিলেন নিকটেরই এক অন্ধকারাচ্ছন্ন তমালবৃক্ষের তলে। পিছনে ফেলে গেলেন সেই আলেখ্য ও খাঁচার আবদ্ধ সারিকাটিকে। ছুট্ট বানরটি সেইখানে এসে কঠিন আঘাতে খাঁচাটির অর্গল দিল ভেঙে, সারিকাটিও মুক্তি পেয়ে উড়ে গিয়ে বসল গাছের ডালে, বানরটি চলে গেল অগ্ন্যদিকে।

বিলাস ভ্রমণের উদ্দেশ্যে রাজাও বিদূষকসহ এলেন সেই উद्याনে। পিঞ্জরমুক্ত সারিকাটি একটি গাছের ডালে বসে পুনরুজ্জীবিত করে যাচ্ছিল সুসঙ্গতার কাছে বলা সাগরিকার কথাগুলির। রাজা ও বিদূষক বুঝলেন—কোনো প্রেমাতুরা নারী দয়িতকে পাওয়ার আশায় নিরাশ হয়ে ব্যস্ত করেছে তার গোপন ব্যথা—সারিকাটি সেগুলিই মানুষের ভাষায় পুনরাবৃত্তি করে চলেছে। কিন্তু কে এই হতাশ নায়িকা? তার বাঞ্ছিত পুরুষই বা কোন্ ভাগ্যবান? সব সন্দেহের নিরসন হলো ফেলে-যাওয়া ছবিটি দেখে। রাজা উদয়নকেই তো ধরে রাখা হয়েছে নিপুণ তুলিকায়! তবে পার্শ্ববর্তিনী এই বরনারীর অপরূপ দেহ-সুশ্রমা তো ইতিপূর্বে রাজার দৃষ্টিপথে আসেনি। রাজহংসীর মতই লীলাময়ী, রূপে লক্ষ্মীকেও যেন পরাজিত করে—সেই চিত্ররূপা স্নতনু, রাজার মানসসরে স্থায়ী আশ্রয় লাভ করলেন। বিদূষকের কাছে রাজা প্রকাশ করে চলেন অপ্রাপ্তা এই কল্পসুন্দরীর জগ্গে তাঁর আন্তরিক অভিলাষের কথা। অন্তরাল থেকে সাগরিকা ও সুসঙ্গতা আত্মপ্রকাশ করে চিত্রফলকটির দাবি জানায়। দেবী বাসবদত্তার পরিচারিকারূপেই সুসঙ্গতা পরিচিতা—কাজেই রাজা ও বিদূষক

সম্ভব হয় ওঠেন তার আগমনে । কিন্তু অভয় দিয়ে সুসঙ্গতা জানাল—
 সাগরিকার দূতীরূপেই সে এসেছে—কাছেই আছে সাগরিকা । সাগ্রহে
 রাজা এগিয়ে চলেন—সঙ্গে বিদূষক ও পথপ্রদর্শিকা সুসঙ্গতা । অল্পক্ষণ
 পরেই তিনি দেখলেন—সেই চিত্র যেন মূর্তিমতী হয়ে উঠেছে তাঁর
 সামনে—রূপের ছটায় উদ্যান উজ্জ্বল করে প্রতীক্ষা করছেন বরবর্ণিনী
 সাগরিকা—মোহাবিষ্টের মতই এগিয়ে এসে রাজা সাগরিকার একটি
 হস্ত ধারণ করলেন—কেটে যায় কয়েকটি মুগ্ধ মুহূর্ত । সহসা সেই
 স্তম্ভতা ভঙ্গ করে বিদূষক প্রকাশ করে বসল তার চমৎকৃতি—‘আহা
 ঠিক যেন সেই বাসবদত্তা ।’ —সচকিত হয়ে উঠল সকলে । রাজ্ঞীর
 আগমন সম্ভাবনায় ভীত হয়ে হরিতপদে অন্তর্হিত হলেন সাগরিকা ও
 সুসঙ্গতা । ক্ষুব্ধ মনে রাজা দোষারোপ করলেন বিদূষককে । কিন্তু
 সম্ভাবনাই হলো সত্যি—রাজ্ঞী বাসবদত্তা অনুগতা কাঞ্চনমালাকে নিয়ে
 উপস্থিত হলেন সেইস্থানে রাজার অবেষণে । সেই চিত্রফলকটি
 গোপন করার জন্য ব্যগ্র হয়ে উঠলেন রাজা—কিন্তু বিদূষকের
 অনবধানতায় তাঁর চেষ্টা হলো বিফল । কাঞ্চনমালা রাজ্ঞীর দৃষ্টি
 আকর্ষণ করেন চিত্রটির দিকে । সবিস্ময়ে তিনি প্রশ্ন করেন—‘রাজার
 পাশে ঐকা ছবিটি কার কীর্তি ?’ সন্দেহ দেখা দেয় তাঁর মনে—এ
 পর্যন্ত তো রাজার দৃষ্টিপথে আসতে দেননি সাগরিকাকে । সত্য গোপন
 করে রাজা বলেন—এই নারী সম্পূর্ণরূপে তাঁর কল্পনার সৃষ্টি । কিন্তু
 এই দুর্বল যুক্তিতে রাজ্ঞীর সন্দেহ দূর হয় না—শিরঃপীড়ার অজুহাতে
 তিনি তৎক্ষণাৎ রাজার সঙ্গ ত্যাগ করে চলে গেলেন ।

সাগরিকার জন্মে প্রেমবহ্নিতে দগ্ধ হতে থাকেন রাজা উদয়ন ।
 বিরহকাতরতা সাগরিকার জীবনকেও অসহনীয় করে তোলে ; কিন্তু
 স্বাভাবিকভাবে মিলনের কোন পথই খোলা নেই । অবশেষে পৌর-
 জনদের সন্দেহের হাত এড়িয়ে রাজার ও সাগরিকার মিলনের এক
 উপায় উদ্ভাবন করে সুসঙ্গতা । উপহারস্বরূপ বাসবদত্তার কাছ থেকে
 যে পরিচ্ছদ লাভ হয়েছিল, তাই দিয়ে সাগরিকা সাজবেন বাসবদত্তা,

আর সুসঙ্গতা নিজে কাঞ্চনমালার বেশে তাঁকে অনুসরণ করবে। বিদুষকের মাধ্যমে রাজাকে এই সংবাদ প্রেরণ করা হলো। কিন্তু কোনও ক্রমে কাঞ্চনমালার কর্ণগোচর হলো এই পরিকল্পনা—ফলে এক হাস্যকর পরিস্থিতির উদ্ভব হলো। যথাসময়ে পূর্ব-সঙ্কেতিত স্থানে রাজা বিদুষক সহ উপস্থিত। আশু মিলনের আনন্দে অধীর তাঁর চিত্ত। ধীরে ধীরে এগিয়ে আসেন বাসবদত্তা ও কাঞ্চনমালা—এঁদের ছদ্মবেশিনী সাগরিকা ও সুসঙ্গতা ভেবে রাজা নিঃশঙ্কচিত্তে সাগরিকার উদ্দেশ্যে প্রেম নিবেদন করে চলেন। অবগুণ্ঠনের অন্তরালে নিস্তরক বাসবদত্তা। কিন্তু রাজার উচ্ছ্বাসের আতিশয্যে অবশেষে তাঁর ধৈর্যের বাঁধ ভেঙ্গে গেল। নিজেকে প্রকাশিত করে ক্ষুব্ধ অন্তরে রাজার কাছে বিদায় প্রার্থনা করেন। রাজা স্তম্ভিত, রাজ্যীর ক্রোধের আশঙ্কায় বিহ্বল, রাজার শত অনুনয় সত্ত্বেও বাসবদত্তার ক্রোধ প্রশমিত হলো না—সবেগে তিনি নিষ্ক্রান্ত হলেন।

সাগরিকা জানতে পারলেন—সঙ্কেতের বিষয় দেবীর কাছে গোপন নেই, ফলে সুসঙ্গতা লাজ্বিতা। এবার বোধহয় তাঁর পালা। অপমানের আশঙ্কায় উদ্বুদ্ধনে প্রাণত্যাগ করাই স্থির করেন তিনি। এই উদ্দেশ্যে তিনি এলেন সেই উদ্যানে—পরনে বাসবদত্তার ছদ্মবেশ। বৃক্ষশাখাটি ধরে প্রাণবিসর্জনের পূর্ব মুহূর্তে বিলাপ করে চলেন প্রিয়জনের উদ্দেশ্যে, দূর থেকে বিদুষক ও রাজা এ দৃশ্য দেখতে পেলেন—এবারও তাঁদের ভ্রম হলো। প্রকৃত বাসবদত্তাই বৃষ্টি রূঢ় ব্যবহারের জন্য অন্ততপ্ত হয়ে প্রাণ বিসর্জন দিতে এসেছেন—এই কথা ভেবে কর্তব্যবোধে তাঁকে নিরস্ত করতে এগিয়ে এলেন রাজা—প্রিয়স্পর্শ লাগল সাগরিকার দেহে—মুহূর্তের জগ্গে জগৎ সংসার বিস্মৃত হলেন তিনি—অবগুণ্ঠন গেল সরে। সহর্ষে রাজা দেখলেন—তাঁরই ঈঙ্গিতা সাগরিকা। এ যে মেঘ না হতেই জল! আনন্দের আতিশয্যে রাজা দিশাহারা। ভাবাবেগে উচ্ছ্বসিত হয়ে রাজা প্রকাশ করেন সাগরিকার প্রতি অদম্য আকর্ষণের কথা। বাসবদত্তার প্রতি তাঁর প্রেম আর

বিন্দুমাত্রও অবশিষ্ট নেই। ভাগ্যের পরিহাসে সেই সময়ে বাসবদত্তা আসছিলেন তাঁর রুঢ় ব্যবহারের জন্ত রাজার কাছে ক্ষমা প্রার্থনা করতে—অল্প দূর থেকে রাজার সমস্ত উচ্ছ্বাসই তাঁর কর্ণগোচর হল। আর সংযত রাখতে পারেন না নিজেকে—দারুণ ভৎসনায় রাজাকে স্তব্ধ করে দিয়ে বিদূষক ও সাগরিকাকে বন্দী করে রাখার আদেশ দিলেন। বিমূঢ় রাজা ঘটনার আকস্মিকতায় নির্বাক।

দিনের পর দিন যায়—সাগরিকার কোন সংবাদ না পেয়ে রাজা বিচলিত। শুধু এইটুকু জানতে পারলেন যে, বাসবদত্তা রটনা করেছেন—সাগরিকাকে উজ্জয়িনীতে প্রেরণ করা হয়েছে। রাজার বহু কাতর অনুনয়ে বিদূষক মুক্তিলাভ করলেন। বিদায়কালে সখীর কাছে উদ্ধার-প্রাপ্ত সাগরিকা বিদূষককে দেওয়ার জন্ত নিজের কণ্ঠহার অর্পণ করে গেলেন। সরাসরি রাজার হাতে মালা দেওয়ার সাহস হবে কি করে সাগরজল থেকে উদ্ধার-করা অজ্ঞাতপরিচয় এই তরুণীর? বিদূষকের কণ্ঠে সেই অপূর্ব রত্নাবলী দেখে রাজা বুঝলেন—এর অধিকারিণী নিশ্চয় কোন উচ্চকুলসম্ভূতা। আরও দুঃসহ হয়ে ওঠে রাজার কাছে সাগরিকার বিয়োগ-ব্যথা। তাঁকে অগৃহীত আকৃষ্ট করবার জন্ত রাজ্ঞী এক ঐন্দ্রজালিকের যাত্নবিদ্যা প্রদর্শনীর আয়োজন করলেন। রাজ্ঞীর আগ্রহাতিশয্যে অনিচ্ছুকচিত্তে রাজাকে রাজী হতে হলো। উৎসাহভরে ঐন্দ্রজালিক উজাড় করে দেয় তার যাত্নবিদ্যার ভাণ্ডার—মায়াবলে সৃষ্টি করে চলে স্বর্গলোক।—পদ্মাসন ব্রহ্মা, শঙ্খপদ্মগদা-চক্রশোভিত বিষ্ণু, চন্দ্রচূড় মহাদেব—ইন্দ্র ও অগ্নি দেবদেবীর মূর্তি দেখে সকলে চমৎকৃত। কিন্তু বৈশীক্ষণ রাজার মনোরঞ্জনের সুযোগ তার হলো না। খবর এসে সিংহলের রাজমন্ত্রী বসুভূতি ও কণ্ঠুকী বাভ্রব্য রাজদর্শনের অভিলাষী। অতএব বিদায় নিতে হল ঐন্দ্রজালিককে—কিন্তু ঘোষণা করে গেল, আরেকটি বিদ্যা সে অবশ্য দেখাবে মহারাজকে—‘একো উণ খেলণও অবসং দেবেণ পেক্খিদেবো।’

বাসবদত্তার মাতুল সিংহলরাজ বিক্রমবাহুর মন্ত্রী বসুভূতি

কঞ্চুকীসহ প্রবেশ করেন। প্রথমেই তাকে আকৃষ্ট করে বিদূষকের কণ্ঠে লঙ্ঘমান মালাটি—বিস্মিত হয়ে তিনি ভাবেন—ঠিক এইরকম রত্নহারই তো বিক্রমবাহু দিয়েছিলেন তাঁর কন্যা রত্নাবলীকে। কুশল প্রশ্ন বিনিময়ের পর মহামন্ত্রী প্রকাশ করেন সিংহলরাজের জীবনে চরম বিপর্যয়ের সংবাদ। কৌশাস্ত্রী রাজ্যের প্রধান সচিব যৌগন্ধরায়ণ রাজা উদয়নের জ্যেষ্ঠ সিংহলরাজ কন্যার পাণি প্রার্থনা করছিলেন, কারণ তিনি জানতেন এই কন্যা সম্বন্ধে গণৎকারদের ভবিষ্যদ্বাণী—“যোহস্তাঃ পাণিগ্রহণং করিষ্যতি স সার্বভৌমো রাজা ভবিষ্যতি।” এই কন্যার পাণিগ্রহণকারী রাজা নৃপতিকূলে সার্বভৌমত্ব লাভ করবেন। কিন্তু আত্মীয়কন্যা বাসবদত্তার ক্ষোভের আশঙ্কায় বিক্রমবাহু এ প্রস্তাবে রাজী হননি। যৌগন্ধরায়ণ তখন লাবাণক গ্রামদাহে বাসবদত্তার মৃত্যুসংবাদ রটনা করে দিলেন। ফলে রাজা উদয়নের সঙ্গে সম্পর্ক-লোপের আশঙ্কায় বিক্রমবাহু কন্যা রত্নাবলীকে প্রেরণ করলেন উদয়নের সঙ্গে বিবাহের উদ্দেশ্যে। কিন্তু পথে রত্নাবলীর সমুদ্রপোত জলমগ্ন হয়ে পড়ে—তাঁর কোন সন্ধানই পাওয়া যায় না। এই দারুণ দুঃসংবাদে রাজ্ঞী বাসবদত্তা ও রাজা উদয়ন দু’জনেই শোকে মুহুমান হয়ে পড়েন। সেই মুহূর্তে আবার শোনা গেল এক শোচনীয় সংবাদ—অন্তঃপুরে আগুন লেগেছে—লেলিহান শিখায় গ্রাস করে চলেছে সমস্ত কিছুর। সকলেই স্তম্ভিত। ভয়বিহ্বলা রাজ্ঞী বাসবদত্তা প্রকাশ করে ফেলেন—সাগরিকাকে উজ্জয়িনীতে প্রেরণের সংবাদ মিথ্যা রটনা, অন্তঃপুরেই তাকে আবদ্ধ করে রাখা হয়েছে। উদয়ন আর স্থির থাকতে পারেন না—সাগরিকাকে উদ্ধারের জন্তে ঝাঁপ দিতে যান সেই আগুনের মধ্যেই। রাজ্ঞী বাসবদত্তা, সিংহলমন্ত্রী, বিদূষক ইত্যাদিরাও অগ্রসর হন। রাজা দেখেন শৃঙ্খলসহ সাগরিকা সেই অগ্নিতে প্রাণবিসর্জনে উৎসুক—সবলে রাজা বাধা দেন তাঁকে। কিন্তু সহসা দেখা গেল, সেই সর্বগ্রাসী অগ্নির লেশমাত্রও নাই—চারিদিক্ সম্পূর্ণ শান্ত। সকলেই বিস্মিত। বাসবদত্তা বুঝতে পারেন—এ সেই

ঐন্দ্রজালিকের কীর্তি—যে বলেছিল আরও একটি খেলা সে রাজাকে দেখাবে। কিন্তু সিংহলরাজের মন্ত্রী চমকিত হয়ে উঠলেন কেন? যখন জানলেন, এই কন্যাকে সাগর থেকে উদ্ধার করা হয়েছে, তখন নিঃসন্দেহে বুঝতে পারলেন ‘সিংহলেশ্বর-দুহিতা রত্নাবলীয়ম্।’ এইতো আমাদের হারানো রাজকন্যা রত্নাবলী। প্রিয়জনকে পুনঃপ্রাপ্তির আনন্দে সকলে আনন্দ-বিহ্বল। —সাদরে রাজ্ঞী মাতুলকন্যা রত্নাবলীকে গ্রহণ করেন—রাজার সঙ্গে মিলনের পথে আর কোন অন্তরায়ই রইল না। কূটকৌশলী অমাত্য যোগন্ধরায়ণ এসে ক্ষমা-প্রার্থনা করেন সাগরিকার পরিচয় গোপন রাখার জন্য, কিন্তু তাঁর সমস্ত পরিকল্পনাই প্রভুভক্তি-প্রণোদিত, অতএব ক্ষমাই।

রাজা উদয়ন এখন বিক্রমবাহুকে মিত্ররূপে ও রত্নাবলীকে প্রিয়রূপে লাভ করে, রাজ্ঞী বাসবদত্তাকেও তাঁর ভগিনী লাভে প্রীত করে, যোগন্ধরায়ণের মত অমাত্যশ্রেষ্ঠের সহায়তায় নিরুদ্ধে রাজ্য শাসন করতে থাকেন।

মুদ্রারাক্ষস

কৌটিল্য তথা চাণক্যই পেরেছিলেন কুটিল রাজনীতিকে সম্পূর্ণ আয়ত্ত্ব করতে। মগধরাজ নন্দের দুর্ব্যবহারে ক্রুদ্ধ হয়ে শিখা উন্মোচিত করে যে প্রতিজ্ঞা করেছিলেন, নন্দবংশের সম্পূর্ণ বিনাশ সাধনেন পর নন্দের শূদ্রপত্নী মুরারি গর্ভজাত মৌর্য চন্দ্রগুপ্তকে সিংহাসনে প্রতিষ্ঠিত করে সে প্রতিজ্ঞা পূর্ণ হলো। কিন্তু আরও একটি কর্তব্য বাকি। নন্দরাজদের একান্ত অনুগত মন্ত্রী রাক্ষস। ব্রাহ্মণবংশজ রাক্ষস শুধু শাস্ত্রবিৎই ছিলেন না, শস্ত্রবিদ্যায়ও তাঁর অসামান্য পারদর্শিতা, আর অমাত্যরূপে বুদ্ধি ও বিচক্ষণতায় তিনি ছিলেন চাণক্যের যথার্থ সমকক্ষ। এহেন ব্যক্তিকে মন্ত্রিরূপে লাভ করা সম্ভব না হলে চন্দ্রগুপ্তের পক্ষে নির্বিঘ্নে রাজ্যশাসন কখনই সম্ভব নয়। কিন্তু রাক্ষস প্রভুহস্তা চন্দ্রগুপ্তের প্রতি বিদ্বিষ্ট হয়ে তার উচ্ছেদসাধনের প্রয়াসে লিপ্ত হয়েছিলেন, অতএব রাক্ষসকে চন্দ্রগুপ্তের পক্ষভুক্ত করার জন্য চাণক্য নানা কৌশলের জাল বিস্তার করে চলেন।

সমস্ত দেশ জুড়ে ছড়িয়ে পড়ল চাণক্যের চর—নানা ছদ্মবেশে। চন্দ্রগুপ্তের উন্নতিতে বিরূপ—এমন কারও সন্ধান পেলেই তাদের শাস্তি-বিধান করা হতো। এইরকমই একজন চর যমপট সঙ্গে নিয়ে নগরবাসীদের দ্বারে যম রাজার মাহাত্ম্য কীর্তন করে আর গুপ্ত সংবাদ সংগ্রহের চেষ্টা করে চলে। একদিন কুসুমপুর নগরের মণিকার ও রাক্ষসের পরম সুহৃদ চন্দনদাসের গৃহে এলো এই চর। পট উন্মুক্ত করে গান করার সময় কক্ষের ভিতর থেকে বাইরে আসে এক উৎসুক শিশু, তাকে বাধা দেওয়ার চেষ্টা করায় এক মহিলার হাত থেকে ছিটকে এসে পড়ল একটি অঙ্গুরীয়ক, যাতে রাক্ষসের নামমুদ্রা অঙ্কিত। চর সেটি সংগ্রহ করে এনে দিল চাণক্যকে। প্রাজ্ঞ এই

ব্রাহ্মণের বুঝতে বাকী থাকে না যে অমাত্য রাক্ষস পার্বত্য রাজ্যের কুমার মলয়কেতুর আশ্রয় গ্রহণ করলেও তাঁর পরিবারের লোকজন বণিক চন্দনদাসের গৃহে সুরক্ষিত। চাণক্য সাগ্রহে গ্রহণ করলেন সেই অঙ্গুরীয়ক—তাঁর উদ্দেশ্যসিদ্ধির পথে আশার দীপশিখা। তিনি তৎক্ষণাৎ সদ্যববহার করলেন সেই সুযোগের। রাক্ষসের অন্যতম সুহৃদ শকটদাসকে বন্দী করা হয়েছিল—অনুচর সিদ্ধার্থকে চাণক্য আদেশ করলেন এই শকটদাসকে দিয়ে শিরোনামবিহীন ও পত্রলেখকের স্বাক্ষর ব্যতীতই কয়েকটি কথা লিখিয়ে নিতে। শোভন হস্তাক্ষরের অজুহাতে বন্দী শকটদাসকে দিয়ে সহজেই কার্যসিদ্ধি করান হল। সেই পত্রে রাক্ষসের নামমুদ্রার ছাপ দিয়ে সিদ্ধার্থকে অর্পণ করলেন চাণক্য। নির্দেশ দিলেন—‘শকটদাসকে যখন বধ্যস্থানে নিয়ে যাওয়া হবে, তখন সিদ্ধার্থক ইঙ্গিত করলে ঘাতকরা পলায়নের ভাণ করবে—সিদ্ধার্থক তখন সহজেই শকটদাসকে উদ্ধার করে উপস্থিত করবে রাক্ষসের কাছে, আর সেই মুদ্রাঙ্কিত আংটিটিও বন্ধুকে প্রত্যর্পণ করে তাঁর বিশ্বাস অর্জনের পর তাঁরই অধীনে কোন কর্ম গ্রহণ করবে।’ সিদ্ধার্থক যাত্রা করে তাঁর নির্দেশিত পথে।

এবার চাণক্য আহ্বান জানালেন চন্দনদাসকে। সম্ভ্রান্ত চিন্তে প্রবেশ করেন নগরীর শ্রেষ্ঠ মণিকার—কিছুক্ষণ কথাবার্তার পরই চাণক্য জানালেন আসল দাবী—‘রাক্ষসের পরিজনকে সমর্পণ কর।’ সম্পূর্ণ অস্বীকার করার প্রয়াস সম্ভব হলো না। কিন্তু চাণক্যের ভীতি-প্রদর্শন ও উৎপীড়ন সত্ত্বেও চন্দনদাস অনমনীয়। দৃঢ় কণ্ঠে ঘোষণা করেন—‘সম্ভ্রমপি গেহে অমাত্যরাক্ষসস্য গৃহজনং ন সমর্পয়ামি, কিং পুনরসম্ভ্রম্।’ অমাত্য রাক্ষসের পরিজনেরা আমার গৃহে নাই, থাকলেও দিতাম না। অতএব স্ত্রী-পুত্র সহ চন্দনদাসকে বন্দী করে সমস্ত সম্পত্তি বাজেয়াপ্ত করার আদেশ দিলেন চাণক্য।

পার্বত্য রাজ্যের রাজা পর্বতকের পুত্র মলয়কেতু। পর্বতক চন্দ্রগুপ্তের সঙ্গে যোগ দিয়ে যুদ্ধ করেছিলেন নন্দরাজবংশের বিরুদ্ধে,

সর্ত ছিল তাঁকে অর্ধরাজ্য দানের। কিন্তু চাণক্যের কৌশলে তা সম্ভব হলো না। রাক্ষস চন্দ্রগুপ্তের হত্যার জ্ঞাত প্রেরণ করেছিলেন এক একদ্বী বিষকণ্ঠা,—চাণক্য পূর্ব থেকে এ সংবাদ অবগত হয়ে সে কণ্ঠাকে প্রয়োগ করলেন পর্বতকের বিরুদ্ধে। পর্বতক এইভাবে নিহত হওয়ায় পিতৃহস্তার প্রতিশোধ গ্রহণের জন্তে রাক্ষসের সঙ্গে মিলিত হলেন মলয়কেতু।

রাক্ষস আশ্রয় নিলেন তাঁরই রাজধানীতে। রাক্ষসের চর বিরোধগুপ্ত সাপুড়ের ছদ্মবেশে সংগ্রহ করে আনে চন্দ্রগুপ্তের রাজধানী কুসুমপুরের খবরাখবর, চন্দ্রগুপ্তকে বিনাশের জ্ঞাত রাক্ষসের সমস্ত কৌশলই চাণক্যের কূটবুদ্ধির বর্মে প্রতিহত হয়ে ব্যর্থ হয়েছে। বিরোধগুপ্ত বিবৃত করে চলে সমস্ত ঘটনা—পর্বতরাজ পর্বতকের সৈন্যবৃন্দ শক, যবন ও পারসীক সৈন্যদের মিলিত বাহিনী বাঁধ-ভাঙা জলোচ্ছ্বাসের মতই কুসুমপুর আক্রমণ করল—চলল অবরোধ। তৎকালীন নন্দবংশীয় রাজা সর্বার্থসিদ্ধি অত্যাচার প্রতিহত করতে অসমর্থ হলেন। তিনি সুড়ঙ্গ পথে নগরী থেকে নিষ্ক্রান্ত হয়ে তপোবনে আশ্রয় নিলেন। নগরী চন্দ্রগুপ্তের অধিকারে এলো।

চাণক্য নির্দেশ দিলেন—অর্ধরাত্রের সুলগ্নে চন্দ্রগুপ্ত রাজা রূপে নগরে প্রবেশ করবেন। সূত্রধারদের আদেশ দেওয়া হলো রাজপুরীর তোরণদ্বারগুলির সংস্কার-সাধনের পর সুসজ্জিত করার। রাক্ষসের অনুগত সূত্রধার দারুবর্মা রাজপুরীর পূর্ব তোরণদ্বার নির্মাণ করে স্থির করল—চন্দ্রগুপ্তের প্রবেশমাত্র উপর থেকে যন্ত্রসাহায্যে ওই তোরণ তাঁর ওপর নিক্ষেপ করবে। দারুবর্মার অতিরিক্ত তৎপরতা চাণক্যকে সন্দেহান করে তুলল, ফলে রাতারাতি চাণক্য পর্বতকের ভাই বৈরোচককে অর্ধরাজ্য দান করে তাঁর অভিষেক সম্পন্ন করলেন। রাজবেশে সুসজ্জিত করার পর চন্দ্রগুপ্তের বাহক হস্তীর উপর বসিয়ে তাঁকে রাজধানীর দিকে যাত্রা করিয়ে দেওয়া হলো। সঙ্গে ছিলেন চন্দ্রগুপ্তের অনুগামী—রাজগুবৃন্দ, বৈরোচককেও চেনা যাচ্ছিল না।

নির্দিষ্ট সময়ে শোভাযাত্রা এগিয়ে আসে সেই তোরণের কাছে—রাজত্ববর্গকে বাইরে রেখে চন্দ্রগুপ্তের হস্তী চন্দ্রলেখা তার আরোহীকে নিয়ে প্রবেশ করে—মাহত বর্বরক চন্দ্রগুপ্তভ্রমে গুপ্ত ছুরিকা নিয়ে আক্রমণ করতে উগ্ৰত হয় বৈরোচককে—এদিকে দারুবর্মা যন্ত্রতোরণ দিয়েছে ছেড়ে—সেটি পড়ল বর্বরকের দেহে—সঙ্গে সঙ্গেই মৃত্যু। তখন নিরুপায় দারুবর্মা প্রাণভয়ে যন্ত্র চালাবার লোহার শলাকা দিয়ে বৈরোচককে হত্যা করল—তার নিজের পরিণাম হলো আরও শোকাবহ—রাজ-অনুচরদের নিষ্কিণ্ড প্রস্তরখণ্ডের আঘাতেই তার পঞ্চতাপ্রাপ্তি ঘটল।

রাক্ষস আরও কতকগুলি উপায় অবলম্বন করেছিলেন চন্দ্রগুপ্তের নিধনের জন্তে। তাঁর নিযুক্ত যে বৈদ্য বিষমিশ্রিত ঔষধ দিল চন্দ্রগুপ্তের পানের জন্তে—চাণক্য তা স্বর্ণপাত্রে ঢেলে বিবর্ণতা প্রাপ্ত হতে দেখে সহজেই বুঝতে পারলেন বিষের কথা—ঐ ঔষধ প্রয়োগেই হত্যা করা হলো সেই বৈদ্যকে। চন্দ্রগুপ্তের শয়নকক্ষে সুড়ঙ্গ তৈরী করে বাস করছিলেন বীভৎসক, সুযোগ মত চন্দ্রগুপ্তকে হত্যার জন্তে, কিন্তু চন্দ্রগুপ্তের শয়নের পূর্বেই সেই কক্ষের পরীক্ষায় এসে চাণক্য দেখলেন অন্নকণা নিয়ে পিপীলিকার সারি। চাণক্য সবই বুঝলেন—তাঁর আদেশে সেই গৃহে অগ্নিসংযোগ করা হলো—দারুণ ধোঁয়ায় আচ্ছন্নদৃষ্টি বীভৎসক মৃত্যুবরণ করল। এইভাবে চাণক্যের সতর্কতার বর্মে প্রতিহত হলো রাক্ষসের সমস্ত নীতিপ্রয়োগ।

শকটদাসের ও চন্দনদাসের সপরিবারে বন্দিদের সংবাদে রাক্ষস বিচলিত। এই সময়ই শকটদাসকে মুক্ত করে চাণক্যের পূর্ব পরিকল্পনা অনুসারে সিদ্ধার্থক রাক্ষসের কাছে উপস্থিত হয় শকটদাস সহ। প্রীত রাক্ষস হৃষ্টচিত্তে সিদ্ধার্থককে নিজ গাত্র থেকে যে অলঙ্কার দান করলেন তা মলয়কেতুরই প্রদত্ত। সিদ্ধার্থক প্রত্যর্পণ করল রাক্ষসের সেই নামমুদ্রা, বলল চন্দনদাসের বাড়ীর কাছে কুড়িয়ে পেয়েছে। সরল বিশ্বাসে শকটদাসের কাছে রাক্ষস গচ্ছিত রাখলেন সেই

মুদ্রাস্থিত অঙ্গুরীয়ক, সিদ্ধার্থকের ইচ্ছা অনুযায়ী তাঁকে কর্মেও নিযুক্ত করলেন—চাণক্যের নীতি-বৃক্ষের বীজ ধীরে ধীরে অঙ্কুরিত হয়ে চলে।

চন্দ্রগুপ্তের রাজধানী কুসুমপুর তথা পাটলীপুত্রে কোমুদী মহোৎসব। প্রাসাদে আরোহণ করে তিনি শারদীয়া পূর্ণিমার অপূর্ব শোভা উপভোগ করতে থাকেন—অনন্ত নীল আকাশ যেন বিশাল বারিধি, আর শুভ্র মেঘখণ্ডগুলি যেন সেই সমুদ্রের বালুতট। সারস-পংক্তির সরস গম্ভীর রব যেন তরঙ্গোচ্ছ্বাসেরই ধ্বনি। নক্ষত্রগুলিতে বিকচ কুমুদের শোভা। পূর্ণ জলাশয়গুলি শান্ত, শান্তভারে ক্ষেত্র অবনত—সর্বত্রই পরিপূর্ণতার প্রকাশ। কিন্তু তাঁর আদেশ অনুসারে নগরে উৎসবের কোন আয়োজনই তো দেখা যাচ্ছে না। কণ্ঠকী তাঁর প্রশ্নের উত্তরে জানালেন চাণক্যের নির্দেশে নিষিদ্ধ হয়েছে উৎসব। চন্দ্রগুপ্ত বুঝি সত্যই ক্রুদ্ধ হয়ে উঠলেন আজ্ঞা লঙ্ঘনে! স্মরণ করলেন চাণক্যকে। চাণক্য এসে স্বীয় প্রভুত্বসূচক যে-সমস্ত উক্তি করলেন তা যেন কুপিত করে তুলল চন্দ্রগুপ্তকে। পরস্পরের প্রতি বিরোধের অভিনয় করে চালাতে থাকেন বাদানুবাদ—অবশেষে অপমানিত ক্রুদ্ধ চাণক্য বিদায় নিলেন। চন্দ্রগুপ্ত ঘোষণা করলেন, এবার থেকে তিনি নিজেই রাজ্যভার বহন করবেন। নগরবাসীরা নিঃসন্দেহ হয় তাঁদের উভয়ের মতবিরোধ সম্বন্ধে—চর প্রমুখাৎ এ সংবাদ পেয়ে উল্লসিত হয়ে ওঠেন রাক্ষস। কিন্তু রাক্ষসকে বিপথে চালিত করার জন্তে এ যে চাণক্যের নীতিবৃক্ষের অগতম মূল—এ সম্ভাবনার কথা রাক্ষসের মনে এবারও উদ্ভিত হয় না।

মলয়কেতু বিভিন্ন রাজার সহায়তায় বিশাল সৈন্যদল নিয়ে কুসুমপুরের কাছেই শিবির স্থাপন করেছেন—উদ্দেশ্য চন্দ্রগুপ্তের রাজধানী আক্রমণ। রাক্ষসও আছেন সেই শিবিরে, ছাড়পত্র ছাড়া সেই শিবিরে গমনাগমন নিষিদ্ধ। মলয়কেতু রাক্ষসের প্রতি সম্পূর্ণ বিশ্বাস স্থাপন করতে পারেন নি, কারণ নন্দবংশের প্রতি রাক্ষসের

অচলা ভক্তি, আর চন্দ্রগুপ্ত শূদ্রা পত্নীর সন্তান হলেও এই বংশের সঙ্গে সংশ্লিষ্ট। রাক্ষসের প্রকৃত প্রতিদ্বন্দ্বী চাণক্যও এখন ক্ষমতাচ্যুত। সন্দেহের বীজে জল-সেচন করে কয়েকটি ঘটনার পারস্পর্য। ছাড়পত্র ছাড়াই শিবিরের বাইরে আসার চেষ্টা করায় সিদ্ধার্থকে ধরে নিয়ে আসে প্রহরী। সঙ্গে শিরোনামহীন সেই পত্র ও অলঙ্কারের পুটলী। শকটদাসকে দিয়ে লেখান ও রাক্ষসের নামমুদ্রাঙ্কিত সেই পত্রের মর্মার্থ—মলয়কেতুর সহায়ক রাজারা নিজেদের মধ্যে মলয়কেতুর রাজ্য, হস্তী ও অশ্বগুলি বণ্টন করে নিতে ইচ্ছুক, চাণক্যকে পদচ্যুত করে পত্রলেখকের যেমন প্রীতি উৎপাদন করা হয়েছে, এবার পূর্বে উল্লিখিত বণ্টনের ব্যবস্থা করে সেই প্রীতির বন্ধন আরও দৃঢ় করা হোক, সিদ্ধার্থকের সঙ্গে অলঙ্কারগুলিও রাক্ষসকে প্রদত্ত হয়েছিল আর প্রহারের ভয়েই যেন সিদ্ধার্থক স্বীকার করে এই পত্র শকটদাসের লিখিত এবং রাক্ষস কর্তৃক চন্দ্রগুপ্তসকাশে প্রেরিত। শকটদাস রাক্ষসের পরম মিত্র—অতএব রাক্ষসের বিশ্বাসঘাতকতা সম্বন্ধে মলয়কেতুর সন্দেহের অবকাশ থাকে না। চাণক্যের ভেদনীতি সার্থকতার পথে।

এদিকে চাণক্যের জনৈক গুপ্তচর সন্ন্যাসী জীবসিদ্ধিরূপে রাক্ষসের আশ্রয়ে থেকে মলয়কেতুর মনে এই ধারণার সৃষ্টি করেছে যে রাক্ষসই বিষকণ্ঠা প্রয়োগে তাঁর পিতার মৃত্যু ঘটিয়েছে। অতএব ক্ষুব্ধ, ক্রুদ্ধ মলয়কেতু বিশ্বাসঘাতকতার অপরাধে অভিযুক্ত করলেন রাক্ষসকে—ক্রুদ্ধ অন্তরে বললেন—‘তদ্ গচ্ছ, সমাশ্রিয়তাং সর্বাশ্বনা চন্দ্রগুপ্তঃ—যাও, চন্দ্রগুপ্তের আশ্রয় ভিক্ষা কর। চাণক্য, চন্দ্রগুপ্ত ও তুমি—এই তিনজনের বিনাশেই আমি সমর্থ। হতবাক্ রাক্ষস বুঝলেন, চাণক্যের কূটনীতির ফলেই এই বিপর্যয়। অপরিণামদর্শী মলয়কেতু তাঁর সঙ্গী রাজাদের মৃত্যুদণ্ড দিলেন। শুধুমাত্র সেই পত্রের বক্তব্যের ওপর ভিত্তি করে তাঁদের সৈন্যরা ছত্রভঙ্গ হয়ে গেল। মলয়কেতু মুষ্টিমেয় সৈন্য নিয়ে ঝাঁপিয়ে পড়লেন যুদ্ধে; বলা বাহুল্য, চন্দ্রগুপ্তের সৈন্যদের

হাতে বন্দী হলেন তিনি। রাক্ষস উপায়ান্তর না দেখে ছদ্মবেশে গোপনে প্রবেশ করলেন রাজধানী কুসুমপুরে।

চাণক্যের কাছে চর মারফত সমস্ত সংবাদই পৌঁছয়, রাক্ষসের গতিবিধি অনুসরণ করে চলে তাঁর গুপ্তচর। আত্মগোপন করে রাক্ষস উপস্থিত হন পাটলিপুত্রের এক ভগ্ন পরিত্যক্ত উদ্যানে—সহসা তিনি দেখেন, এক ব্যক্তি সেখানে উদ্বন্ধনে প্রাণত্যাগ করার প্রয়াসে নিরত। কারণ অনুসন্ধান করায় জানতে পারলেন—বণিক চন্দনদাসের মৃত্যুদণ্ডাজ্ঞা শুনে তার সখা বিষ্ণুদাস আশুনে প্রাণ বিসর্জন করার সংকল্প করেছেন। এই ব্যক্তি বিষ্ণুদাসের বিশিষ্ট বন্ধু—মিত্রের জীবন-নাশের আশঙ্কায় দারুণ শোকে সেও জীবন বিসর্জনে অভিলাষী। এই ঘটনায় রাক্ষসের অন্তরে বিবেকের দংশন তীক্ষ্ণতর হয়ে ওঠে। তাঁর জন্মই চন্দনদাসের এই শোচনীয় দুর্গতি। নিজের শরীরের বিনিময়ে আশ্রিতবৎসল পরম সুহৃদকে রক্ষা করার সংকল্প নিয়ে অগ্রসর হলেন রাক্ষস।

চণ্ডালরা চন্দনদাসকে নিয়ে যাচ্ছে বধ্যভূমিতে, ক্রন্দনরত স্ত্রী ও পুত্র তাঁকে অনুসরণ করে চলেছে। নানা সাহসনাবাক্যে চন্দনদাস তাদের নিবৃত্ত করার প্রয়াস পান—‘স্বর্গং গতানাং তাবদেবাঃ ছুঃখিতং পরিজনমনুকম্পন্তে।’ মিত্রের কাজেই আমার মৃত্যুবরণ, অতএব ছুঃখিত পরিজনদের সহায় হবেন দেবতারা। রাক্ষসের আর সহ্য হয় না—আত্মপ্রকাশ করে তিনি বলে ওঠেন—‘এই ব্যক্তির পরিবর্তে বধার্থ আমাকে গ্রহণ কর।’ উল্লসিত ঘাতক রাক্ষসের ধরা পড়ার সংবাদ দিতে গেল চাণক্যকে। চাণক্য সেই স্থানে এসে সসম্ভ্রমে নতি জানালেন নন্দরাজের অমাত্যশ্রেষ্ঠ রাক্ষসকে। প্রকাশ করলেন—সমস্ত পরিকল্পনা তাঁরই। চণ্ডালবেশী সিদ্ধার্থক ও সমিদ্ধার্থক প্রকৃত পক্ষে তাঁরই অঙ্গুচর—সেই কপট পত্র ও অলঙ্কার, আর উদ্যানের সেই প্রাণত্যাগেচ্ছু পুরুষ সবই তাঁর কৌশল। এ সমস্ত ছলনার পশ্চাতে উদ্দেশ্য একটিমাত্র—রাক্ষসকে পাটলিপুত্রে এনে চন্দ্রগুপ্তের

মন্ত্রিগ্ৰহণে সম্মত করান। এখন তিনি রাজী না হলে চন্দনদাসের মুক্তিও সম্ভবপর নয়। বাধ্য হয়ে রাজী হতে হলো রাক্ষসকে। নমস্কার সেই মিত্রস্নেহকে যা এই অসম্ভবকে সম্ভব করে তুলল। ‘নমঃ সর্বকার্য-প্রতিপত্তিহেতবে সুহৃৎস্নেহায়।’ চন্দ্রগুপ্তও এসে প্রণতি জানানেন রাক্ষসের উদ্দেশ্যে। চাণক্যের আদেশে মলয়কেতু ও অগ্ন্যাগ্না যুদ্ধবন্দীদের বন্ধন হলো মুক্ত; চন্দনদাস প্রতিষ্ঠিত হলেন রাজ্যের শ্রেষ্ঠ মণিকারের পদে, চাণক্যের নীতিবৃক্ষের ফল ফলল, প্রতিজ্ঞা হলো পূর্ণ। রাক্ষসকে চন্দ্রগুপ্তের মন্ত্রিপদে বৃত করে সমাগরা ধরণীর অধীশ্বররূপে দেব চন্দ্রগুপ্তকে আশীর্বাদ জানিয়ে বিদায় গ্রহণ করলেন চাণক্য। এখন তাঁর করণীয় সমাপ্ত। নন্দবংশের উচ্ছেদ, রাজ্যে চন্দ্রগুপ্তের প্রতিষ্ঠা ও রাক্ষসের সঙ্গে মৈত্রী—এই ত্রিবিধ উদ্দেশ্যই সিদ্ধ—‘রাক্ষসেন সমং মৈত্রী রাজ্যে চারোপিতা বয়ম্। নন্দাশ্চান্মূলিতাঃ সর্বে, কিং কর্তব্য-মতঃ প্রিয়ম্ ॥’

মালতী-মাধব

দেবরাত ও ভূরিবসু—দুই বালাসখা। শিক্ষালাভ করেন একই গুরুগৃহে। অধ্যয়নশেষে বিদায়লগ্ন আসন্ন। দুজনেই প্রতিজ্ঞা করেন ভবিষ্যতে পুত্রকন্ঠার জনক হলে তাদের বিবাহের সূত্রে বাঁধা পড়ে দূর করবেন এই বিচ্ছেদের দুঃখ—চিরস্থায়ী হবে বন্ধুত্ব।

দিন যায়। বিদর্ভরাজ্যের মন্ত্রী লাভ করলেন দেবরাত আর ভূরিবসু হলেন পদ্মাবতীনগরের প্রধান অমাত্য। দেবরাতের পুত্র মাধব সমস্ত বিদ্যায় পারঙ্গম হয়ে ওঠলে গ্রাম্যশাস্ত্র অধ্যয়নের জন্তু তাকে প্রেরণ করা হলো পদ্মাবতীনগরে। মন্ত্রী ভূরিবসুর একমাত্র কন্যা মালতী গবাক্ষপথে দেখেন অশ্বারোহী এক রূপবান যুবককে—আভিজাত্য ও শৌর্যের প্রতিমূর্তি যেন! মুহূর্তেই তিনি মালতীর অন্তরে প্রতিষ্ঠিত হলেন দেবতারূপে। কুমুদিনী যেন আবদ্ধ হলো চন্দ্রের কিরণজালে! ক্ষণিকের দেখা, অজ্ঞাতপরিচয় সেই তরুণ পথিকের চিত্রাঙ্কন করে মালতী অদর্শনের দুঃখ ভোলায় চেষ্টা করেন। বৌদ্ধ সন্ন্যাসিনী কামন্দকী পরিবারের বন্ধু ও মালতীর শুভাশী। মালতীর বেদনা তাঁকে অভিভূত করে—দুজনের সাক্ষাৎ ঘটানোর জন্তে তিনি ব্যগ্র হয়ে ওঠেন।

একদিন মদনোৎসব উপলক্ষে সখীদল নিয়ে মালতী এসেছেন মদনোদ্যানে—উদ্দেশ্য, কামদেবতার অর্চনা। কামন্দকীর কৌশলে মাধবও উপস্থিত সেই উদ্যানে। বকুলবৃক্ষের তলদেশে বসে প্রতীক্ষার অবসরে তিনি গৌঁথে চলেন একটি বকুলের মালা। সহসা তাঁর দৃষ্টি আকর্ষণ করে লাস্ত্রময়ী একদল তরুণী—মধ্যবর্তিনী কে ওই বরাজনা—যেন প্রভাতের শিশিরস্নাত শুভ্র কমলকলি! যৌবনভারে অবনতাস্রীর অপাঙ্গদৃষ্টি তাঁর চিত্তকে চঞ্চল করে তোলে; ললনাকুল

ধীরে ধীরে চলে গেল তাঁর দৃষ্টির অন্তরালে—মাধবের হৃদয়ে অসীম শূণ্যতা। কিন্তু আশার আলো নিয়েই বৃষ্টি এগিয়ে আসে এক সখী—প্রার্থনা করে মাধবের গাঁথা সেই বকুলমালিকাটি। মাধব জানতে পারেন—যে বামাকুলোত্তমা তাঁকে মুগ্ধ করেছেন তিনিই মস্তকিণ্ণা মালতী। একথাও তাঁর অজ্ঞাত রইল না যে, মালতী পূর্ব থেকেই তাঁর প্রতি আকৃষ্ট। সখী লবঙ্গিকা মাধবকে দেখায় মালতীর আঁকা মাধবের ছবিখানি। নিজের প্রতিকৃতির পাশে তিনি আঁকলেন মালতীর চিত্র; হৃদয়ের গভীর অন্তরাগ ব্যক্ত করে রচনা করলেন একটি শ্লোক—

“এ ধরার মাঝে আছে কত ধন
সুন্দর তারা সব,
আমার জগতে উৎসব জাগে
তব দরশন লভি।”

বিরহক্লিষ্টা মালতীর কাছে পৌঁছাল সেই মালা ও ছবি। এ ছুটিই হোল তাঁর সব সময়ের সঙ্গী। মালতীকে দেখার পর থেকে মাধবও অনশ্চিন্ত; বন্ধু মকরেন্দ্রের কাছে প্রকাশ করেন তাঁর অন্তর-বেদনা, উভয়পক্ষেই আকর্ষণ তীব্র, আর অভিভাবকেরাও অঙ্গীকার-বদ্ধ। তবে আর বাধা কোথায়? কিন্তু প্রকৃত প্রেমের পথ কখনই কুসুমাস্তীর্ণ নয়। মালতী-মাধবের মিলন পথেও ছিল অন্তরায়।

রাজার সখা নন্দন—মস্তকিণ্ণার পাণিপ্রার্থী, রাজারও সম্মতি ছিল এতে। রাজমন্ত্রী ভূরিবশুর পক্ষে রাজার ইচ্ছার অবমাননা করা হুঃসাধ্য, অতএব বাধ্য হয়েই তিনি নন্দনকে কণ্ঠাদানের অঙ্গীকার করলেন। মালতীর কাছে পৌঁছাল সেই সংবাদ—বেদনায় তাঁর হৃদয় বিদীর্ণ—জীবন সম্পূর্ণ অর্থহীন। সন্ন্যাসিনী কামন্দকী মালতীর হুঃখে কাতর হয়ে এগিয়ে এলেন তাঁর সহায়তায়।

মালতী একদিন শিবপূজার জন্তে মন্দিরে এলেন—সঙ্গে সখী লবঙ্গিকা। তাঁকে যেতে হলো দেবালয়-সংলগ্ন উঠানে—পুষ্পচয়নের প্রয়োজনে। কামন্দকীও উপস্থিত। তাঁরই পরিকল্পনা অনুসারে পূর্ব থেকেই মাধব সেখানে আত্মগোপন করেছিলেন। লবঙ্গিকার কৌশলে কামন্দকীর কাছে প্রকাশিত হয় মালতীর অসহনীয় অবস্থার কথা—বিরহের ব্যথাভারে অঙ্গ তাঁর কৃশপাণ্ডুর, মদনতাপে দন্ধ হচ্ছেন দিবারাত্র। তাঁর অতুলনীয় অঙ্গশোভা সূর্যকিরণ-সংপৃক্ত যুগলের মতই স্নানিমা প্রাপ্ত হয়েছে। কত বিনীত রজনী অবসিত হয়ে যায়—কপূরবাসিত চন্দনবারি, পদ্মপত্রে শয়ন, শীতল কোমল চন্দ্রকান্তমণির স্পর্শ—কিছুই দূর করতে পারে না তাঁর বিরহের খর তাপ। বলাবাহুল্য, মাধবের শ্রবণে পৌঁছায় এই কথোপকথন, ধীরে ধীরে আত্মপ্রকাশ করেন তিনি—মালতী সম্ভ্রান্তা, বাঙ্কিতের সান্নিধ্যে বিহ্বলা, নির্নিমেষলোচনে ছুজনে পান করে চলেন ছুজনের রূপসুধা।—সহসা তাঁদের সেই গভীরতম উপলব্ধির মুহূর্তটুকু ভেঙে খান খান হয়ে গেল সাবধান বাণীর উচ্চরবে—“এক ব্যাঘ্র পিঞ্জরের শিকল ছিন্ন করে বেরিয়ে পড়েছে—পথের সকলেই তার শিকারে পরিণত হচ্ছে।”—সকলেই সচকিত, ভয়ত্রস্ত হয়ে ওঠে। পুনরায় শোনা গেল এক করুণ আতর্ধ্বনি—“রাজসখা নন্দনের ভগিনী ব্যাঘ্রের কবলে।” কিন্তু কিছুক্ষণ পরেই জানা গেল মাধবের বন্ধু মকরন্দ বীরত্বের সঙ্গে যুদ্ধ করে সেই ভয়াল ব্যাঘ্রটিকে নিহত করেছেন—মদয়ন্তিকার জীবন রক্ষা পেয়েছে। সর্বাঙ্গে ক্ষতযুক্ত, অচেতনপ্রায় মকরন্দকে নিয়ে মদয়ন্তিকা প্রবেশ করেন। মাধব প্রিয় সখার এই শোচনীয় অবস্থা দেখে খুবই কাতর হয়ে পড়লেন। অবশেষে মদয়ন্তিকার সমস্ত পরিচর্যায় ধীরে ধীরে মকরন্দের জ্ঞান ফিরে এলো। ছুজনের মধ্যে জন্ম নিল শ্রীতির অঙ্কুর—কৃতজ্ঞতার বীজ ক্রমশ পরিণত হলো প্রেমের মহীরুহ।

কুসুমোঠানে সেই সাক্ষাৎকার মালতী-মাধবের অনুরাগকে গাঢ়তর

করে তোলে,—পরস্পরের মন জানাজানির পালা সাজ। কিন্তু তাঁদের সুখস্বর্গে নেমে এল অশনি-সম্পাত। প্রকাশ্যে ঘোষিত হলো নন্দনের সঙ্গে মালতীর ভাবী বিবাহের সংবাদ—রাজার ইচ্ছা অনুসারে মন্ত্রী ভূরিবশুকে রাজী হতে হয়। লগ্নও সুনির্দিষ্ট, তবে কী নিষ্ঠুর নিয়তির নির্মম পরিহাসে নিষ্পিষ্ট হয়ে যাবে মালতী-মাধবের প্রেমকোরকটি ?

মালতীকে পাওয়ার আশা সুদূরপরাহত। হুর্ভাগ্যের এই নির্দয় আবাতে বিচলিত মাধব স্বাভাবিক জীবনযাত্রা ত্যাগ করে এসেছেন শ্মশানে। প্রেতপিশাচদের বিচরণভূমি এই মহাশ্মশান অমাবস্য়ার গাঢ়কৃষ্ণ অন্ধকারে আচ্ছন্ন ! শবদাহ-জনিত অগ্নির লেলিহান শিখা—সঞ্চরণশীল শৃগালদের জ্বলন্ত চক্ষু—এক বিভীষিকাময় পরিবেশের সৃষ্টি করেছে, কিন্তু মাধব নিঃশঙ্ক। প্রাণপ্রিয়া মালতাই জীবন থেকে বিদায় নিতে চলেছেন। শ্মশানের বীভৎসতা আর এমন কি বেশী ক্ষতি করবে তাঁর। ইতস্তত বিচরণ করেন মাধব। সহসা তাঁর কানে এলো নারীকণ্ঠের রোদন—ব্যাধবিন্ধা হরিণী যেন শেষ আর্তনাদে নিয়তির বিরুদ্ধে জানাচ্ছে তাঁর করুণ অভিযোগ। ভয়ঙ্কর কাপালিক অঘোরঘণ্ট অমাবস্য়ার নিশীথে শ্মশানের কালীমন্দিরে নরবলি দিয়ে সিদ্ধ করবে তার তত্ত্বসাধনা ; প্রচণ্ডা অনুচরী কপালকুণ্ডলা এই উদ্দেশ্যে সুলক্ষণা কুমারী কণ্ঠার অবেষণে নগরে এসেছিল। করুণ বিলাপে আকৃষ্ট হয়ে মাধব মন্দিরে এসে দেখেন তাঁরই বাঙ্জিতা মালতী জালে বদ্ধ মৎসার মতই কপালকুণ্ডলার কবলগ্রস্তা, পূজার সমস্ত উপচার প্রস্তুত—অঘোরঘণ্ট এবার মালতীকে লক্ষ্য করে উদ্ভত করল তার খড়্গ —কিন্তু বাধা পেল মাধবের আক্রমণে। অঘোরঘণ্টকে নিহত করে মাধব মালতীকে উদ্ধার করলেন। নিতান্তই স্ত্রীলোক বলে কপালকুণ্ডলা নিষ্কৃতি লাভ করল—কিন্তু আহতা ফণিনীর মতই জ্বলন্ত প্রতিশোধের স্পৃহা নিয়ে সে স্থান ত্যাগ করে। মালতীর সন্ধানে আগত পিতার প্রেরিত পুরুষদের হাতে মালতীকে অর্পণ করেন মাধব।

অল্পদিনের মধ্যেই নন্দনের সঙ্গে মালতীর বিবাহের আয়োজন সম্পূর্ণ হলো। নির্দিষ্ট দিনটিতে বিশাল শোভাযাত্রার সঙ্গে সখী-পরিবৃত্তা হয়ে মালতী চলেছেন নগরদেবতার মন্দিরে। দেবতার কাছে আশীর্বাদ প্রার্থনার পর তাঁকে বিবাহসজ্জায় ভূষিত করা হবে। জনতাকে বাইরে রেখে শুধুমাত্র সহচরী লবঙ্গিকা সহ মালতী মন্দিরে প্রবেশ করেন। নির্জন দেবগৃহ, শুধু একটি প্রদীপ জ্বালা। আকুল আবেগে মালতী ভেঙ্গে পড়েন দেবমূর্তির চরণে—নিবেদন করেন তাঁর অন্তরের দুঃসহ বেদনা। মাধবের সঙ্গে মিলন বুঝি ইহজীবনে আর সম্ভব হলো না। শেষবারের মত প্রণাম জানিয়ে বাস্পারিত মুখটি তুলে পার্শ্বে প্রতীক্ষারত লবঙ্গিকার গলায় দিয়ে দিলেন বিদায়-উপহারস্বরূপ মাধবের গাঁথা সেই বকুলের মালাটি, যা এতদিন রক্ষিত ছিল তাঁর কোমল উষ্ণ বক্ষে, বুঝি মুক্ত হতে চাইলেন স্মৃতির কণ্টক-যন্ত্রণা থেকে। কিন্তু কার গলায় পড়ল তাঁর মালা? উষ্ণ পরুষ আলিঙ্গনে কে দিল তাঁকে উপহারের প্রতিদান? নারীর কোমল স্পর্শ তো এ নয়। প্রণতা মালতীর একাগ্রতার অবসরে কখন মাধব এসে লবঙ্গিকার স্থান গ্রহণ করেছেন—এ সমস্ত ঘটনাই ঘটছে কামন্দকীর পরিকল্পনা অনুসারে। সেই মুহূর্তেই কামন্দকী এসে জানালেন—তোমরা এক্ষুণি মন্দিরের পিছনের দরজা দিয়ে চলে যাও নগরপ্রান্তের বৌদ্ধমঠে—সেখানে প্রস্তুত আছে বিবাহের আয়োজন। প্রকৃত শুভাকাজক্ষী কামন্দকী তাদের আশিস জানিয়ে উপদেশ দিলেন—

“প্রেয়ো মিত্রং বন্ধুতা বা সমগ্রা
সর্বৈ কামাঃ শেবধিজীবিতঞ্চ।
স্ত্রীণাং ভর্তা ধর্মদারাশ্চ পুংসা-
মিত্যগ্নোত্ত্বং বৎসয়োজ্জীতমস্তু ॥”

“পতি ও পত্নী—উভয়েই উভয়ের কাছে প্রিয়বন্ধু, পরমাত্মীয়,

কথা কামনার ধন ও জীবনসর্বস্ব—এই সব তোমরা মনে রেখো।” কামন্দকীর আশীর্বাণী মাথায় নিয়ে তাঁরা যাত্রা করলেন সেই নির্দেশিত পথে।

এদিকে মালতীর জন্ম আনীত বিবাহসজ্জায় সজ্জিত করা হলো মকরন্দকে। নন্দনকে উপহাসের অয়োজন সম্পূর্ণ। যথারীতি বিবাহের অনুষ্ঠানে অবগুষ্ঠিত মালতী-বেশী মকরন্দকে অর্পণ করা হলো নন্দনের হস্তে। ফুলশয্যার রাত্রে দীর্ঘদিনের সযত্নালিত বাসনা পরিতৃপ্তির আশায় এগিয়ে আসেন নন্দন মালতীর দিকে—কিন্তু নব-বধূর দারুণ পদাঘাতে তাঁর গতি হ’লো রুদ্ধ। উন্মত্ত হয়ে উঠলেন তিনি...কুলটা স্ত্রীর আর কখনই মুখদর্শন করবেন না—এই প্রতিজ্ঞা নিয়ে সেই গভীর রাত্রেই গৃহত্যাগ করলেন।

ভ্রাতার এই অপমান মদয়ন্তিকাকে বিচলিত করে তোলে। শাস্তি-স্থাপনের শুভেচ্ছা-প্রণোদিত হয়ে পরদিন তিনি এলেন নববিবাহিতা ভ্রাতৃবধূর দ্বারে। বস্ত্রাবৃত সুন্দরী নিদ্রিতা। লবঙ্গিকার অনুরোধে মদয়ন্তিকা প্রতীক্ষা করতে থাকেন। এই অবসরে লবঙ্গিকার সঙ্গে রহস্যলাপ চলতে থাকে। মদয়ন্তিকা প্রকাশ করে ফেলেন মকরন্দের জন্মে তাঁর দুর্নিবার প্রেমের কথা। কপট নিদ্রায় আক্রান্ত মকরন্দের শ্রবণের অগোচর থাকে না কিছুই। লবঙ্গিকা অন্তরালে যেতেই মকরন্দ দৃঢ় আলিঙ্গনে আবদ্ধ করেন দয়িতাকে—ছদ্ম নারীবেশ ত্যাগ করে প্রকাশ করেন নিজের পরিচয়। কামন্দকী-শিষ্যা বুদ্ধরক্ষিতার পরামর্শ অনুযায়ী তাঁরাও যাত্রা করলেন সেই বৌদ্ধবিহারের উদ্দেশ্যে।

যথাসময় রাজার কর্ণগোচর হলো সমস্ত সংবাদ, পথেই মকরন্দকে বন্দী করার জন্মে তিনি সৈন্যদল প্রেরণ করলেন। কোনক্রমে বিশ্বস্ত ভৃত্য কলহংস ও লবঙ্গিকা সহ মদয়ন্তিকাকে গুপ্তপথে সেই বৌদ্ধমঠের উদ্দেশ্যে প্রেরণ করে মকরন্দ সৈন্যদলকে বাধা দিতে থাকেন। এই সংবাদ মালতী ও মাধবের কাছে পৌঁছল—মাধবও সখার সহায়তার জন্মে অগ্রসর হলেন। মালতী একা সেই বিহার-

সংলগ্ন উদ্যানে চঞ্চলচিত্তে প্রতীক্ষা করতে থাকেন মাধবের। সূর্যোগের অপেক্ষায় ছিল তন্ত্রসাধিকা কপালকুণ্ডলা। মালতীর একাকিত্বের সূর্যোগে বাজপাখির মতই অন্তরীক্ষ থেকে নেমে এসে মালতীকে নিয়ে অন্তর্হিত হল। বিক্রমের সঙ্গে যুদ্ধ করে দুই বন্ধু ছিন্নভিন্ন করে দেন সৈন্যদলকে। রাজা স্বয়ং প্রাসাদশিখর থেকে যুদ্ধ-দৃশ্য দেখছিলেন— দুই সখার বীরত্ব মুগ্ধ করে তাঁকে। মাধব ও মকরন্দকে প্রাসাদে আহ্বান করে রাজা তাঁদের সম্মানিত করলেন। ক্ষমা করা হলো তাঁদের পূর্বতন সকল অপরাধ। হঠাৎ চিত্তে তাঁরা ফিরে এলেন সেই বিহারে। হরিত পদে আশ্রমে প্রবেশ করেন মাধব অজানা কোন অমঙ্গলের আশঙ্কায় বন্ধ তাঁর ছুরু ছুরু। ব্যস্ত চরণে মালতীর অন্বেষণ করেন তিনি। কোথায় মালতী? মাধবের করুণ বিলাপে ব্যস্ত হয়ে যায় উদ্যান-প্রকৃতি। সীতার জন্মে রামের, উর্বশীর জন্মে পুরুষবার বিলাপও বুঝি এমনই মর্মস্পর্শী!

জীবনে বীতস্পৃহ মাধব সর্বত্র পরিভ্রমণ করেন মালতীর সন্ধানে— সঙ্গে সখা মকরন্দ। অবশেষে তাঁরা উপস্থিত হলেন সিন্ধু ও পারা নদীর সঙ্গমে অবস্থিত পর্বতের কাছে। পর্বতের সমতলে চিত্তাকর্ষক বনভূমি—প্রাকৃতিক শোভায় নয়নাভিরাম। শুভ্রধারা নদীগুলি যেন সেই বনলক্ষ্মীর কণ্ঠে মুক্তাহার—বেতস, কুটজ, লোথ, কেতকী-কদম্ব—নানা পুষ্পের সমারোহ যেন উৎসব-সাজে সজ্জিত করেছে সেই অরণ্য-প্রকৃতিকে। বর্ষা আসন্ন—বনকৃষ্ণমেঘের পুঞ্জ, নৃত্যরত ময়ূর, শীতল বায়ু—এ সমস্তই মাধবের হৃৎথকে অসহনীয় করে তোলে। গভীর বেদনায় তাঁর চেতনা লুপ্ত হ'লো। বন্ধুর এই কাতর অবস্থা দেখে হৃৎথে মকরন্দও প্রাণত্যাগে উদ্ভোগী হলেন—সহসা এক জ্যোতির্ময়ী নারীমূর্তির আবির্ভাব ঘটল। ইনি কামন্দকীর শিষ্যা শ্রীপর্বত-নিবাসিনী সৌদামিনী। তাঁদের মিলিত প্রয়াসে মাধবের জ্ঞান ফিরে এলো। সৌদামিনী বিবৃত করেন মালতীর সংবাদ। কপালকুণ্ডলা মালতীকে সেই উদ্যান থেকে অপহরণ করে শ্রীপর্বতে

আনে হত্যার উদ্দেশ্যে। মালতীর কাতর বিলাপ সৌদামিনীকে আকৃষ্ট করে। কপালকুণ্ডলার কবল থেকে তিনি রক্ষা করেন মালতীকে সমস্ত বিবরণ অবগত হয়ে তিনি মাধবের অনুসন্ধানে ব্যাপ্ত হয়েছিলেন। এখন সফল হয়েছে তাঁর প্রয়াস। মাধব সৌদামিনীর সঙ্গে উপনীত হলেন মালতীর কাছে। মকরন্দ, মদয়ন্তিকা, কামন্দকী—সকলের আগমনে মুখর হয়ে উঠল পর্বতশিখর—সকলের চক্ষুতেই আনন্দাশ্রু। বহু বাধা অতিক্রম করে দুটি প্রাণ বাঁধা পড়ল এক অচ্ছিন্ন মিলনের সূত্রে।

গরিমিষ্ট

সংস্কৃত নাটকের প্রয়োগক্ষেত্র হিসাবে মঞ্চের ব্যবহার ছিল কিনা এটি একটি বিতর্কিত বিষয়। ভারতের নাট্যাশাস্ত্রে মঞ্চ-সম্বন্ধে যে বক্তব্য উপস্থাপিত করা হয়েছে কীথ, স্টেনকোনা প্রমুখ পাশ্চাত্য সমালোচকেরা তাকেই অনুসরণ করেছেন। তাঁদের মতে নাট্যকলার প্রয়োগক্ষেত্র প্রধানতঃ দেবালয় বা রাজপ্রাসাদের সুনির্দিষ্ট কক্ষ হলেও এই উদ্দেশ্যে বিশেষভাবে নির্মিত সভাগৃহ বা প্রয়োগশালাও ছিল। খৃঃ পূঃ দ্বিতীয় শতকের একটি শিলালিপি থেকে জানা যায় এই উদ্দেশ্যে ব্যবহৃত একটি গুহার কথা। এই গুহা-প্রেক্ষাগৃহের প্রবেশপথের প্রস্তরভূমিতে গভীর গর্ত পর্দার জন্য প্রোথিত খুঁটির কথা মনে করিয়ে দেয়। ল্যুডাস'ও জনসাধারণের প্রমোদস্থান হিসাবে গুহাগুলির গুরুত্বের কথা স্বীকার করেছেন। নাট্যাশাস্ত্রে (২. ৬৯)-এ বলা হয়েছে প্রেক্ষাগৃহের আকৃতি গুহার মত ও দ্বিতলবিশিষ্ট হবে। এখানে প্রেক্ষাগৃহের তিনরকম গঠনের কথা উল্লেখ করা হয়েছে—(১) বিকৃষ্ট—একশ' আট হাত বিশিষ্ট (এক হাত=আঠারো ইঞ্চি)। (২) চতুরস্র—দৈর্ঘ্য চৌষটি হাত, প্রস্থে বত্রিশ হাত। এই প্রেক্ষাগৃহ শুধুমাত্র রাজকুমারদের জন্যে। (৩) ত্রিস্র—বত্রিশ হাত দৈর্ঘ্যযুক্ত। চতুরস্র মঞ্চকেই সর্বোত্তম বলে মনে করা হ'তো।

প্রয়োগশালা বা প্রেক্ষাগৃহ প্রধানতঃ দু'ভাগে বিভক্ত—মঞ্চ অর্থাৎ অভিনয়স্থান এবং দর্শকদের আসন। কাষ্ঠনির্মিত শ্রেণীবদ্ধভাবে সজ্জিত আসনগুলির বিভিন্ন অংশ বিভিন্ন বর্ণবিশিষ্ট স্তম্ভদ্বারা পৃথকীকৃত—শুভ্রবর্ণের স্তম্ভবিশিষ্ট স্থান ব্রাহ্মণদের জন্যে ও রক্তবর্ণের স্তম্ভবিশিষ্ট স্থান ক্ষত্রিয়দের জন্যে নির্দিষ্ট ছিল। উত্তর-পশ্চিম

কোণে পীতবর্ণের স্তম্ভযুক্ত স্থান বৈশ্যদের ও উত্তর-পূর্বের কৃষ্ণ বা নীল স্তম্ভসম্বিত স্থানটি শূদ্রদের জন্যে চিহ্নিত। দেখা যাচ্ছে, সামাজিক বর্ণবৈষম্যের খারা প্রেক্ষাগৃহেও, যা অনেকাংশে সামাজিক মিলন ক্ষেত্র, অনুসৃত হয়ে এসেছিল। দর্শকাসনের সম্মুখস্থ অভিনয়স্থানের নাম ছিল ‘রঙ্গস্থল’ বা ‘রঙ্গপীঠ’। এই অংশটি নানা চিত্র ও মূর্তি ইত্যাদি দিয়ে সজ্জিত করা হতো। মঞ্চের পাশে যে অলিন্দের (করিডোর) মত স্থান থাকত তাকে বলা হত ‘মন্তবারণী’।

‘চতুরশ্র’ মণ্ডপের মঞ্চটি হতো চতুষ্কোণ—আট হাত লম্বা ও আট হাত চওড়া। মঞ্চের পিছনের পর্দাটিকে বলা হতো ‘পটী’, ‘অপটী’, ‘প্রতিশীরা’ বা ‘তিরস্করিণী’। কোনো (কোনো আধুনিক ব্যাখ্যাকার অবশ্য ‘পটী’ বা ‘তিরস্করিণী’ শব্দ পর্দা অর্থে প্রযুক্ত বলে স্বীকার করতে রাজী নন, তাঁদের মতে এই শব্দটির অর্থ অভিনেতা-অভিনেত্রীর আবরণী বা আচ্ছাদনী।) সংস্কৃত নাটকে বহু-ব্যবহৃত ‘যবনিকা’ শব্দটি বিদগ্ধজনকে নানা চিন্তার অবকাশ দিয়েছে। অনেকে মনে করেন, ‘যবন’ শব্দের অর্থ ‘গ্রীক’ এবং ‘যবনিকা’ হচ্ছে গ্রীসদেশ থেকে আনীত বস্ত্রনির্মিত মঞ্চের আবরণ। এই বিষয়টি থেকেই তাঁরা সংস্কৃত নাটকে গ্রীক প্রভাব সম্বন্ধে নিঃসন্দেহ হতে চেয়েছেন। প্রকৃতপক্ষে যে কোনো পাশ্চাত্য বা বিদেশীকেই (পারস্যক, আইওনিয়ান ইত্যাদি) ‘যবন’ শব্দে চিহ্নিত করা হ’তো সুতরাং ‘যবনিকা’ যে কোনো পশ্চিমদেশীয় দ্রব্য।

পিছনের পর্দার পিছনের দু’টি দ্বার দিয়ে যাওয়া যেত নেপথ্য-গৃহে—এইখানেই অভিনেতাদের সাজসজ্জার ব্যবস্থা থাকত; এমনকি নাটকের প্রয়োজনে বহুকণ্ঠের মিলিত চীৎকার, দৈববাণী ইত্যাদিও এই ‘নেপথ্য’ থেকেই করা হতো বলে মনে করা হয়। এই দুই দ্বারের মধ্যস্থানটি সম্ভবতঃ বাদকদলের জন্যে নির্দিষ্ট ছিল।

নাটকীয় চরিত্রগুলির পরিচ্ছদ ও সজ্জা সম্বন্ধেও নাট্যশাস্ত্রে আলোকপাত করা হয়েছে। ‘শুদ্ধ’ (অরঞ্জিত), ‘বিচিত্র’ (রঞ্জিত) ও ‘মলিন’ (অপরিচ্ছন্ন)—এই তিন ধরনের পরিচ্ছদের কথা বলা হয়েছে। আভীর কন্যাদের বস্ত্র ‘ঘননীল’, সন্ন্যাসীদের ‘বাকল’, রাজপুত্রদের বিচিত্র-উজ্জ্বল ও ব্রহ্মচারী আর অন্তঃপুরকর্মীরা কাষায় বস্ত্রধারণ করবেন। পাত্রপাত্রীদের কেশ সম্বন্ধেও নির্দেশিকা আছে। পিশাচ, ভূত ও পাগলদের অবিণ্যস্ত বিশৃঙ্খল কেশ, ভৃত্যদের বর্ধিত কেশ ও শিশুদের গুচ্ছাকৃতি কেশের কথা বলা হয়েছে। এই থেকে অনায়াসে মনে করা যেতে পারে, ‘পরচুলা’র প্রয়োগ অজ্ঞাত ছিল না—চরিত্র অনুসারে নির্মিতকেশ ব্যবহার করা হ’তো। বিদূষকের বৈশিষ্ট্য তার ইন্দ্রলুপ্ত অর্থাৎ কেশহীনতায়। অভিনেতাদের গাত্রত্বকে বর্ণলেপন করে স্থান বা জাতিগত বৈশিষ্ট্য ফুটিয়ে তোলা হ’তো। অঙ্ক-দ্রাবিড় ও কাশী-কোশল ইত্যাদি প্রদেশের লোকদের জন্মে কৃষ্ণবর্ণের, শক-যবন ও উত্তর-পশ্চিমাঞ্চলের অধিবাসী বোঝাতে গৌরবর্ণের, পাঞ্চাল-শূরসেন-মগধ-বঙ্গ-কলিঙ্গ ইত্যাদি স্থানের লোকদের জন্মে শ্যামবর্ণের প্রলেপ ব্যবহার করা হ’তো। ব্রাহ্মণ-ক্ষত্রিয়েরা গৌরবর্ণের ও বৈশ্য-শূদ্রেরা শ্যামবর্ণের অনুলেপনে নিজেদের বর্ণগত বৈষম্য ফুটিয়ে তুলতেন।

এই সমস্ত আলোচনা একথাই প্রমাণ করে যে সংস্কৃত নাট্যাভিনয়ের একটি পরিশীলিত ঐতিহ্য গড়ে উঠেছিল এবং নাটকের প্রয়োগবিধি সম্বন্ধে ভরত প্রমুখ নাট্যাচার্যরা যথেষ্ট সচেতন ছিলেন।

